

Lipaxúhu Xtamacatzinín San Juan

Xlihuak pulactati evangelio huantü tatzokta-huilanit xmän huá San Juan juerza tzinú tunu huantü lichuhuinán porque lakpalinit nixachuná cumu la makapitzín. San Juan lacasquín nacatziyáhu tícuya chixcú tamá Jesús y ni caj xmän huá nacatziyáhu túcua laclanca tascújut titlahuanit nac xlatámät. Mäsqi xlícaná pi ni luu lactuhua tachuhuín huantü xlá lichuhuinán, pero lhühua xtalacapastacni huantü antá quincalimasiyuni-putunán. Antiyá limatzuquiy xtakalhchuhuín huantü litaquilhanuy umá likalhtahuaka antanícu huán pi Jesús huá amá Tachuhuín o Xtachuhuín Dios huantü quichixcuhuilachi nac caquilhtamacú y quilatamachi nac quilakstipancán.

Xáhuachí San Juan lacasquín pi xlíhuak amäkolh cristianos huantü natalikalhtahuakay umá Evangelio o Lipaxúhu Tamacatzinín lacatancs nataluloka pi huá Jesús amá qui-mäkaputaxtinacán huantü Dios xmälaçnuninít, y acxni luu akstitum natalipahuán xlacán na natamaklhtinán nac xlacatín Dios laktáxtut xáhua amá latámät huantü necxnicú laksputa.

Jesucristo huantü huanicán Tachuhuín

¹ Acxni ninajtu xanán amá huantü huanicán Tachuhuín na xlamajá, pus amá Tachuhuín na lacxtum xtälama Quintlaticán Dios porque xlá

ná Dios. ² Pus acxnicú huák pútum quilhtzúculh xlá antiyá lacxtum xtálama Dios. ³ Xlá huák maktlahuanit lata túcu anán, y nitu anán para xlá ni maktlahuanit huántu mālacatzuquínit Dios. ⁴ Huá tamá Tachuhuín caj huá xpalacata masqui takálhilih latámat lata túcu xanán, y huatiyá tamá tí mástalh aktum listacni litáxtulh taxkáket huánti nacámksoniy cristianos laquí tlán natalakapasa Dios. ⁵ Xlá milh catalatamay cristianos huánti xtalamánalh nac xacapucsua laquí nacámksoniy xtaxkáket, huata xlacán tatzáksalh xtamámixiputún, pero nilay tamamíxilh.

⁶⁻⁷ Dios macámilh chatum chixcú xuanicán Juan huánti milh lichuhuínán amá taxkáket laquí xlihuák cristianos natacanajlaniy huántu nacahuaniy, y lhühuá huánti camatancsánlh xlamatcán. ⁸ Juan ni huá xkalhiy taxkáket, pus xlá caj xmálañachacanit laquí nalichuhuínán amá taxkáket huánti xámaj min laquí huák natalakapaskocán. ⁹ Huá tamá Tachuhuín huánti xmacaminít nac umá caquilhtamacú, xlícaña xkalhiy taxkáket porque huá cámakskónilh xlihuák cristianos laquí tlán natalakapasa Dios.

¹⁰ Pus amá Tachuhuín milh nac caquilhtamacú laquí nalatamay nac caquilhtamacú huántu lacxtum xtamálacatzuquínit Dios; pero huánti xtalamánalh nac caquilhtamacú amákolh cristianos ni talakápasli. ¹¹ Y amá pulataman huántu xlacsacnít laquí antá nalacachín, huánti antá xtahuilánalh huánti xnatachiquín ni talipáhualh xtachuhuín. ¹² Pero makapitzín cristianos huánti talipáhualh xtachuhuín y caquitaxtúnih cumu lámpara talacachimpá amaktum y xcamanán Dios

calimáxtulh. ¹³ Huá ʉmakolh huant̄i talacáchilh xlimaktiy laqui xcamanán Dios natahuán, huá chuná talilacáchilh xlimaktiy porque huá Dios camáxquilh aktum xasasti xlatamatcán huant̄u chú takalhiy pero ni xtachuná quitáxtulh cumu la acxn̄i xtzí chu xtlatcán camáxquilh xlatamatcán huant̄u xala ʉmá caquilhtamacú.

¹⁴ Amá Tachuhuín milh lacachín cumu la chatum skata y nac quilakstipancán quilatamachi cumu la catihuā chixcú, xlá quílichuhuínánchi xtalakalhamanín Dios y huant̄u xlá xtalacapastaci. Aquinín cucxilhnitáhu pi lanca xlacatzúcūt y ccatziyáhu pi huá Dios máxquinít xlimakatlihueke porque xm̄anhua t̄astum Xkahuasa. ¹⁵ Juan lichuhuínalh nac xlacatincán cristianos y chiné huá:

—Huá eé chixcú huant̄i xaclíchuhuínama acxni chiné cuá: Acalistán mima achatum t̄i atzinú lanca xlacatzúcūt ni xachuná aquit, porque xlá aya xlama hasta acxn̄i aquit ninajtí xaclama.

¹⁶ Caj huant̄u quilacatacán putum quincamaxquinítán xtapaxquín y ni caj maktum porque caj xp̄alacata lanca xtalakalhamanín quincasiculanatlahuaniitán canēcxnicahuá. ¹⁷ Profeta Moisés quincamaxquín amá lipecuánit xtapéksit Dios laqui aquinín lihuanā namákantaxtiyáhu, pero tlān xtalacapastaci xahua xtalakalhamanín Dios huá kalhiyáhu porque Jesucristo quincamasiyunninitán. ¹⁸ Nipara chatum cristiano a ucxilha Dios, pero huití quincamálakapasninitán huá tamá chāstum Xkahuasa porque xlá nā Dios y luu lacxtum xlá t̄amālacastucn̄it xtalacapastaci Quintlaticán.

*Juan Bautista lichuhuinán Cristo
(Mateo 3.11-12; Marcos 1.7-8; Lucas 3.15-17)*

19 Amakolh xanapúxcun judíos xalac Jerusalén tamälakáchälh makapitzín cura xahua huánti cahuanicán levitas xlacata natakalhasquín Juan túcu xlá xlitaxtuy. **20** Xlá nitü maláktzekli huata luu lacatancs cähuánilh:

—Aquit ni huá Cristo huánti huixinín kalhipátit.

21 Xlacán takalhasquimpá:

—Entonces, ¿tícu chinchú huix? ¿Pi huix amá profeta Elías huánti namimparay?

Juan chiné cähuánilh:

—Pus aquit ni Elías.

Xlacán takalhasquimpá:

—Entonces, ¿pi huix amá profeta huánti xlimínit xuanit?

Juan cäkálhtilh:

—Ni aquit.

22 Chiné tahuaniipá:

—¿Tícu chinchú huix? Pus huánti quincamala-kachanítán natacatziputún tícu huix. ¿Túcu naquilahuaniyáhu caj laṭa tu milacata?

23 Juan cäkálhtilh:

—Aquit amá huánti tilichuhuinálh profeta Isaías acxni chiné huá: “Natakaxmata nac desierto la naakchuhuinán chatum chixcú y chiné nahuán: Cacäxtlahuanítit kantum tiji huántu luu statua antaní nalactlahuán Quimpuchinacán.”

24 Amakolh lacchixcuhuín huánti xtamalaka-chanít fariseos, acxni takaxmatkolh xtachuhuín Juan, **25** takalhasquimpá:

—Para ni huix Cristo, nipara Elías y nipara amá profeta huánti namín, glácu chinchú cäliakmu-núpát cristianos?

²⁶ Juan chiné cähuánih:

—Aquit caj chúchut cliakmununún, pero uú nac mimpulatamancán catalamán chatum chixcú huánti ni lakapasátit. ²⁷ Xlá acú namatzuquiy xta-scújut y tlak atzinú lanca xlacatzúcum ni xachuná aquit; pus aquit ni quimininiy naclítaxtuy xta-sacua nacuán huánti naxcutniy xacorrea xta-tunún.

²⁸ Putum eé quítáxtulh nac aktum pülatamán huanicán Betábara, aliquilhtuán kalhtuchoko Jordán antanícu xcäakmunuma cristianos Juan.

Jesús litaxtuy cumu la amá limáknit borrego huánti xokonuniy Dios xpälacata talakalhín

²⁹ Lichalí amá quilhtamacú Juan úcxilhli Jesús pi xtalacatzuhuimá, chiné huá:

—Caucxíltit, huá eé chixcú litaxtuy cumu la xborrego Dios huánti naxokonún nac xlacatín y chuná nacalilacxacaniy cristianos xala caquilhtamacú xlihuak xtalakalhincán huántu tatitlahuanit. ³⁰ Huá tamá chixcú huánti aquit xaclichuhuínama acxní chiné cuá: “Acalistán mima achatum huánti tlak kahiy lanca xlacatzúcum ni xachuná aquit, porque xlá aya xlama acxní aquit ninajti xaclama.” ³¹ Na nipara aquit xaccatziy túcu amá huánti namín, masqui aquit quimacamínca xlacata nacliakmununún chúchut laqui amakolh cristianos xalac Israel natalakapasa acxní nalak-chán quilhtamacú.

³² Y Juan chiné huampá:

—Pero lanchú tlən naccəhuaniyán pi aquit cucxilhnit Espíritu Santo la xtactamachi nac akapún cumu la actzú paloma y antá tahuilachi nac xokspún. ³³ Aquit nə ninaj xaccatziy tícu xlá, pero huantí quimacámilh laquí nacliakmununún chuchut chiné quihuánilh: “Acxní naucxilhá Espíritu Santo tactamachi nac xokspún chatum chixcú y antá natamakxteka, pus huá tamá t̄i naliakmu-nunún Espíritu Santo.” ³⁴ Pus aquit aya cucxilhnit y cmaluloka pi xlícaña huá Xkahuasa Dios.

Xapulh xdiscípulo Jesúis

³⁵ Lichalilitum Juan xcataláya chatiy xtamakalhtahuakén. ³⁶ Antá lacatzú titáxtulh Jesúis, Juan cacs laklácalh y chiné cahuánilh:

—Caucxílhtit, huá amá chixcú litaxtuy cumu la xborrego Dios huantí naxokonún xpälacata talakalhín.

³⁷ Amá chatiy xtamakalhtahuakén Juan acxní takáxmatli huantu xlá huá pus lajihuán tastalánilh. ³⁸ Y acxní Jesúis talakáspitli úcxilhli pi cstalanimácalh, chiné cahuánilh:

—¿Túcu putzapátit?

Xlacán takalhtínalh:

—Makalhtahuakená, ¿nícu huilapi?

³⁹ Jesúis cakálhtílh:

—Catátit, caáhu laquí nalakapasnanátit.

Xlacán tatáralh Jesúis y cumu kotanuyá xuanit acxní táchalh máx cumu aya cámaktati hora, amákolh lacchixcuhuín antá tatamakxtekchá.

⁴⁰ Amákolh lacchixcuhuín huantí takaxmátnilh xtachuhuín Juan y huantí tastalánilh Jesúis, chatum xuanicán Andrés xtalá Simón Pedro.

41 Huata Andrés p_{uh} alh putzay xt_aSimón y chiné huánilh:

—Cmaclanitáhu Mesías —umá tachuhuín huamputún Cristo o malaktaxtiná.

42 Andrés lalihuán lelh Simón antaní xuilachá Jesús y acxni Jesús úcxilhli, chiné huánilh:

—Huix huanicana Simón xkahuasa Juan, pero aquit naclimapacuhuiyán Cefas —umá tachuhuín huamputún Pedro o chíhuix.

Felipe y Natanael nā tastalaniy Jesús

43 Lichalí Jesús alh nac xapulatamán Galilea y antá t_atanoklhchá Felipe, y chiné huánilh:

—Caquistalani.

44 Amá Felipe xalac Betsaida xuanit antá ná ní xtahuilananchá Andrés y Pedro. **45** Felipe lalihuán alh putzay Natanael y chiné huánilh:

—Cucxilhnitáhu amá chixcú huantí titalichuhuínalh xalakmakán profetas xahua Moisés, xlá huanicán Jesús xkahuasa José xalac Nazaret.

46 Natanael kalhtínalh:

—Nipara tzinú ccanajlay. ¿Lácu pi tl_an nataxtuyachá chatum talipáhu chixcú nac Nazaret?

Pero Felipe chiné huanipá:

—Pus catat ucxilha laqui nacanajlaya.

47 Acxni úcxilhli Jesús pi xlaktalacatzuhuima Natanael, chiné huá:

—Anú min chatum chixcú huantí xlicána luu mininiiy litapacuhuiy israelita porque nipara caj chunatá limasiyuma.

48 Entonces Natanael kalhásquilh:

—¿Lácu quililakapasa?

Jesús huánilh:

—Aquit púlh cucxilhni acxní xyát nac xtampín xaquihui higo, acxní niä xtasaniyán Felipe.

⁴⁹ Entonces Natanael huánilih:

—Mákalhtahuakená, ixlicána huix Xkahuasa Dios, huix amá rey huánti xlimínit xuanít laqui nacámapeksiy huánti xalac Israel!

⁵⁰ Jesús kálhtílh:

—Huix quincanajlaniya caj xlacata cumu cuanín pi púlh aquit cucxilhni acxní xyát nac xtampín xaquihui higo. Pus namín quilhtamacú acxní naucxilha huix ątzinú laclanca tascújut huántu nactlahuay ni xachuná huántu káxpatti lanchú.

⁵¹ Jesús chiné huampá:

—Xlicána ccáhuaniyán pi nalakchán quilhtamacú acxní huixinín naucxilhátit pi laqui nahuán akapún y xángeles Dios tatactamánanchi y tatahuacamánpá nahuán xlacata naquintalakachixcuhiy aquit Xatalacsacni Chixcú.

2

Jesús an nac aktum putamakaxtokni

¹ Lituxama nac cachiquín huanicán Caná xmunicipio Galilea tlahuácalh aktum putamakaxtokni. Xtzí Jesús ná xanít. ² Nac putamakaxtokni ná xcaputzacanít Jesús xahua xtamákalhtahuakén. ³ Acxní tamakásputli xvinujcán huántu xtalikotnumáñalh, xtzí Jesús chiné huánilih:

—Niajtu xvinujcán huántu natahuay.

⁴ Jesús chiné kálhtílh:

—Mamá, ¿túcu xlacata aquit quilihuaniya? Pus aquit nílay túcu nactlahuay xlacatacán porque niā lakchán quilhtamacú lāta nactzucuy scuja.

⁵ Pero xtzí Jesús chiné cahuánilh huánti xtamacascujmánalh:

—Para lāta túcu xlá nacalimáscojujuyán, huák cakalhakaxpáttit.

⁶ Antá lacatzú xtahuilánalh pachaxán caj la tlámanclh xla chíhuix huántu xtamaclacasquín judíos acxní xtalakachixcuhiúnán; amá tlámanclh xtajuy māx cumu ochenta osuchí cien litros chúchut pátunu. ⁷ Jesús chiné cahuánilh macascujni:

—Cacalimástapátit chúchut tamákolh tlámanclh.

Y xlacán talimastápalh. ⁸ Jesús cahuanipá:

—Chú camácutútít actzú y calipinipítít huánti mapuxquicanít nac eé pupaxcua.

Xlacán chuná ttláhualh, ⁹ y acxní kalhuánalh amá chúchut la xatlán vino xuanít, ni xcatziy nícu xlimincanítanchá caj xmánuá macascujníñ xtacatziy, porque huá xlacán xtamácutunít amá chúchut. Y amá chixcú huánti xapuxcu tasacua tasánilh huánti xtamakaxtokma, ¹⁰ y chiné huánilh:

—Canihuá antanícu paxcuajnancán pulh huá xatlán vino tahuaniñancán, y acxní taputza lhu-huatá tahuaniñ, entonces ahuatá tahuaniñancán amá vino huántu ni luu xatlán. Pero chinchú huix ahuatá camáxquípat amá vino huántu tlak xatlán.

¹¹ Huá eé chúchut huántu lakpálilh Jesús nac Caná cxmunicipio Galilea, huántu luu pulh tláhualh lanca xtascújut, y huá umá tzúculh límasiyuy pi lanca xlacatzúcute y amákolh xtama-

kalhtahuakén tacanajlánih pi xlicána xlá Cristo huánti xminít cäläkmäxtuy.

¹² Acalistán Jesú斯 cätáalh xtzí, chu xítitalakapasni xahua xtamäkalhtahuakén nac aktum cächiquín xuanicán Čapernaum pero ni luu makás quilhtamacú antá xtalamänanchá.

Jesú斯 caputlakaxtukoy stānanín nac lanca xpūsiculan Dios huantū xuí nac Jerusalén

(Mateo 21.12-13; Marcos 11.15-18; Lucas 19.45-46)

¹³ Cumu aya xtalacatzuhuima xpaxcuajcán judíos xla taakspuntzalín, Jesú斯 alh nac xacächiquín Jerusalén. ¹⁴ Acxní tanuchá nac lanca pusiculan camanóklhulh nac xtanquilhtín huánti xtastamánalh huácacx chu borregos y palomas, xahua huánti antá xtahuilánalh tí xtalakpaliniy xtumincán cristianos. ¹⁵ Acxní cäúcxilhli Jesú斯 lihuana caxtláhualh kantum tasíhu y huá tzúculh cälítlakaxtuy pütum stānanín, nachuná xborregoscán, chu xuacaxcán; y huanti xtalakpaliy tumín camaakpuspítñilh xmesajcán y nac cätiyatni cataramínih xtumincán. ¹⁶ Huánti xtastamánalh palomas chiné cähuánih:

—Pütum tamá cacatamacxtútít uú y ni calimaxtútít xchic Quintlat cumu lą aktum püstán.

¹⁷ Amakolh xtamäkalhtahuakén talacapástaclí huántu huan lacatum nac likalhtahuaka antanícu chiné huan: “Xlihuak quinacú clilakcatzán mimpusiculan y ni cmatlántiy lata túcu nítlán antá tlahuacán.”

¹⁸ Makapitzín xanapuxcún judíos takalhásquillh:

—¿Túcuya lanca tascújut tlān natlahuaya huantū nacucxilháhu laqui naccatziyáhu pi xlīcāna kalhiya limapeksín xlacata huantū tlahu?

¹⁹ Jesús cákálhtílh:

—Calactlahuátit eé pūsiculan y caj aktutu quilhtamacú aquit naclahuaparay tunu xasasti.

²⁰ Entonces amākolh judíos tahuánih:

—Tipuxamachaxán cāta limakapalacanittá lāta tlahuamácalh eé lanca xpusiculan Dios, ¿nícu chū huix natzucuniya xlacata caj aktutu quilhtamacú nalitlahuaya tunu xasasti?

²¹ Pero xlacán nī taakátkasli porque amá pūsiculan huantū xlá xlīchuhuínama Jesús pus xlá xtiyatlíhua xuanima. ²² Pus acxnicú Jesús nīlh y lacastacuánalh nac calinín xtamakalhtahuakén talacapástaclí eé xtachuhuín y tacanájlalh porque luu chuná xquikantaxtunít cumu lā xcāhuaninít y nāchuná lā huan nac likalhtahuaka huantū tatzoktahuilanít xpālacata.

Jesús huak calakapasa chatunu cristianos

²³ Acxnī Jesús xlamāchicú nac Jerusalén cxapaxcua taakspuntzalín lhuhua cristianos tacanajlánih cumu taúcxilhli laclanca xtascújut huantū xlá xcatlahuama. ²⁴ Pero cumu xlá xcalakapasa chatunu lāta lácum xtapuhuancán nī huāk xcanajlay lāta túcu xlacán xtahuaníy. ²⁵ Xlā huāk xcalakapasa lāta lácum xlacán xtayatcán chatunu cristianos y pus Jesús nī xlacasquima para tícu nalitachu-huínán lāta lácum xlacán xtapuhuancán.

3

Nicodemo an lakapaxialhnán Jesús

¹ Xlama chatum chixcú fariseo xuanicán Nicodemo, xlá luú talipahu chixcú xuanit nac xlakstípāncán judíos. ² Maktum tzisní Nicodemo alh lakapaxialhnán Jesús y chiné huánilh:

—Mäkalhtahuakená, aquinín ccatziyáhu pi Dios macaminitán xlacata naquila makalchuhuiñiyáhu, porque nipara chatum tícu tlán màsiuy laclanca licácnit tascújut cumu la huix catlahuaya para ni huá Dios namaxquiy xlimakatlihueke.

³ Jesús huánilh:

—Xlicána cuaniyán que para tícu ni nalacachín amaktum nilay catiúcxilhli lácu Dios matzuquima xasasti xtapéksit nac caquiltamacú.

⁴ Nicodemo kalhásquilh:

—Pero, ¿lácu nalay nalacachín chatum chixcú para aya kolutá? ¿Lácu pi tlán natanuparay nac xpulacni xtzí laquí nalacachimparay amaktum?

⁵ Jesús kalhtipá:

—Xlicána cuaniyán, huanti ni nalilacachín chúchut xahua Espíritu Santo, nilay catimaktapéksilh huantu Dios tlahuama. ⁶ Porque amá cristiano huanti lacachín caj xlacata cumu xtzí y xtlat tamaxquiy xtiyatlihua, pus xlá chuná kalhiy xtalacapastacni cumu la uú xala caquiltamacú, pero huanti lilacachín Espíritu Santo pus xlá chuná kalhiy xtalacapastacni cumu la tu kalhiy Espíritu Santo. ⁷ Ni calipécuanti huantu cuanimán pero milicatzitcán pi Dios luu lacasquín pi huák cristianos natalacachín amaktum. ⁸ Eé huantu cuanimán xtachuná quítaxtuy acxní huix kaxpata märi macaacsanán un, pero ni catziya nícu pekama nipara nícu mimächá porque ni tasiuy, pus nachuná amäkolh cristianos huanti Dios

camaxquiy Xespíritu xahua xtalacapastacni, ni tasiyuy pero sásti cristianos tahuán porque xlicana talacachín amaktum.

⁹ Nicodemo kalhasquimpá:

—Luu ni cakataksa lácú luu naquitaxtuy tamá.

¹⁰ Jesús huánilh:

—Huix luu skalala y talipáhu chixcú uú xalac Israel, ¿y ni akataksa huántu cuanimán? ¹¹ Xlicana cuaniyán, aquit clítachuhuinamán huántu ccatziy y cmáluloka huántu cucxilhnít, pero huix ni canajlaya huántu aquit cuanimán. ¹² Para huixinín ni canajlayátit acxní ccalitakalhchuhui-nanán huántu anán uú nac caquilhtamacú, ¿pi lihuaca chú nacanajlayátit para naccalitakalh-chuhuinanán huantu anán nac akapún? ¹³ Nac akapún nití catziy túcu anán, caj xmán aquit Xatalacsacni Chixcú ccatziy túcu anán porque nac akapún cminitanchá. ¹⁴ Huixinín catziyátit xlacata maktum quilhtamacú nac desierto Moisés xtokohuácalh nac kantum quihui tantum luhua xla bronce y akachexyáhualh laquí huánti nataucxilha ni catínih, pus nachuná chú aquit Xatalacsacni Chixcú amácalh quixtokohuacacán, ¹⁵ laquí xlipacs huánti naquilipahuán ni catilatzánkálh huata luu tlán naquintalatamay canec-xnicahuá quilhtamacú.

Dios capaxquiy huak cristianos xala caquilhtamacú

¹⁶ 'Porque Dios luu snun capáxquilh cristianos xala caquilhtamacú, pus huá xpálaceata limacamástalh xmán chästum xkahuasa laquí nacapalacaní cristianos y chuná catihuá huánti

nalipahuán ni catilaktzánkālh, huata nakalhiy amá lipaxúhu latámät huántu necxni catilákspatl. **17** Porque Dios ni huá limacámilh Xkahuasa para caj namälaktzankenán, pus huá limacámilh laquí nalakmaxtunún. **18** Huánti lipahuán Xkahuasa Dios necxni catilaktzánkālh, pero huánti ni canajlaniy xtachuhuín ámaj patinán porque ni lipahuán amá huánti xmäñ huá chästum Xkahuasa Dios. **19** Huánti ni tacanajlaniy xtachuhuín ámaj patinán porque milh taxkáket nac caqüilhtamacú y xlacán atzinú talakátilh talatapuliy nac xacapucsua ni xachuná nac xacaxkakaná, laquí niti nacatziy para lixcájnit huantu xtalahuamánalh. **20** Putum huánti nitlán xtalacapastacnicán ni taucxilhputún taxkáket laquí ni natalitasiyuy xkasatcán y ni talaktalacatzuhuiy. **21** Pero huánti tlän xtalacapastacnicán talaktalacatzuhuiy taxkáket laquí natalitasiyuy pi Dios cäatalama y tlän huantu tatlahuamánalh.

Juan Bautista lichuhuinamparay Jesús

22 Acalistán Jesús cäatalh xtamäkalhtahuakén nac xamunicipio Judea y juerza makas tzinú antá xtalamananchá y antá xcäakmunuma cristianos. **23** Juan na antá xakmununuma nac Enón lacatzú nac Salim, porque antá lhühua xuí chuchut. Antá xtamín lhühua cristianos y xcäakmunucán. **24** Putum eé chuná quitáxtulh acxní nia xtamacnucán nac pulachín Juan.

25 Amá quilhtamacú xtamäkalhtahuakén Juan y chästum judío tzúculh taliaklhühuatnán xatícu atzinú tlän xapay xtaläkalhín acxní akmununún,

pi huá cahuá Jesús. ²⁶ Xlacán talákalh Juan y chiné tahuánilh:

—Mákalhtahuakená, amá chixcú huánti qui-laklán aliquilhtutu kalhtuchoko Jordán huánti huix xlíchuhuinámpat pi minitán quincalakmax-tuyán, chú na aya akmununuma y lhuhua cristianos tastálanimánlh.

²⁷ Entonces Juan chiné cahuánilh:

—Nipara chatum cristianos lay túcu kalhiy para ni huá Dios namaxquiy. ²⁸ Porque huixinín luu lacatancs kaxpatnítátit acxní chiné cuá: “Aquit ni Cristo huánti kalhipanántit.” Pus aquit amá chixcú huánti málakachácalh laqui nacpulaníy Cristo y alisok naccamácatziniy cristianos pi mimajá. ²⁹ Cumu la huixinín catziyátit, nac ak-tum putamakaxtokni amá kahuasa huánti táláhui tzumat pus huá tamakaxtokma, y amá chatum-litum huánti antá lacatzú láhui, xlá caj xamigo, y luu lipaxúhu kalhakaxmata huántu xlá líchuhui-nama; pus náchuná chú aquit luu clipaxuhuay cumu huák huá tastálanimánlh Jesús. ³⁰ Cháli cháli xlá atzinú lhuhua amácalh lipahuancán y luu atzinú talipáhu nahuán, y aquit niáj tu cacti-litáxtulh, huata cháli cháli cámaj lítatutzuhuiy.

Jesús nac akapún minitanchá

³¹ 'Amakolh cristianos huánti uú talacachinit nac caquilhtamacú, pus xlacán xmánuá tlán tali-chuhuinán huántu anán uú nac caquilhtamacú y huántu talakapasa. Pero huánti minitanchá nac akapún xlá atzinú kalhiy limapeksín y xtala-capastacni, y huá líchuhuinán huántu anán nac akapún porque xlá ni xtachuná cumu la catihuá

cristiano, ³² y huá xlá lichuhuinán huántu ucxilhniit y huántu kaxmatníit; y mäsqui chuná laṭa túcu xlá lichuhuinán niṭi cajanjalniy. ³³ Pero makapitzín cristianos huanti tacajanjalniy chuná xlacán tamaluloka nac xlatamatcán pi xlícána xtalaca-pastacni Dios huántu xlá lichuhuinama. ³⁴ Pus amá chixcú huanti Dios macámilh nac caqUILhtamacú laquí xlá naquincajimakalchuhuiníiyán xtachuhuín, xmanhuá xlá tlán lichuhuinán xtala-capastacni, porque Dios ni caj chalakcatzaj maxquinit Xespíritu. ³⁵ Quintlaticán Dios paxquiy Xkahuasa Jesucristo y laṭa túcu anán xlá huak macamaxquinit xlacata nacámapeksiy. ³⁶ Huanti lipahuán Xkahuasa Dios maklhtinán amá lipaxúhu latámat huántu ankahlíná cahuá nakalhiy, pero huanti ni kalhakaxmatputún xlacata nalipahuán, xlá necxni catikálhilh amá latámat sinoque fuerza ámaj patiy amá lipecuánit tapatín chuná la Dios laclhcahuilníit.

4

Jesús tachuhuinán chatum puscat samaritana

¹ Ni limakas quilhtamacú amakolh fariseos tacátzilh pi atzinú lhuhua cristianos xtastalani-mánalh Jesús, xahuachí atzinú lhuhua xakmununu-numa ni xachuná Juan, ² (mäsqui xlícana pi ni huá Jesús xcakmunuy cristianos, pus huata xtamakalhtahuakén xtaakmununún). ³ Pero cumu Jesús xcatziy pi xtasitziniy y cátzilh pi chuná xtali-lacchuhuinamánalh fariseos, huata mejor tácaxli nac Judea laquí naán nac Galilea.

⁴ Pero amá tiji huantu xan nac Galilea antá xtítaxtucán nac xapulataman Samaria. ⁵ Jesús chalh nac aktum cächiquín xalac amá municipio xuanicán Sicar, lacatzú nac amá púcuxtu huantu xmapeksiy xamakán kolutzín Jacob huantu xakataxtuninit xkahuasa José. ⁶ Antá nac amá púcuxtu xuí aktum pozo huantu xpuhuaxnit kolutzín Jacob. Max cumu luu tastúnut xuanit y cumu luu marí xchichinima Jesús xmakatlakuanittá tiji, pus huata xlá antá táhui nac xquihpán pozo. ⁷⁻⁸ Amakolh xdiscípulos Jesús xtaanit nac cächiquín laqui natatamahuay huantu natahuay, y caj lipuntzú chilh nac pozo chatumpuscat xalac Samaria laqui namacutuy chúchut. Y Jesús chiné huánilh:

—Xquintahua actzu minchúchut.

⁹ Pero amá puscat samaritana chiné kálhtilh:

—¿Túcu xlacata aquit quilisquiniya chúchut lác[u] pi na judía aquit? Pus aquit antá xalac Samaria.

Huá chuná lihuánilh porque judíos ní xtatalalén Samaritanos. ¹⁰ Jesús chiné kálhtilh:

—Xlicána para catziya cahuá huantu Dios mastay y xáhuachí para xcatzi tícuya chixcú huantu squinimán chúchut, tancs cuaniyán pi huata xquisquini chúchut y aquit xacmaxquín chúchut huantu xlicána mastay latámat.

¹¹ Amá puscat chiné huánilh:

—Pero nipara xlimacutucán chúchut kalhiya y chinchú umá pozo luu pulhmán, ¿lácu chú natlahuaya laqui tlan naquimaxquiya amá chúchut huantu xlicána mastay latámat? ¹² Umá chúchut huantu tajuma nac eé pozo xlicána pi luu tlan porque huá xamakán quilitalakapasnicán Jacob

huánti quincámakxtekninitán; antá xlá xkotnún xáhua xlípac s xcamanán chu xlíhuak xtakalhín antá xcáma koteniy. ¿Chinchú huix pi atzinú luu tlak talipáhu lítaxtuputuna ni xachuná xlá?

13 Jesús chiné kálhtílh:

—Xlipútum huánti talíkotnún eé chúchut ni limakas tzucuparay takalhpútiy, **14** pero huánti nalikotnún amá chúchut huántu aquit cmástay ni aj nécxnicú catikalhpútilh. Porque amá chúchut huántu aquit cmástay, antá nac xnacú natzucuy mu snún laquí chuná nakalhiy xasasti latámát canécxnicahuá quilhtamacú.

15 Amá puscá t chiné huánih:

—Pus luu catlahua lítlán caquintalíkótnunti tamá chúchut laquí ni aj nackalhpútiy y laquí ni aj nacmín tiyay chúchut uú nac pozo.

16 Jesús chiné huanipá:

—Huata mejor pulh caquitasaní mintákolú y acxtum natatana.

17 Amá puscá t chiné huánih:

—Aquit ni t quintákolú.

Y Jesús kálhtílh:

—Luu xlicána la huana pi ni t mintákolú, **18** porque aya xlíkalhaquitzis lacchixcuhuín huánti huix catitatahuila, y huánti tahuilán lanchú ni mintákolú. Poreso luu xlicána huántu huix chuhuijanita.

19 Acxní amá puscá káxmatli eé tachuhuín chiné huánih:

—Pus hasta lanchú ccatzima pi huix luu lanca talipahu profeta. ²⁰ Pus xtlahua lítlán xqui-huani aktum tachuhuín huantü aquit ccatzi-putún; xalakmakán quilitalakapasnicán samari-tanos xtamín talakachixcuhiy Dios nac eé kestín, pero huixinín judíos huanátit pi antá nac Jerusalén nalakachixcuhiyáhu Dios.

²¹ Jesús kálhtilh:

—Puscat, cacatzi huix lanchú pi talacatzuhuima quilhtamacú acxní huixinín tlän nalakachixcuhiyátit Quintläticán Dios mäsqui ni catátit uú nac kestín y mäsqui ni capítit nac Jerusalén. ²² Huixinín samaritanos nipara tzinú catziyátit tícu luu lakachixcuhiyátit pero aquinín judíos cca-tziyáhu huantí clakachixcuhiimanáhu, porque huantí nacalakmaxtuyán antá mimächá nac xlak-stipancán judíos. ²³ Pero ámaj lakchán quilhtamacú y lanchú aya lakchanit acxní huantí xlícaná talakachixcuhiyputún Dios tlän canihuá natatlahuay, pero huantü luu xlícaná akstítum cumu lá nacamalacapastacniy Espíritu Santo, porque Dios caputzama huantí natalakachixcuhiy cumu lá cuanimán. ²⁴ Dios caj Espíritu y ni caj lacatum huí cumu lá huixinín lacpuhuanátit, y qamá cristi-an huantí nalakachixcuhiy mininiy nalilaka-chixcuhiy xlíhuák aktum xatlán talacapastacni y huantü luu akstítum cumu lá Xespíritu Dios namälacapastacniy nac xnacú.

²⁵ Amá puscat chiné huánih:

—Aquit ccatziy pi ámaj min chatum huantí quincamalacnuninitán Dios laquí naquincalakmaxtuyán huantí huanicán Cristo, y acxní xlá namín

huäk naquincämälacaputuncuhuiniyán huäntü luu quilicatzítcán.

²⁶ Jesú huanipá amá puscat:

—Pus lanchú luu lacatancs cuaniyán pi aquit amá chixcú huantí huix lichuhuinámpat.

²⁷ Acxnitiyá chuná xtachuhuínamánalh tachilh xdiscípulos, xlacán cacs talacáhua acxní taúcxilhli Jesú pi xtachuhuínama amá puscat samaritana. Pero nipara chatum xkalhásquilh túcu xlacasquín osuchí túcu xtalichuhuínamánalh.

²⁸ Y amá puscat antá akxtekuílh xaksáhuat y lalihuán alh nac cächiquín, y antá chiné cahuánilh cristianos:

²⁹ —Catátit ucxilhátit chatum chixcú, xlá luu lacatancs quihuaninit laṭa túcu aquit ctitlahuanitá nac quilitámat. ¿Lácu huanátit, ni huá cahuá Cristo huantí namín quincälakmáxtuyán?

³⁰ Amakolh cristianos lalihuán taminchá nac cächiquín y táalh antanícu xuilachá Jesú. ³¹ Y antá nac pozo xdiscípulos Jesú tzúcuhl talimäktanzkey laquí nahuayán y chiné xtahuanimána:

—Makalhtahuakená, cahuáyanti masqui caña caj actzú.

³² Pero xlá chiné cákálhtilh:

—Aquit aya ckalhiy huantü nacuay y huixinín ni lakapasátit.

³³ Y xdiscípulos sacstucán chiné tzúcuhl tala-huaniy:

—¿Max tzanká tícu límínilh para túcu nahuay?

³⁴ Pero Jesú cahuánilh:

—Acxní aquit ctlahuay xtapaxuhuán Dios lámpara quintahuaj clímaxtuy hasta acxní nacmasputuy. ³⁵ Acxní huixinín ucxilhátit

xtahuácat tachanán huanátit: “Masqui ni luu calacapaláhu porque tzankaycú aktati papá lata tlán naxkñancán”; pero aquit ccahuaniyán pi calacapítit y ná cacäucxíltit antanícu huilakolh atúnuj tachanán, antá aya lhmucucumakolh y tláná natzucuyátit xkananátit. ³⁶ Pus huixinín huantí namakxkanañátit nac eé cätuahuán ná nacamáskahuijanátit y amá huantú namamacxtupiyátit huá xlistacnicán cristianos huantí ankalhíná cahuá takalhiy lipaxúhu latámat. Huí tunu huantí tachanít eé tachanán y huixinín chú pimpátit mamacxtupiyátit laquí acxtum nalipaxuhuayátit. ³⁷ Y luu lacatancs chuná caquitaxtunimán amá tachuhuín huantú chiné huan: “Túnuj chixcú huantí chananán y tunu huantí xkanán.” ³⁸ Aquit ccamálakachamán huixinín laquí namamacxtupiyátit xtahuácat amá tachanán huantu tachanit atúnuj lacchixcuhuín; pus tunu huantí taliscuñít y chinchú huixinín cata caj mamacxtupiyátit huantú xlacán taliscuñít.

³⁹ Lhuhua cristianos huantí xtahuilánalh nac amá cächiqún huanicán Šicar talákmilh antaní xuí Jesús porque tacanajlánih caj xpalacata huantú xuaninít amá puscát acxní xlá cahuánih xlacata pi xuaninít xlíhuák huantú xlá xtitlahuanittá nac xlatámat. ⁴⁰ Acxní amakolh samaritanos talákchilh Jesús tatachuhuínalh y tahuánih xlacata cacatamatákxtekli nac xcächiqüincán caña caj nícu aklit quilhtamacú. Xlá matlántilh y cätatamatákxtekli aktiy quilhtamacú, ⁴¹ y luu lhuhua cristianos talipáhualh acxní takaxmátnih xtachuhuín

huántu xlá xlíchuhuináma. ⁴² Acalistán chiné tahuánilh ámá puscát:

—Chú aquinín ná ccenajlayáhu ni xlacata cumu para caj huix quilaítachuhuinanitáhu sino porque mismo man quintakencán aquinín clikaxmatnítáhu y chú aquinín ctalulokáhu pi xlícaña huá Cristo xmaakaputaxtinacán cristianos.

Jesús matlantiy xkahuasa chatum xapuxcu mapeksiná

⁴³ Aliaktiy quilhtamacú acxni aya tacaxli Jesús nac ámá cachiquín huántu xmapeksiy Samaria y quilhtayapá xtiji laqui nachán nac xapulatamán Galilea. ⁴⁴ Masqui xapulh chuná tíhua Jesús xlacata pi chatum profeta ni lipahuancán huántu lichuhuinán nac xcachiquín, ⁴⁵ pero xlícaña pi ni ankalhín chuná quitaxtuy porque acxni chalh nac lactzú cachiquín huántu xcamapeksiy Galilea canihuá luu lipaxúhu tamakamaklhtinalh, porque lhuhua xlacán ná xtaquilanit nac xapaxcua taakspuntzalín nac Jerusalén, y amäkolh cristianos huák xtaucxilhnit huántu antá Jesús xcatalahuanit laclanca licácnit tascújut.

⁴⁶ Pero huata Jesús ampá nac aktum cachiquín huanicán Caná, antá nac umá cachiquín caj chúchut luu xatlán vino litlahuanit. Y antá manókhulh chatum luu talipahu chixcú huánti ná luu lacxtum xtamapeksinán rey, xlá antá xuilachá nac Capernaum y xkalhiy chatum xkahuasa huánti luu xtataatlay. ⁴⁷ Acxni cátzilh ámá chixcú pi Jesús xminitanchá nac Judea y xchinít nac Galilea, lajihuán alh limaakatzankeý xlacata catáalh nac

xchic y camatłantínilh xkahuasa porque ątzinú aya xniputún.

48 Jesús chiné huánilh:

—Huixinín ni luu quilalipahuanáhu para ni pulh naucxihilhátit aktum luu licácnit tascújut huántu ctlahuay.

49 Pero ąmá talipáhu chixcú chiné huánilh:

—Makalhtahuakená, luu xlicana catlahua lítlán, pála caquintápi nac quínchic líhuán nią niy quinkahuasa.

50 Pero huata Jesús chiné huánilh:

—Luu lipaxúhu capit nac míñchic porque ąmá minkahuasa aya tatłantinít.

Amá chixcú cajálalh huántu huánilh Jesús y lajihuán alh nac xchic. **51** Acxní aya xchantilhay nac xchic lajihuán támilh tapaxtoka makapitzín xtasacuán, y chiné tahuánilh:

—Minkahuasa aya tatłantinít y luu tlən má.

52 Xlá cajkalhásquilh cumu túcuya hora tzucunit tatłantiy ąmá kahuasa; xlacán chiné tahuánilh:

—Kotán, max cumu cajaktum hora xuanit acxní mákxtekli lhcúyat.

53 Amá chixcú ná lacapástaclí pi huatiyá ąmá hora acxní Jesús huánilh: “Minkahuasa aya tatłantinít.” Y ąmá chixcú lipáhualh Jesús xahua xlipütum huánti xalac xchic ná talicānajlánilh caj xpälacata huántu tláhualh.

54 Pus huá chú eé xliaktiy laclanca licácnit xtasújut huántu tláhualh Jesús acxní quitalákspitli nac Judea y chimpá nac Galilea.

5

Jesús matlantiy chatum chixcú huanti nilay xtlahuán

¹ Ni limakas quilhtamacú amakolh judíos tatalhuapá aktum paxcua nac Jerusalén y Jesús ná alh nac paxcua. ² Nac lacatum málacchi antanícu xlactanucán nac amat cachiquín xuanicán Puerta de las Ovejas, antá lacatzú xuí aktum musni nac xatachuhuín hebreo xuanicán Betzata, y antaní xlactanucán kanquitzis arco huantú lihuana xlachipayahuanit. ³ Antá nac xtampín xtamánalh lhuhua cristianos huanti xtakalhiy latachá túcuya tajátat: huinti lakatzín, makapitzín nilay xtatalhuán y nachuná huanti xtalacluntuhuananit; xlacán xtakalhimánalh acxni natanankatla chúchut. ⁴ Porque huancán pi mat ni xmakásni xtactayachi chatum ángel nac amat musni y xlaknankatla chúchut y huá chú ti pulh natajuyachá nac chúchut pálaj tuncán natatlantiy masqui latachá túcuya tajátat xkalhiy. ⁵ Pus antá xuí chatum chixcú xlá aya xlema xlipuxamacutzayán cäta lata xtatatlay. ⁶ Acxni úcxilhli Jesús pi antá xmá amat chixcú y cátzilh pi makásá quilhtamacú lata xlá xpatima, pus huá chiné likalhásquilh:

—¿Lácu pi tatlantiputuna?

⁷ Amá tätatlá kalhtínalh:

—Pero nití huanti naquimajuy nac musni acxni tanankatla chúchut. Lata makatunu ctajuputún túnuj tuncán huanti tajuparay.

⁸ Pero Jesús huánilh:

—Cataqui, casacti mixtícat y catláhuanti.

⁹ Acxni tuncán amá chixcú tatlántilh lalihuán, sacli xputama y tzúculh tlahuán. Pero cumu sábado xuanit amá quilhtamacú xlíhuancán para tícu nascuja, ¹⁰ y nac tiji makapitzín judíos huantí taúcxilhli pi xcucanit cxtícat chiné tahuánilh:

—Lanchú eé quilhtamacú caj luu jaxcán y ni milicúcat mixtícat.

¹¹ Pero amá chixcú chiné cakálhtilh:

—Huantí quimatlántilh quihuánilh: “Casacti mixtícat y catláhuanti.”

¹² Xlacán takalhasquimpá:

—¿Tícu amá chixcú huantí huanín: “Casacti mixtícat y catláhuanti”?

¹³ Cumu amá chixcú ni xcatziy tícu xmatlantinít, porque Jesús xcalakstipatanunít antanícu luu lhuhua xtalayánalh cristianos, nitú kalhtinalh. ¹⁴ Acalistán Jesús manoklhuchá nac lanca pusiculan y chiné huánilh:

—Chú luu tlán cumu aya tatlántinít, pero chú niaj catlahua talakalhín cumu la xtlahuaya xapulh laqui niaj nachipayán amá luu atzinú xalipecuánit tajátat.

¹⁵ Cumu amá chixcú aya xcatziy tícuya chixcú huantí xmatlantinít huata xlá lalihuán alh cahuaniy xanapuxcun judíos pi huá Jesús xuanicán amá chixcú huantí xmatlantinít. ¹⁶ Caj huá xpalacata amakolh mapeksinanín judíos xtaputzamánalh Jesús xtamakniputún cumu xlá xcatlahuay laclanca licácnit tascújut acxni xlakchanit quilhtamacú sábado y nitícu scuja. ¹⁷ Pero para tícu xkalhasquín Jesús túcu xlacata chuná xtlahuay, chiné xkalhtiy:

—Dios huantí luu xlicána Quintlat, ankalhiná scujma y nipara aktum quilhtamacú jaxa, y nachuná chú aquit ankalhiná cscujma.

¹⁸ Huá xlacata amakolh judíos luu xtalimakni-putún, ni caj cumu para ni xcacninaníy amá quilhtamacú acxní jaxcán, sinoque porque xlá ná luu Dios xlitapulhcay acxní xuan pi huá luu xtlat.

Cumu Jesús Xkahuasa Dios kalhiy limapeksín

¹⁹ Jesú斯 ná chiné cahuánilh amakolh xanapuxcun judíos:

—Xlicána aquit Xkahuasa Dios y luu lacatancs ccahuaniyán pi nilay túcu tlahuay huantú caj questu quilacata, huata caj xmanhuá tlahuay huantú cucxilha tlahuay Dios porque huá quintlat. Xlihuak huantú tlahuay Dios, cumu aquit Xkahuasa, pus ná huá tlahuay.

²⁰ Dios luu xlicána quimpaxquiy porque aquit Xkahuasa y quimasiyuniy lata túcu xlá tlahuama, y naquintimasiyuniycú atzinú tlak laclanca tascújut huantú aquit naclahuay y huixinín luu nacamaxkeklhayán. ²¹ Pus chuná cumu la Dios camála castacuaníy nin y camaxquiy latámat, pus nachuná chú aquit ná nacmaxquiy latámat huantí aquit nacmaxquiputún. ²² Dios quintlat niți maxokoníy xtalakalhín sino aquit Xkahuasa quimaxquinít limapeksín xlacata aquit naccasquiniy cuentaj xpalacata xtalakalhincán cristianos. ²³ Y cumu chuná lachlacahuilinit xlacata xlipacs cristianos naquintacacninaníy aquit Xkahuasa cumu la cacañinanicán Dios huantí luu quintlat, huantí ni quincacacninaníy

aquit Xkahuasa Dios ná ni xlicana cäcninanima quintlat huánti quimalakachanit.

24 'Xlicana ccahuaniyán pi huánti quinkaxmatniy huantú cliakchuhuinama y nachuna lítum chú lipahuán huánti quimalakachanit, xlá mak-lhtinán latámat xasásti huantú ankalhíná cahuá nakalhiy, y niáj necxni catimapatinica xpälacata xtalaikalhín, pus xlá titaxtunit nac xatiji calinín y aya tzucunít chú lactlahuán nac xatiji latámat. **25** Xlicana ccahuaniyán pi lakcháma quilhtamacú y lanchujá aya lakchánit acxní amakolh huánti aya taninit natakaxmata xtachuhuín Xkahuasa Dios, y huánti natakaxmatniy huantú xlá nahuán natakalhiy latámat. **26** Porque chuná cumu la Quintlat Dios sacstu kalhiy litlilhueke xlá mastay látamat porque lanca xlacatzúc, pus nachuná chú cumu aquit Xkahuasa quimaxquinit litlilhueke laqui nacmastay eé latámat. **27** Nachunalitum quimaxquinit amá litlilhueke laqui aquit naccatatlahuay taxokón cristianos caj xpälacata xtalaikalhincán, porque aquit xlicana Xatalacsacni Chixcú. **28** Ni calilipuhuántit caj xpälacata huantú ccahuanimán, porque luu xlicana ámaj lakchán quilhtamacú acxní xliputum nin naquintakaxmatniy quintachuhuín, **29** y chatunu chatunu natatacxtuyáchi antanícu xcämäcnucanit. Huánti tlán xuanit xtapuhuancán natalacastacuanán nac calinín laqui natakalhiy lipaxúhu latámat, pero huánti luu nitlán xtapuhuancán xtahuanit xlacán natalacastacuanán nac calinín laqui nacamaxokonicán xlihuak huantú nitlán tatiyahuanit.

Jesús masiyuy pi xlícaná kalhiy límapeksín

30 ’Aquit nilay túcu ctlahuay huántu caj quecstu quilacata, huata acxní aquit ccaputzánaniy cristianos huántu nítlán tatlahuanit luu xtalulóktat quintaputzán porque chuná ctlahuay cumu la quílimapeksínít Quintlat huánti quimacaminít.

31 Pus para aquit caj quecstu xactalánquih nac xlacatín cristianos, luu lacatancs pi nitú xlímacua quintachuhuín y tlán ni xcanajlátit. **32** Pero huí chatum huánti quimálanquiy y quintatayay y aquit stalanca ccatziy pi huantu xlá huan caj quimpalacata licanájlat porque xlícaná. **33** Huixinín quimákalhasquininántit Juan Bautista caj quimpalacata y huántu xlá kalhtinanchá luu lacatancs. **34** Pero aquit ni clilacán para túcu nahuán chatum chixcú caj quilacata, osuchí para túcu namásiyuy; huata aquit caj ccamálapapas-tacamán Juan laquí tlán naquilalipahuanáhu y namáakaputaxtiyátit milistacnicán. **35** Amá xta-chuhuín Juan Bautista litáxtulh cumu la límaksko laquí xlá nacamaksconiyán, y huixinín luu aktum tapaxuhuán makamaklhtinántit xtaxkáket, pero ni luu makas quilhtamacú. **36** Juan mástalh talulóktat xlacata pi Dios quimacaminít pero huilapá chú huántu átzinú nacamáluokniyán ni xachuná xtachuhuín Juan, pus huá cuanima amá quintascújut huántu aquit ccatlahuay. Pus pütum eé huák huatiyá huántu quílimascujunít Quintlat laquí nacmákantaxtiy, pus caj eé tascújut xlícaná litasiyuy pi huá Quintlat Dios quimacaminít. **37** Y nachuna litum huatiyá amá Quintlat huánti quimacaminít aya mastanít talulóktat caj quilacata,

masqui chá huixinín n̄ecxni a kaxpatátit xtachu-huín y n̄ipara maktum q̄ ucxilhátit. ³⁸ Pero huá lilay cumu xtachu-huín niā chan nac minacujcán, y porque n̄i quilaçanajlaniyáhu pi xlicana huá Quintlat Dios y huá quimacaminít. ³⁹ Huixinín luu ankallhiná l̄ihuana l̄ikalhtahuakayátit xtachu-huín Dios huántu tatzoktahuilanit nac l̄ikalhta-huaka porque huixinín lacpuhuanátit pi antá tl̄an namaclayátit xlaktáxtut milistacnicán, pero n̄ilay akatäksátit pi aquit amá huánti l̄ichuhuínama xtachu-huín Dios huánti nacamaxquiyán huántu putzapátit. ⁴⁰ Huá chú xpälacata huixinín n̄i quila-laktalacatzuhuiputunáhu laqui nakalhiyátit amá laktáxtut nac milistacnicán.

⁴¹ Aquit n̄i cputzay para tícu xqui-huánih pi xli-cana quila-pahuán, ⁴² porque aquit ccalakapasán y ccatziy pi n̄i kalhiyátit xtapáxquit Dios nac mina-cujcán. ⁴³ Aquit cminitanchá nac xpaxtún Quintlat laqui chuná tl̄an naclíchuhuínán xtachu-huín, pero huata huixinín n̄i quila-pahuanáhu; pero para tícu xcalakmín huánti caj sacstu xlichuhui-nánca huata huá luu pála xcana-jlanít y xmaka-maklhtinántit. ⁴⁴ Huixinín luu laka-tiyátit para tícu nacamatlantiniyán huántu tlahuapátit, pero n̄ipara tzinú lacputzayátit lácu nalaktzaksayátit xtapéksit Dios. Huixinín n̄ilay cana-jlayátit quin-tachuhuín porque caj luu xmánuá putzapátit huántu ccahuanimán. ⁴⁵ Pero n̄i calacpuhuántit para aquit naccamála-capuyán nac xlacatín Dios, huí xlá tunu huánti chuná natlahuay, huá Moisés porque huixinín huanátit pi huá l̄ipahuanátit xtachu-huín pero n̄i xlicana. ⁴⁶ Pus para xlicana

huixinín xcānajlátit huántu Moisés tichuhuínalh y títzokli nac xlibro, nā xquilacanajlaníhu aquit, porque nac xlibro chuná tzokli laṭa lácu aquit xacámaj latamay. ⁴⁷ Pero cumu nī luu xlicana canajlayátit huántu xlá tzoknít, ¿pi lihuaca chū nacanajlayátit huántu aquit ccāhuanimán?

6

*Jesús camahuiy akquitziis mīlh cristianos
(Mateo 14.13-21; Marcos 6.30-44; Lucas 9.10-17)*

¹ Acalistán Jesús alh aliquilhtutu pupunú xalac Galilea, osuchí xalac Tiberías porque huintí chuná xtalimapacuhuiy. ²⁻³ Y acxní antá chālh talacacxtutáhui nac aktum kestín y antá culucs cātatáhui xdiscípulos. Pero antanícu xan Jesús luu lhuhua cristianos xtastalaniy porque xtalakatiy xtaucxilha laclanca xtascújut huántu xlá xcālimalacahuaniy acxní xcāmatlantiy tatatlanín. ⁴ Xahuachí niaj luu makas quilhtamacú xtzankay laṭa nalakchán xpaxcuajcán judíos xla taakspuntzalín. ⁵ Huata acxní Jesús calaklácalh úcxihli pi luu lhuhua cristianos xtatalacatzuhuimánalh antanícu xlá xuí. Entonces chiné huánih Felipe:

—Felipe, ¿nícu natamahuayáhu lhuhua caxtilánchahu laquí nacatāhuayanáhu pütum umäkolh cristianos?

⁶ Jesús caj chunatá huánih laquí naliucxilha lácu xlá nahuán, porque xlá luu lacatancs xcatziyá huántu xámaj tlahuay. ⁷ Felipe chiné kálhtilh:

—Masqui luu aktiy ciento denario tumín xlitamahuáhu caxtilánchahu nī catiáccchálh laquí nacalimahuiyáhu pütum umäkolh cristianos.

8 Chatumlitúm xdiscípulo xuanicán Andrés xta_ñSimón chiné huánilh:

9 —Uú ná minit chatum kahuasa, xlá límín macquitzis caxtilánchahu xahua tantiy squiti, pero ¿túcu chú nataliuxhilha pütum umakolh cristianos?

10 Pero Jesús chiné cahuánilh:

—Cacahuanítit amakolh cristianos laqui huak natatahuilay.

Cumu nac amá kestín lan xuí licúxtut antá tatáhui max cumu akquitzis mílh cristianos.

11 Jesúc cachípalh caxtilánchahu, paxcatcatzínih Dios, lakchékelh, y camáxquih xdiscípulos laqui xlacán nacamáakpitzin y xliputum cristianos huantí antá xtahuilánalh. Y nachuna litúm catláhualh amakolh tantiy squiti, y huak camaxquícalh lata lácua xlacán tahuapútulh.

12 Acxní aya lan xtakasnít, Jesúc chiné cahuánilh xtamákalhtahuakén:

—Chú camámacxtupítit caxtilánchahu huantú akatáxtulh laqui nitúcu nalaktzankay.

13 Xlacán tamámacxtúmilh y tamatzámalh pacuti y canasta xatalakcheketamán caxtilánchahu. **14** Xlihuak cristianos acxní taúcxilhli eé lanca licácnit tascújut huantú Jesúc tláhualh, chiné taquilhtzúculh:

—Xlicana huá eé profeta huantí xlimínit xuanit nac caquilhtamacú.

15 Pero cumu Jesúc cátzilh huantú xlacán tzék xtaquilhuamánalh xlacata natalén alifuerza laqui

xreycán natatlahuay huantí nacapuxculén huata mejor xlá tatampūxtupá y sacstu talacacxtupá ątzinú xatalhmán ąmá kestín laqui nitícu namaqatzankeý.

*Jesús kalhtlahuán pupunú
(Mateo 14.22-27; Marcos 6.45-52)*

¹⁶⁻¹⁷ Acxní aya tzúculh caşmalankán, xdiscípulos Jesús tatakalhutahuilachi nac xquiltún pupunú. Pero cumú chú aya xcäpucsuanit y Jesús ńinaj a xquitaspita, huata xlacán tatájulh nac aktum barco y tzúculh tamatlahuaniy laqui antá natachán nac Capernaum. ¹⁸ Pero nípara makás tzúculh үnún y lipecua tzúculh tkeyahuay pupunú. ¹⁹ Max aya xtaanittá cumu akquitzis osuchí akchaxán kilómetro acxní taúcxilhli pi Jesús xlaktalacatzuhuima barco xlá xkalhtlahuantilhay pupunú; huata xdiscípulos ní xtalakapasmánlh y luu län tapecuáxnilh. ²⁰ Pero xlá chiné cahuánih:
—¡Ní capecuántit, porque aquit Jesús tacamachá!

²¹ Xlacán takálhilh licamama y tatatájulh nac barco; luu acxnitiyá aya táchalh antanícu xtaamánlh.

Luu lhúhua cristianos taputzamánlh Jesús

²² Lichalí lacatzisa, amakolh cristianos huantí xtamatamaktekñitanchá aliquilhtu pupunú xtacatziy pi xdiscípulos xtapanit xmán huantú xuí aktum barco pero na xtacatziy pi Jesús ní xcatanit. ²³ Masqui acalistán túnuj barco antá taminchá nac aktum cachiquín huanicán Tiberías y antá xtahuilána nac chúchut lacatzú antaní Jesús

xmälhujuinít caxtilánchahu acxni puhl paxcat-catzínih Dios amá xtahuá. ²⁴ Acxni amakolh cristianos taúcxilhli pi niti xlama antá Jesús nípara xdiscípulos, huata lalihuán tatájulh nac barco y táalh taputzay nac Capernaum.

Jesús huá luu xlicana tahuá huantu maxquiy latámat quilistacnicán

²⁵ Acxni xlacán táchalh aliquilhtuán pupunú antá tamanóklhulh Jesús y chiné takalhásquilh:

—Mäkalhtahuakená, ¿nícocxni chitá uú?

²⁶ Jesús cakálhtilh:

—Lihuana cakaxpáttit huantu naccáhuaniyán: huixinín quila putzamáñáhu porque kótán lan huayántit y lan kástit, pero ni huá quila liputzamáñáhu laqui naquila lipahuanáhu acxni úcxilhátit ccatlahuay laclanca quintascújut. ²⁷ Ni caj luu huá caliscuitamakántit xtahuá mimacnicán huantu laksputa, huata mejor huá caliscújtit xtahuá milistacnicán huantu necxni laksputa laqui chuná nali-latapayátit cxpaxtún Dios canecxnicahuá quilltamacú. Aquit Xatalacsacni Chixcú tlán nacmaxquiyán amá tahuá, porque Quintlat Dios luu caj huá quiliacsacnít laqui chuná naccamaxquiyán.

²⁸ Xlacán chiné takalhásquilh:

—¿Túcu quilitlahuacán laqui nacmäkantaxtiyáhu huantu Dios lacasquín naclahuayáhu?

²⁹ Jesús cakálhtilh:

—Huantu xlá lacasquín Dios natluahuayátit, caj xman cacanajlanítit huanti xlá macaminít.

³⁰ Pero xlacán takalhasquimpá:

—¿Túcuya licácnít tascújut natluahuaya laqui nacliucxilháhu pi xlicana Dios macaminítán, y

laquí chuná tlən naccacanajlaniyán? ¿Lácu pi tlən macataxtuca əmá laclanca tascújut huantü titlá-hualh Moisés? ³¹ Porque xalakmakán quilitala-kapasnicán titáhualh əmá tahuá huanicán maná antá nac desierto chuná cumu la tatzoknit nac likalhtahuaka: “Dios cámáxquih laquí natahuay caxtilánchahu xalac akapún.”

³² Jesús chiné cákálhtilh:

—Luu xlicana tancs ccahuaniyán pi ni huá Moisés cámáxquín əmá caxtilánchahu xalac akapún, huá Quintlat xuanit, y huata huá Quintlat huanti tlən nacámáxquiyán huantü luu xaxlicana caxtilánchahu xalac akapún. ³³ Porque amá caxtilánchahu huantü Dios mastay pus huá amá huanti tactanitanchi nac akapún laquí nacámáxquiy latámat cristianos huantü necxni laksputa.

³⁴ Amakołh lacchixcuahuín chiné tahuánihilh:

—Quimpuchinacán, catlahua litlán xlianka-lhiná caquilmáxquihu əmá caxtilánchahu.

³⁵ Jesús chiné cahuánihilh:

—Aquit əmá caxtilánchahu huantü mastay xaxlicana latámat. Amá cristiano huanti quilakmín y quilihuayán, niaj necxni catítzincsli, y huanti luu quincanajlaniy niaj necxni catikalhpútilh.

³⁶ Pero cumu chuná la ccahuaininá, huixinín ni quilacanajlaniputunáhu məsqui aya ucxilhnitátit huantü aquit ctlahuay. ³⁷ Lata xlihuak cristianos huanti quimaxquinít Quintlat laquí naquintalipa-huán huák quintalakchín laquí ankalhiná naquintastalaniy; y latachá tícu aquit naquintalakmín ni cactilakmákalh. ³⁸ Xahuachí aquit cminit nac caquilhtamacú laquí nacllahuaniy xtapaxuhuán

Quintlat huánti quimacaminít, y ni caj huá clíminít laquí naactlahuay huantú caj quecstu quin-tapaxuhuán. ³⁹ Huantú xlá xtapaxuhuán Quintlat huánti quimacaminít, xlá lacasquín lihuana naccamaktakalha laquí nipara chatum nalak-tzankay huánti xlá quimacamaxquinít naquilipahuán, laqui acxní nalakchán quilhtamacú lata xlá laclhcahuilinit aquit huák naccamála castacuaniy nac calinín. ⁴⁰ Pus xlícaná huá luu xtapaxuhuán Quintlat pi xlihuák lata tícu naquintakaxmatniy y naquintacanajlaniy pi aquit Xkahuasa, nataka-lhij lipaxúhu latámat canecxnicahuá quilhtamacú y huá xlacán huánti naccamála castacuaniy acxní nalakchán ahuatá quilhtamacú.

⁴¹ Acxní amakolh judíos takaxmatkolh eé tachu-huín tzúcuh taaksán Jesús porque xlá chiné huá: “Aquit amat caxtilánchahu huántu tactanítanchi nac akapún.” ⁴² Xlacán chiné táhua:

—¿Lácu pi ni huá eé Jesús xkahuasa José? Pus aquinín clakapasáhu xtzí chu xtlát. ¿Lácu chinchú lihuán para antá minitanchá nac akapún?

⁴³ Jesús chiné cahuánih:

—Luu xlícaná niaj calitaaklhuhuítit quinta-chuhuín. ⁴⁴ Porque nipara chatum cristiano tlán natzucuputún quintalipahuán para ni pulh huá namalacpuhuaniy Quintlat huánti quimaca-minít. Y huánti naquintalipahuán, xlacán masqui nataniy aquit naccamála castacuaniy acxní nalak-chán ahuatá quilhtamacú. ⁴⁵ Lacatum nac likalh-tahuaka huántu tatzoknít profetas chiné huan: “Xlihuák cristianos Dios nacámasiyuníxtalaca-pastacni.” Eé tachuhuín huamputún pi xlihuák

huánti takaxmatniy Quintlat huántu xlá cahuanima y antá nachan nac xnacujcán amá tachu-huín, pus huá chú xlacán naquintalipahuán.

⁴⁶ Pero ní huá huamputún para tícu ucxilhnít Dios; huata caj xmán aquit cucxilhnít porque huá xlá quimalakachanit uú y antá aquit cmin-tanchá nac xpaxtún. ⁴⁷ Xlicána ccáhuaniyán pi huánti quincanajlaniy, xlá aya kalhiy amá lipaxúhu latámat huántu neçxni nalaksputa. ⁴⁸ Porque aquit amá caxtilánchahu huántu māstay latámat. ⁴⁹ Xalakmakán militalakapasnicán tahuanit amá caxtilánchahu huanicán maná antá nac desierto, pero māsqui chuná juerza tánih. ⁵⁰ Pero nichuná amá caxtilánchahu huántu clíchuhuínama, xlá taqtanitanchi nac akapún y huánti nahuay niaj neçxni catínih. ⁵¹ Pus aya ccáhuaniyán pi aquit amá caxtilánchahu huántu taqtanitanchi nac akapún y māstay latámat; huánti nahuay eé caxtilánchahu caneçxnicahuá nalatamay. Amá caxtilánchahu huántu aquit ccámalacnuniyán pus huata huá quintiyatlíhua nacmāstay aquit nacniy xpālaca-tacán cristianos xala caqUILhtamacú laquí chuná natakalhiy latámat.

⁵² Amākolh judíos sacstucán tzúculh talalimāqaklhuhuiy y chiné tzúculh tahuán:

—¿Lácu chú natlahuay laquí tlān naquincáma-huiyán xtiyatlíhua?

⁵³ Jesús chiné cahuánih:

—Luu xlicana ccáhuaniyán pi aquit Xatalacsacni Chixcú y para huixinín ní nalihuayanátit quintiyatlíhua, y para ní nalikotnunátit quinkalhni, ni catikalhítit amá latámat huántu clíchuhuínán. ⁵⁴ Huánti nahuay quintiyatlíhua y nali-

kotnún quinkalhni nakalhiy amá latámat huantú neçxni nalaksputa, y chuná aquit nacmá lacastacuaniy acxni nalakchán xlíahuatá amá quilhtamacú.⁵⁵ Porque huá quintiyatlhua luu xaxlicana tahuá y quinkalhni luu xaxlicana likotnuncán.⁵⁶ Huantí nalíhuayán quintiyatlhua y nalikotnún quinkalhni, xlá ankálhín quintálámaj nahuán y aquit ná antá nactahuilay nac xnacú.⁵⁷ Aquit luu tlán clama porque huá Quintlat huantí quimacaminít xastacná lama y xlá quimaxquiy xlílihueke, pus náchuná chú huantí naquilíhuayán y naquilíkasa aquit nacmaxquiy latámat.⁵⁸ Huá luu ccáhuani putunán pi aquit amá caxtilánchahu huantú taçtanitanchi nac akapún. Eé caxtilánchahu ni xtachuná cumu la amá maná huantú titáhualh xalakmakán militalakapasnicán nac desierto, sampi tánílh; pero huantí nahuay eé caxtilánchahu canicxnicahuá quilhtamacú nalatamay.

⁵⁹ Jesúz chuná cámakalhchu huínjlh amákolh cristianos acxni xtanúma nac xpusiculancán judíos xalac Capernaum.

Xtachuhuín Jesúz mastay xaxlicana latámat

⁶⁰ Acxni takaxmatkoh huantú cahuanícalh, lhuhua cristianos huantí xtastalaniputún Jesúz chiné táchua:

—Eé huantú xlá quilhuama luu xlícan luu tuhua lacaícán, ¿tícu chá luu tlán natlahuaniy, y tícu chá luu nakaxmatniy xtachuhuín?

⁶¹ Pero cumu Jesúz cátzilh pi xlacán xtaliaklhu-huátnamáñalh amá tachuhuín, huantú xlá xca-huaninít y chiné cákálhásquilh:

—Para umá huántu ccahuanín camaaklhuhuín,
 62 Ɂlácu chú luu xquitáxtulh para xquiliucxi-
 lhui aquit Xatalacsacni Chixcú ctalacacxtumapá
 cahuá nac akapún antanícu puhl xacuilachá?
 63 Xmanhuá xEspíritu Dios tlán nacamaxquiyán
 amá xaxlicana latámat; laṭa xlihuak mintiyat-
 lihuacán osuchí militlihuekecán nitú limacuán,
 pero laṭa túcua aquit ccahuaninitán huák huá xta-
 lacapastacni xEspíritu Dios y chuná tlán māstay
 latámat. 64 Pero makapitzín huixinín ní cajanjal-
 yátit.

Huá chuná Jesús calihuánih porque xlá xcatziy
 tuncán huánti ní xcajanjlaniy, y náchuná xcatziy
 huánti xámaj stáhuay. 65 Acalistán chiné huá:

—Pus huá xpalacata aquit ccalihuaninitán pi
 njipara chàtum cristiano tlán naquintalipáhuam-
 putún para ní huá quintlat puhl namálacpu-
 huaniy.

66 Acxnitiyá amá quilhtamacú lhuhua huánti
 xtastálanimánalh Jesús, taakxtekmákalh y niaj
 acxtum xtatalatlahuán. 67 Huanchú xpalacata
 Jesús cakalhásquilh amatolh kalhacuti y xdiscí-
 pulos:

—¿Chinchú huixinín, ná quilaakxtekmakampu-
 tunáhu?

68 Pero huata Simón Pedro chiné kálhtilh:

—Quimpuchinacán, Ɂtícu chú Ɂtunu luu nac-
 tilakanáhu? Porque xmanhuá mintachuhuín
 malacnuý amá xaxlicana latámat huántu anka-
 lhijá cahuá nakalhiyáhu. 69 Aquinín aya ccajan-
 lanítán porque ccatziyáhu pi huix xatalacsacni
 Xkahuasa Dios huánti naquincalakmáxtuyán.

70 Jesús chiné cakálhtilh:

—¿Lácu pi ni aquit ccalacsacnítán minkalhacutiycán laqui quidiscípulos nahuanátit? Pero māsqui chuná, nac milakstipancán huí chatum huantí makatlajanít xtalacapastacni aksahuiní.

⁷¹ Acxní chuná huá Jesús, huá xlá xlíchuhui-nama Judas Iscariote xkahuasa Simón, porque huá Judas xámaj stáhuay māsqui xlá acxtum xca-tatapeksiy xlíkalhacutiay xdiscípulos.

7

Xlitalakapasni Jesús ni xtacanajlaniy

¹ Acalistán Jesús antá xlapulay nac xapula-tamán Galilea. Xlá ni xtahuilaputunächá nac Judea porque xanapuxcun judíos xtamakniputún.

² Pero cumu aya xtalacatzuhuima xpaxcuajcán judíos acxní xtalahuay aktum paxcua xuanicán fiesta de las chozas, ³ huantí xlitalakapasni Jesús chiné tahuánilh:

—Niaj catamáxtekти uú, huata mejor capit nac Judea laqui huantí antá tahuilánalh y huantí antá tatatayayán xlacán ná nataucxilha huantú huix tlahuaya. ⁴ Cumu para lacasquina huix nalakapascana, pus nítu caj lakatzék catlahua. Pus cumu huix tlán catlahuaya laclanca licácnít tascújut, pus chuná antá cacatlahua nac xlacatíncán xlílhuhua cristianos.

⁵ Huá chuná talihuánilh porque hasta mismo xlitalakapasni ni xtacatziy tícuya chixcú xuanit xlacata xlicana natacanajlaniy. ⁶ Jesús chiné cahuánilh:

—Ni naj a lakchán quilhtamacú acxní antá nacán, pero huantú huixinín milacatacán catuhuá quilhtamacú huák tlán. ⁷ Amakolh cristianos

huánti ni quintalipahuán huixinín nilay casitziniyán; pero aquit luu lhuhua huánti ni quintaucxilhputún porque aquit ni ccáliquillhpwán y lacatancs ccámálagsiyuniy ccahuaniy huántu niatlán tatlahuay.⁸ Huata capimpítit huixinín nac paxcua, aquit ninaj cama porque niq lakchán quilhtamacú.

⁹ Acxní chuná catachuhuinankolh, xlacán táalh nac paxcua y Jesús tamákxtekli nac Galilea.

Jesús tzek an nac paxcua

¹⁰ Pero acxní taankolh xlitalakapasni, Jesús ná alh nac paxcua, mäsqi xlá ni cataciyúnih xli-lhuhua cristianos huata caj tzek xlapulay. ¹¹ Xanapuxcun judíos xtalacaputzamánalh nac paxcua chicá para ná xanit, xlacán xtakalhasquininán chicá para tícu xucxilhnít, y chiné xtahuán:

—¿Nicu láma cahuá chú qmá chixcú?

¹² Luu lhuhua cristianos huánti catuhuá xtaliksamánalh, y chiné xtahuán: “Tamá chixcú luu tlán xtapuhuán”, pero makapitzín chiné xtahuán: “Tamá chixcú ni xlicana luu tlán catziy, porque caj caäkskahui Miy cristianos.” ¹³ Pero luu caj laka-tzék chuná xtalichuhuinán porque xtapeçuaniy xanapuxcún judíos.

¹⁴ Acxní aya xitatlanit paxcua Jesús tánulh nac lanca püsicular xalac Jerusalén y tzúcülh camäkalhchuhuinij cristianos. ¹⁵ Amäkolh xanapuxcun judíos luu cacs xtalilacahuán y chiné xtahuán:

—¿Nícu xlá luu catzínih putum huántu masiyuy porque xlá ni kalhtahuakanit?

¹⁶ Cumu Jesús cäkälkäkäxmatli chiné cäkálhtih:

—Eé quintachuhuin huantu aquit cmasiyuma ni caj quecstu quintalacapastacni, pus huá xtalacapastacni amá huanti quimacaminit. ¹⁷ Pus para tícu huixinín xtluhuapútulh xtapaxuhuán Dios huantu xlá lacasquín, pus huata xlá naakataksa amá talacapastacni huantu aquit cqui-lhuama para huá xla Dios osuchí caj quecstu quintalacapastacni. ¹⁸ Amá chixcú huanti lichuhuinán huantu caj sacstu xtalacapastacni, huá xlá chuná litlaluay laqui luu natacacninaniy cristianos; pero huanti litaakatzankey laqui nacacninanicán Dios huanti macaminit, pus chuná limasiuy pi talulóktat huantu quilhuama y ni^tu caj aksaninama. ¹⁹ ¿Lácu pi ni xlicana pi huá Moisés ticamaxquín amá xtapéksit Dios laqui huixinín namakantaxtiyátit? Pero nipara chatum tícu luu laktzaksama laqui namakantaxtiy. Porque cumu para chuná cahuá, ¿túcu chinchú xpälacata quila-limaknippetunáhu?

²⁰ Amakolh cristianos chiné takálhtilh:

—Max caj lakahuitípat huix. ¿Lácu lihuana pi camán camakniyán? ¿Tícu maknippetunán?

²¹ Jesús chiné cahuánih:

—Maktum quilhtamacú acxní huák jaxcán aquit ctláhuah aktum luu tlán tascújut y huixinín chunacú tiliaklhuhuatnampátit.

²² Huixinín huá calicircuncidartlahuacán lactzu milakkahuasacán porque chuná ticalimapeksín Moisés (másqui luu xlicana pi ni huá Moisés maquilhtzuquinitanchá eé huantu lilakachixcuhiyátit Dios sinoque huá xamakán militalakapasnicán Abraham), pero huixinín fuerza cacircuncidartlahuayátit lactzu

lakskatán māsqui acxní lakcháñit quilhtamacú la líhuancán para tícu nascuja. ²³ Pus cumu huixinín ni lacatzalaputunátit xlimapeksín Moisés pus cäcircuncidartlahuayátit lactzú lakahuasán māsqui sábado acxní nitícu scuja, ¿huá chinchú luu quilalísitziniyáhu cumu cmatlántílh chátum tatatlá acxní amá quilhtamacú líhuancán para tícu nascuja? ²⁴ Ni luu caj aklakuá caquiláputzananihuantu ctlahuay. Acxní para naquiláputzananiputunáhu huantu ctlahuanít pero huantu luu akstítum catlahuátit.

Jesús lichuhuinán huantu luu xquilhtzúcut

²⁵ Y makapitzín cristianos huantí xtahuilananchá nac Jerusalén chiné tzúculh takalhasquininán:

—¿Lácu pi ni huá eé chixcú huantí putzamácalh laquí namaknicán? ²⁶ Chinchú pi putum cahui-línt cristianos, cámakalhchuhuinima y niti para tícu xmaaklhúhuilh. Max ahuayu tacanajlánih quimapeksinacán pi xlicana eé chixcú huá Cristo tí naquincalakmaxtuyán. ²⁷ Pero aquinín catziyáhu nícu xlá minitanchá y ná catziyahuá antanícu lacachinit; y nichuná catiquitáxtulh acxní Cristo namín nac cäquiltamacú, porque nitícu caticátzilh nícu xlá minchá nahuán.

²⁸ Jesús xcámakalhchuhuinima cristianos nac lanca pusiculan y acxní xlá kákmatli huantu xta-quilhuamánalh luu palha chiné cahuánih:

—¡Huixinín huanátit pi quilalakapasáhu y catziyátit antanícu cminitanchá! Pero huí kampáatum huantu ni catziyátit, aquit ni caj quecstu quila-cata māsqui cminít, porque huí chátum huantí

quimacaminít y huá xlá māstay xatlán talacapas-tacni, pero huixinín ní lakapasátit. ²⁹ Aquit xlá clakapasa porque antá nac xpaxtún cminchá, y xahuachí cumu huá xlá quimacaminít.

³⁰ Amakolh lacchixcuhuín xtachipaputún laqui natachilén, pero níticu chípalh cumu niɑ xlakchán xquilhtamacú lata xlá namaknicán. ³¹ Pero ná luu lhuhua cristianos tacanajlánih y chiné xtahuán:

—Bueno, chinchú acxní namín Cristo quimakaputaxtinacán, ¿lácu pi ɑtzinú laclanca licácnit tascújut xlá natlahuay ní xachuná çatlahuay eé chixcú?

Fariseos tamacán makapitzín policías laqui nachilencán Jesús

³² Amakolh lacchixcuhuín huanti xcáhuanicán fariseos chu xanapuxcun cura, xlacán tzúculh takaxmata lata xtalichuhuinán cristianos huantü xlá xtlahuay Jesús, huata xlacán tamácalh makapitzín policías huanti xtamaktakalhnán nac lanca pusiculan laqui tachín natalén Jesús. ³³ Xlacán táalh pero Jesús chiné cahuánih:

—Niaj luu makas quilhtamacú ccatalamán aquit porque nactaspitparay nac xpaxtún huanti quimacaminít. ³⁴ Amá quilhtamacú huixinín naquiliaputzayáhu pero niaj caquintilamacláhu porque huixinín nilay catipítit antanícu aquit nactahuilayachá.

³⁵ Amakolh judíos sacstucán tzúculh talakalhas-quín:

—¿Nícu xlá naán laqui aquinín niajlay catimac-láhu? ¿Lácu pi huá cahuá nacalakán amakolh judíos huanti tahuilananchá nac xpulatamancán

griegos laquí huá nacamäkalhchuhuiníy huánti antá mákat tahuilananchá? ³⁶ ¿Túcu chú luu huaniputún acxní chiné quincáhuán: “Huixinín naquilaputzayáhu pero niaj caquintilamacláhu, porque huixinín nilay catipítit antanícu aquit nac-tahuilayachá”?

Espíritu Santo litaxtuy cumu la chúchut huantu mastay latámät

³⁷ Acxnitiyá amá quilhtamacú xliakasputni paxcua acxní atzinú luu lhuhua xtatzamacán, Jesús táyalh nac xlacatinctán cristianos y chiné cahuánilh:

—Para tícu kalhpütima nac xlatámät, caquilákmilh y aquit nacmäkotniy. ³⁸ Pus chuná nalikantaxtuy huantu tatzoktahuilanit xtachuhuín Dios nac likalhtahuaka antanícu chiné huán pi nac xnacú amá cristianos huánti naquilipahuán ámaj tahuilay cumu la aktum musni antanícu nataxtutilhay amá chúchut huantu nalilatamay xlistacni.

³⁹ Caj xpälacata eé xtachuhuín Jesús xtämala-castucma amá musni chu Espíritu Santo, huá xlá xuaniputún xlacata huánti nalipahuán namak-lhtinán xlitlihueke Espíritu Santo; masqui amá quilhtamacú niä xmin Espíritu Santo porque Jesús niä xniy laquí nachamparay nac akapún antanícu xapulh xuí.

Lhuhua cristianos tatapajitziy caj xpälacata Jesús

⁴⁰ Makapitzín cristianos acxní takáxmatli xtachuhuín, chiné tzúcuhuán:

—Xlicána huá tamá profeta huánti xliminit xuanit nac caquilhtamacú.

41 Pero makapitzín chiné xtahuán:

—Ni xlicána huá Cristo huantí minitán quinca-maqaputaxtiyán.

Huintí xtahuamparay:

—Pero, ¿lácu pi xalac Galilea nahuán huantí luu xlicana Cristo? **42** Nac xtachuhuín Dios huantú tatzoknít huan pi tamá Cristo xlitalakapasni nahuán amá xamakán rey David, y xáhuachí xalac Belén nahuán porque antá xcachiquín xuanít David.

43 Y caj xpápacata Jesús amákolh cristianos tata-pajpitzikolh. **44** Huata makapitzín policías xtalem-putún Jesús nac pulachín pero ni chatum huantí chípalh.

Xanapuxcun judíos ni xtalipahuán Jesús

45 Amákolh policías tataspitpá y antá taampá antaní xtahuilánanchá fariseos chu xanapuxcun cura, y acxní táchalh chiné cäkalhasquinca:

—¿Lácu ni lítatit?

46 Xlacán takalhtinalh:

—Latachá xlá chuhuinán amá chixcú nipara chatum tícu chixcú a chuhuinán cumu la xlá.

47 Huata amákolh fariseos chiné tahuánih:

—¿Lácu pi na aya taakskahuitittá huixinín?

48 ¿Lácu pi na aya tacanajlaninit makapitzín quimpuxcucán osuchi quintafariseoscán?

49 Pero amákolh cristianos huantí takaxmatniy xtachuhuín, xlacán ni taakataksa huantú huamputún xtachuhuín Dios huantú tatzoktahuilanit nac likalhtahuaka, pus caj huá xpápacata xlacán taamánalh talilaktzankay.

50 Chinchú Nicodemo huánti maktum cätzisní tiquilakapaxiálhnalh Jesú斯 xlá nā fariseo xuanít, chiné cahuánílh:

51 —Pus lāta tatzoktahuilanít xlimapeksín Moisés huan pi nipara chatum chixcú tlān catimālacapúhu para nī pulh catiputzanánihu y lihuana nacatziyáhu huántu xlá tlahuaniit.

52 Pero huata xlacán caj talikalhkamánlh y chiné takalhtínlah:

—¿Lácu pi nā xalac Galilea huix? Pus huata luu lihuana calikalhtahuaka amakolh libros antanícu tatzoktahuilanít xtachuhuín Dios y nēcxni catimaclalh antanícu huan para chatum profeta minitanchá nac Galilea.

53 Acxni chuná tachuhuinankolh amakolh fariseos chatum chatum alh nac xchic.

8

Chatum lakalhina puscat matzankenaniy Jesús

1 Huata Jesú斯 alh nac késtín huántu huanicán Cerro de los Olivos, **2** y lichali litúm acxni xakakolh xlá ampá nac lanca pūsiculan. Pero luu lhuhua cristianos talaktalacatzúhuilh, xlá táhui y tzúculh cāmākalhchuhuiniy.

3 Y makapitzín xmakalhtahuakenacán judíos xahua fariseos talímilh chatum puscat huánti xtamanoklhunit cxakatlima túnuj chixcú. Antá xlacán tayáhualh nac xlacatincán xlihuák cristianos. **4** Xlacán chiné tahuánílh Jesú斯:

—Mäkalhtahuakená, eé puscat cmanoklhunitáhu acxní luu cxakatlima túnuj chixcú y xakska-huima xtakolú. ⁵ Nac xlimapeksín Moisés quincalimapeksiyán para tícu chuná puscat nacmanklhuyáhu tlān naclialtamakniyáhu chíhuix. Chinchú huix, ¿lácu huana pi tlān chuná naclahuayáhu?

⁶ Xlacán caj chunatá xtalíkalhputzamánalh laquí para túcu xlá ni tangs nakalhtinán y chuná chú natalimálacepuy. Huata Jesús taquilhpútalh y tzúculh litzoknún kantum actzú xmacán nac catiyatni. ⁷ Y amäkolh lacchixcuahuín chunacú xtalimäkatzankemánalh, pus huata Jesús taáctzajli y chiné cahuánilh:

—Lata macxtum yátit, para taxtuyachá chatum huanti nitúcu titlahuanit talakalhín, pus huata huá xlá luu mininiy casaclí aktum chíhuix y camacapúlalh laquí naactalamakniyátit tamá puscat.

⁸ Jesús taquilhputapá y tzucupaj tzoknún nac tíyat. ⁹ Acxní xlacán takáxmathlí amá tachuhuín nitú takalhtinalh huata lakasiyu tzúculh tatzalay, chatunu tzúculh taán, pülh tapúlalh huantí aya lakkolún y acalistán táalh huantí tlakcu lakahuasán. Acxní taankolh cäta sacstu Jesús tamáktexkli chu amá puscat. ¹⁰ Acxní chú taquilhpúquih Jesús niaj tícu úcxilhli cäta caj sacstu amá puscat xyá, xlá chiné huánilh:

—Puscat, ¿nícu tayánalh huantí xtamalaca-pumán? ¿Lácu pi niaj tì malacapumán?

¹¹ Xlá chiné kalhtinalh:

—Quimpuchiná, niaj tì quimalacapuma.

Y Jesús chiné huánilh:

—Pus ná nipara aquit clacasquín nacmapati-nyán caj xpàlacata huantú nitlán titlahuaníta mintalàk alhín. Lanchú capittá nac míñchic, y niaj catlahua talàk alhín.

Jesús huá taxkáket huantú lilacahuayanáhu

¹² Jesúz tzucupaj cámakalchuhuiniy cristianos y chiné cahuánilh:

—Aquit clitaxtuy taxkáket huantú macaxka-kenán nac cäquilhtamacú. Huantí naquili pahuán y naquistalaniy nakalhiy taxkáket nac xlatámat y necxni catilatámalh xalakacapucsua.

¹³ Makapitzín fariseos chiné tahuánilh:

—Huix caj luu mècstu lìchuhuínampácanti, caj huá xpàlacata tamá mintachuhuín nitu limacuán y nilay ccänajlayáhu.

¹⁴ Jesúz chiné cákálhtilh:

—Aquit ni cakskahuinán, mäsqui luu caj quecstu cäquilichuhuínáncalh pero quintachuhuín limacuán porque aquit ccatziy nícu cminchá, y ná ccatziy nícu cpekama. Pero huixinín ni catziyátit nícu cminchá y ná nipara catziyátit nícu cpekama.

¹⁵ Huixinín quilaliyáhuamána huantu lacasquinátit porque cumu la catihua chixcú xala cäquilhtamacú quilali macanáhu. Aquit nitu ccaliyáhuayán, ¹⁶ pero para xaccamála cápulh minkasatcán, huantu xaccáhuán huak xlícaná porque aquit ni quecstu para tícu cputzánaniy xcuentaj huata huá Quintlat huantí quimacaminít quimaxquiy xtalacapastacni túcu nacliyáhuán. ¹⁷ Nac amá limapeksín huantu Moisés ticamakxteknín, antá tatzoknít pi acxní

chatiy testigos luu acxtum natachuhuinán, pus nacacanajlanicán. ¹⁸ Pus ccáhuaniyán pi huí chatiy huantí tamaluloka xlacata pi xlícaná huantu clíchuhuinán, aquit chatum, chu Quintlat xlíchatiy huantí quimacaminít.

¹⁹ Xlacán chiné takalhásquilh:

—¿Nícu huilachá mintlat?

Jesús cahuanilh:

—Huixinín ni quilalakapasáhu aquit y nipara huá Quintlat lakapasátit. Para aquit xquilalakapasui, pus ná xlakapástit Quintlat.

²⁰ Jesúz chuná catachuhuinalh amakolh fariseos acxní xlá xakchuhuinama nac lacatzú xamálacchi lanca pusiculan antaní xtahuilánalh cajón huantu xputajuy limosnas. Pero nitícu chípalh laqui nalencán nac pulachin porque niá xlakchán xquiltamacú la namacamastacán.

Jesús lichuhuinán pi lakama Xtlat

²¹ Caj lipuntzú Jesúz cahuanipá eé takalhchu-huín:

—Aquit cama alacatunu y naquiliaputzayáhu, pero huixinín ni caquintilámacláhu; pus antanícu aquit nacchán huixinín nilay catipítit porque kalhiyátit lhuhua talakalhín y acxní naniyátit huá nalilaktzankayátit.

²² Y amakolh judíos chiné tzúcuhl lahuaniy:

—Eé chixcú max ahuayu caj amácalh maknicán sacstu, huá chuná lihuán pi nilay caticháhu antanícu xlá ámaj chan.

²³ Jesúz cahuanilh:

—Huixinín mimpulatamancán antá uú huí catutzú, pero quimpulataman huí tálhmán;

huixinín uú xala caquiltamacú, pero aquit ni antá uú xala caquiltamacú. ²⁴ Pus huá xpälacata ccalihuán pi huixinín kalhiyátit lhuhua talakalhín y acxní naniyátit huá nalilaktzankayátit. Cumu para ni nacanajlayátit pi aquit amá huantí nacalakmáxtuyán, pus acxní naniyátit pimpátit lilaktzankayátit mintalakalhincán.

²⁵ Xlacán chiné tahuánih:

—Xlicana, ¿tícu ya chixcú huix?

Jesús cakálhtílh:

—Huixinín catziyátit pi hasta laṭa xapulh tuncán ccahuaniñítán tícu aquit. ²⁶ Aquit tlān lhuhua xaccalichuhuinán y xaccaliyahuán huantu nitlán tlahuayátit, pero huata huá nacmásiyuy uú nac caquiltamacú huantu lacasquin huantí quimacaminit y huantu ckaxmatninit; pus xlá luu akstítum xtalacapastacni.

²⁷ Pero xlacán ni taakátaxsli pi Jesús xcalitachuhuinama Dios huantí Xtlat, ²⁸ y huá chiné calihuaniñápá:

—Hasta acxní huixinín naquilmatálhmaniñáhu nac cruz, pus acxnicú luu naakataksátit tícu aquit; y ná acxnicú nacatziyátit pi aquit nitu ctlahuay huantu caj quecstu quilacata, huata caj xmánuá cuan huantu quimásiyuninit Quintlat. ²⁹ Porque Dios huantí aquit quimacaminit ankalhiná quintalapulay, Quintlat necxni a quiakxtekmakán porque ankalhín aquitctlahuay huantu xlá lakatiy.

³⁰ Acxni chuná chuhuinankolh Jesúś, luu lhuhua cristianos xtalipahuamputún y xtastalaniputún.

Jesúś tlān calakmāxtuy huānti xtachincán catlahuanit tlākālkhín

³¹ Jesúś chiné cahuánilh judíos huānti aya xtastalaniputún:

—Pus para huixinín luu akstítumá namakan-taxtiyátit huāntu ccālimapeksiyán pus chuná tlān nalitaxtuyátit cumu la xaxlicána quintamākalh-tahuakén, ³² y chuná huixinín tlān nalakapasátit xtalacapastacni Dios, y huá amatá talacapastacni nacāmaxquiyán laktáxtut porque caj la tachín huixinín lapátit.

³³ Makapitzín chiné takálhtilh:

—Amá Abraham huānti makán quilhtamacú xlama quilitalakapasnicán xuanit aquinín, y nećxni a quincächicanán laqui para tícu caj chuná nacscujniyáhu. ¿Tícu chú xpälacata huix líhuana pi nackalhiyáhu laktáxtut?

³⁴ Jesúś cahuánilh:

—Xlicána ccāhuaniyán pi xlihuák huānti tatlahuay tlākālkhín xlacán talitaxtuy cumu la xtasaucacán tlākālkhín, osuchí cumu la xtachincán.

³⁵ Chātum tāsacua huānti caj la tachín māscujcán, xlá nilay tlahuay tu lacasquín huata huá tlahuay huāntu huaniy xpatrón, pero aquit Xkahuasa Dios ni tachín. ³⁶ Huá ccālihuaniyán, para aquit Xkahuasa Dios ccāmaxquiyán laktáxtut, amatá tlākālkhín niaj lay catacamascujún cumu la xtachín. ³⁷ Xlicána aya ccatziy pi huixinín militalakapasnicán xuanit amatá xamakán kolutzín

Abraham, pero mäsqui chuná huixinín quilamaknijputunáhu porque ni matlantiyátit huantü aquit ccahuaniyán. ³⁸ Aquit ckalhiy xtalacapastacni Quintlat y huá clichehuinán huantü quimäsiyuninit, pero makapitzín huixinín kalhiyátit tunu mintlatcán y huá tlahuayátit huantü xlá cämasiyuninitán.

³⁹ Xlacán chiné takalhtínalh:

—Aquinín huá quintlatcán Abraham.

Jesús chiné cähuánilh:

—Para xlicana huixinín xcamán cahuá Abraham pus nähuná xmacastalátit cumu la xlá tilatámalh nac caquiltamacú. ⁴⁰ Masqui aquit aya ccahuán amá talacapastacni huantü Dios qui-mäsiyuninit, huixinín ni canajlayátit y juerza quilamaknijputunáhu. Abraham necxni xtlahuay huantü huixinín tlahuayátit. ⁴¹ Huixinín huá tlahuayátit huantü tlahuay huantü xlicana mintlatcán.

Xlacán chiné tahuaniipá:

—¡Já, pero lácum huix luu quilalipulhcayáhu! Porque aquinín caj xmän chatum Quintlaticán huí huá Dios.

⁴² Jesús chiné cähuánilh:

—Cumu para xlicana huá cahuá Mintlaticán Dios huixinín xquilibaxquihu, porque antá cmnitanchá nac xpaxtún antaní xlá huilachá; pus aquit ni caj quintapaxuhuán mäsqui cmnit uú nac caquiltamacú, sinoque huá quimacaminít Dios huantü Quintlat. ⁴³ ¿Túcu xpälacata huixinín nilay akataksátit huantü ccahuaniyán? Huá nilay porque huixinín ni kaxpatputunátit huantü aquit quintachuhuín. ⁴⁴ Huá huixinín mintlatcán

akskahuiní; huixinín huá tapeksiniyátit y huá tla-huaputunátit huántu xlá lakatíy. Tamá akska-huiní luu ankalhiná xamakníná kalhiy xtamu-huán hasta lata xquiltzúcute caquiltamacú. Xlá necxni lichuhuínán huántu talulóktat y nipara huántu lacatítum. Acxní xlá matzuquiy xtaak-sanín anta tuncán litasuyu huántu xlá xtamu-huán porque luu xaaksaníná, y huá xlá xtlatcán huák aksaninanín. **45** Huá xpälacata, cumu huántu aquit cuan luu xlicana talulóktat, huixinín nilay quilacanajlaniyáhu. **46** Caquilahuaníhu, ¿xatícu ya la huixinín tlán naquihuaniy pi aquit ckalhiy quintalakalhín? Pus nipara chatum. Pero cumu aquit ankalhiná clichehuinanit xtalacapastaci Dios, ¿túcu chú xpälacata ni quilacanajlaniyáhu? **47** Huánti xlicana talipahuán Dios y tatapeksiniy xlacán takaxmatniy xtachuhuín, pero cumu hui-xinín ni tapeksiniyátit Dios huá ni likaxpatputu-nátit xtachuhuín.

Cristo xapulh lamajá ni xachuná Abraham

48 Y amakolh xanapuxcun judíos chiné tahuá-nilh:

—Pus pi luu xlicana acxní cuanáhu pi huix ná antá xalac Samaria porque ná luu chuná minkásat y makatlajanítán xtalacapastaci aksahuiní.

49 Jesús chiné cakálhtilh:

—Aquit nítu quimakatlajama xtalacapastaci aksahuiní. Amá tascújut huántu aquit ccatalhuay chuná clilakachixcuhuima Quintlat, pero huata huixinín ni quilacanajlaniyáhu aquit.

50 Pero ni huá huamputún pi aquit luu clacas-quima naquincacninanicán, masqui xlicana huí

cháutum huánti lacasquín naquincacninanicán, y huata huá xlá nacamaksquín cuenta huánti ni quintalipahuán.⁵¹ Xlicána ccahuaniyán pi huánti nacuentajtlahuay huántu aquit clíchuhuinán xlá necxni catínílh xlistacni.

52 Amákolh cristianos takalhtínalh:

—Xlicána lanchú luu ctalulokáhu pi caña makatlajanítán xtalacapastacni aksahuiní, porque laṭa xalakmakán profetas chu amá huánti quinquilhtzucutcán Abraham xlacán huák taninit; pero chinchú huix huana pi huánti nacuentajtlahuay huántu huix lichuhuinana, necxni catínílh xlistacni.⁵³ ¿Lácu pi atzinú chú huix lanca milacatzúc ut ni xachuná la amá xamakán quilitalakapasnicán Abraham? Porque xlá na nilh chu xlihuák profetas. Bueno, pero ¿tícu chú huix luu litaxtuputuna?

54 Jesús chiné cakálhtíllh:

—Para caj aquit quecstu clacasquín pi naquila-cacninaniyáhu amá quintachuhuín huantu aquit xaccáhuani nítu limacuán. Pero huata huí cháutum huánti lacasquín pi naquilalakachixcu-huiyáhu, pus huá Quintlat, huatiyá tamá huánti huixinín limaxtuyátit MiDioscán.⁵⁵ Masqui luu chuná chú huixinín ni lakapasátit xtalacapastacni, pero aquit xlá clakapasa. Para xackalhtá-tzekli xacuá pi ni clakapasa, pus na luu xaaksa-niná xaclítáxtulh cumu la huixinín. Pero cumu aquit xlicána clakapasa huá ccajítlahuay huántu xlá quilimapeksiy.⁵⁶ Amá Abraham huánti xamakán militalakapasnicán xlicána luu lipaxúhualh acxní xlá cajcu xlacpuhuán pi aquit xacámaj min

nac caquiltamacú, huata xlicana xlá ucxilhlacá-chilh eé quilhtamacú nac xtalacapastacni y luu lipaxúhuallh.

⁵⁷ Amakolh judíos chiné tahuánih Jesúś:

—Pero huix ninaj para kalhiya ítāt ciento cāta lāta lápat, ¿y chinchú huana pi ucxilhnita amá xamakán quilitalakapasni Abraham?

⁵⁸ Jesúś chiné cákálhtilh:

—Xlicana luu lacatancs ccahuaniyán, pi hasta lāta nínajtí xlama Abraham aquit xaclamajá.

⁵⁹ Huata amakolh judíos huákaj tasáquilh chí-huix laqui nataliactalanchipay Jesúś; pero xlá tátzekli nac lanca pusiculan, cātilacpuntaxtukolh cristianos y tatampúxtulh.

9

Jesúś matlantiy chātum chixcú huānti luu chuná tuncán lakatzín tilacáchilh

¹ Acxní Jesúś titáxtulh lacatum xlá úcxilhli chātum chixcú pi luu chuná tuncán lakatzín xlacachinit. ² Xdiscípulos chiné takalhásquilh:

—Makalhtahuakená, ¿lácu luu lakatzín tuncán lilacachinit eé chixcú? ¿Xatícu cahuá luu tlahuani talakalhín? ¿Pi huá cahuá xtlat osuchí luu mān xtalaikalhín xlacata pi chuná lakatzín lacachinit?

³ Jesúś chiné cahuánih:

—Ni caj huá xpápacata xtalaikalhín, y ni para xtalaikalhincán xtlat, huata caj luu chuná lanit laquí antá nalitasiyuy lāta túcua tlān tlahuay Dios. ⁴ Lihuán cācuhuinicú catlahuaníhu xta-scújut huānti quimacaminít, porque aya talacatzuhuima cātzisní acxní niaj lay catiscujca. ⁵ Aquit

clitaxtuy taxkáket huántu talilacahuánan cristianos, y lihuán clama nac cäquilhtamacú nac-mástay quintaxkáket.

⁶ Acxní chuná huankolh Jesús chujli nac catiyatni y huá litláhualh actzú putlún xchújut, y acalistán lilacatláhualh nac xlakastapu amá lakatzín.

⁷ Y chiné huánih:

—Lalihuán capit lakachakana nac musni huántu huanicán Siloé —eé tachuhuín huamputún: Huanti macamincanit.

Amá lakatzín lalihuán alh y lakachákalh; acxní chú aya quitáspitli, tláná xlacahuánan. ⁸ Huanti xtalakapasa chu huanti xtalacatzunín chiné tzúculh tahuán:

—¿Lácu pi ni huá eé chixcú huanti xtahuilay laquí nasquín limosna?

⁹ Makapitzín xtahuán:

—Xlicana cuan, huá.

Y huí makapitzín huanti xtahuamparay:

—Ni huá, pero luu xtachuná tasiyuy.

Pero huata amá chixcú mān xcahuaniy:

—Xlicana pi aquit amá chixcú huanti huani-pátit.

¹⁰ Xlacán chiné takalhásquilh:

—¿Lácu chinchú tlán lilacahuánana?

¹¹ Xlá chiné cahuánih:

—Amá chixcú huanti huanicán Jesús caj xchújut litláhualh actzú putlún y quilibacatláhualh nac quilibastapu y chiné quihuánih: “Lalihuán capit lakachakana nac musni huántu huanicán Siloé.” Aquit xlá calh y acxní clakachakankolh aya tlán clacahuánalh.

¹² Y takalhasquimpá:

—¿Nícu chú lama tamá chixcú?
—Ní ccatziy —cahuánilh xlá.

Fariseos tamakalhapaliy amá chixcú huantí lakatzín xuanít

13-14 Porque amá quilhtamacú sábado acxní Jesús tláhualh actzū putlún y malacatlántilh amá lakatzín pus luu acxní xlíhuancán para tícu nascuja, huá xpalacata liléncalh nac xlacatincán fariseos amá chixcú huantí xmálatlánticanít. **15** Amakolh fariseos tzúcuh takalhasquín lácu chú tláná xlílacahuánán. Xlá chiné cahuánilh:

—Chánum chixcú quililacatláhualh actzū putlún, y acxní clakachákalh lanchú aya tlán clacahuánán.

16 Makapitzín fariseos chiné tahua:

—Amá chixcú huantí chuná tláhualh ni Dios tapeksiniy porque xlá ni cäcninaniy amá quilhtamacú acxní jaxcán.

Pero makapitzín xtahuán:

—Para cana maklakalhiná cahuá, ¿lácu chú calitlahuay laclanca licácnít tascújut?

Huata xlacán luu lakaputiyú tatahui. **17** Kalhasquimpá amá chixcú huantí lakatzín xuanít:

—Chinchú huix, ¿lácu huana xpalacata amá chixcú huantí malacatlántín?

—Aquit clacpuhuán pi máx profeta —kalhtínalh xlá.

18 Pero amakolh xanapuxcun judíos ni luu xtaganjalputún para xlícaná huá amá chixcú huantí lakatzín xuanít y xmálatlánticanít; hasta caní tamatasaninalh xtlat chu xtzi **19** y chiné takalhásquilh:

—¿Pi xlicana huá eé minkahuasacán huánti huanátit pi lakatzín lacachinit? ¿Lácu chú tláná lilacahuánán?

20 Xtlat chu xtzí amá chixcú chiné takalhtínalh:

—Xlicana ccatziyáhu pi huá quinkahuasacán y ccatziyáhu pi lakatzín tilacáchilh. **21** Pero ni ccatziyáhu lácu chú tlán lilacahuánán, xáhuachí aquinín ni ccatziyáhu tícu malacatlántilh. Huata mejor huá man cakalhasquíntit. Xlá aya lenáhu quilhtamacú y catziyá, y huata huá luu man naca-huaniyán.

22 Huá chuná xlacán talikalhtínalh porque luu xtapecuaniy xanapuxcun judíos, cumu xlacán aya xtalilacchuhuinanit xlacata maktum pi natatlakaxtuy nac xpusiculancán xlihuak huánti natalitayay pi Jesús huá Cristo huánti xminit cakamáxtuy. **23** Huá xpálaceata chuná talikalhtínalh: “Man cakalhasquíntit; xlá aya lenáhu quilhtamacú.”

24 Amäkolh xanapuxcun judíos tatasanipá amá chixcú huanti xapulh lakatzín xuanit, y chiné tahuánihl:

—Luu xlicana caquilahuaníhu huántu talulóktat nac xlacatín Dios, porque aquinín stalanca ccatziyáhu pi tamá chixcú, masqui malacatlántin tláhualh talakalhín.

25 Xlá chiné cákálhtílh:

—Pus tamá aquit ni ccatziy para tláhualh tala-kalhín osuchí ni tláhualh talakalhín. Xman huántu aquit ccatziy pi xapulh lakatzín xacuanit y lanchú aya tlán clacahuánán.

26 Xlacán takalhasquimpá:

—¿Túcu luu tlahuanín? ¿Lácu xlá tláhualh laqui huix tlán nalacahuánana?

²⁷ Xlá cákálhtipá:

—Aquit aya ccáhuán pero ni quilacanajlaniyáhu. ¿Túcu chinchú lilacasquinátit nacuamparay amaktum? ¿Lácu pi ná stalaniputunátit huixinín?

²⁸ Xlacán tzúcuhuán talacaquihniy y chiné tahuánilh:

—Huix xlá máx nastalaniya amá chixcú, pero aquinín huá cstalaniyáhu xtapéksít Moisés. ²⁹ Aquinín stalanca ccatziyáhu pi Dios titachuhuánalh Moisés; pero tamá chixcú nipara tzinú ccatziyáhu nícu luu minitanchá.

³⁰ Amá chixcú chiné cákálhtilh:

—Pero luu xlicána huixinín mákat aktzanka-yátit porque huanátit pi catziyátit nícu xlá minitanchá, pero huixinín ucxilhpátit xlacata pi aquit quimálaatlantinít. ³¹ Aquinín catziyáhu pi Dios ni cakaxmatniy huánti maklakalhinanín, pus huata caj xmánuá cámáxqui y xlítlihueke huánti talipahuán, talakachixcuuiy y tatlahuay huántu xlá xtapaxuhuán. ³² Láta makásá nipara chatum tícu xuanca pi tlán cámálaahuániy huánti luu xkásat tuncán lakatzín xlacachinít. ³³ Para xlicána tamá chixcú ni Dios cahuá macaminit nilay xtláhualh laclanca lícácnít tascújut.

³⁴ Amákolh fariseos tasitzínih y chiné tahuánilh:

—¡Huix luu xlakstu mintalákalhín kalhiya hasta láta tilacachita nac cäquihltamacú; pero huata huix chú quilamákalhchuhuiniputunáhu!

Acxní chuná tahuánikolh tatlakáxtulh nac xpusiculancán.

Huánti tahuán talacahuánán atzinú takalhíy xtalakalhincán

35 Jesús cátzilh pí luu maktum xtlakaxtucanit amá chixcú huánti lakatzín xuanít; y acxní xlá tatánoklhli chiné huánilh:

—Lántamá huix, ¿pí lipáhuana Xkahuasa Dios?

36 Amá chixcú huánilh:

—Quimpuchiná, caquihuani tícu laqui aquit naccanajlaniy.

37 Jesús kálhtilh:

—Pus huix aya ucxilhníta, aquit amá Xkahuasa Dios huánti tachuhuinamán lanchú.

38 Amá chixcú lakatatzokóstalh nac xlacatín Jesús y chiné huánilh:

—Quimpuchiná, aquit xlicána ccanajlaniyán.

39 Jesús chuná huánilh:

—Aquit cminít uú nac caquilhtamacú laqui naccaputzananiy xcuentajcán cristianos, y laqui huánti lakatzín talamánalh tlán natalacahuánán, y huánti talacpuhuán pí luu xlicána talacahuánán xlacán tlán nalitasiyuy lácu talamánalh cumu la lakaxoko.

40 Makapitzín fariseos huánti antá xtalaryánalh acxní chuná takáxmatli xtachuhuín chiné takalhásquilh:

—¿Lácu pí ná lakaxoko chú aquinín?

41 Jesús chiné cakálhtilh:

—Para luu cäna lakaxoko cahuá huixinín, ni lipinátit cahuá cuenta caj xpälacata mintaläkahincán huántu titlahuanitátit, pero cumu huanátit pí lacahuánanátit pus lan kalhiyátit min-cuentajcán.

10

Xatakalhchuhuín xcorralhcán borregos

¹ Acalistán Jesús c̄ahuánilh eé takalhchuhuín:

—Xlicána c̄ahuaniyán pi huánti ni nalactanuy nac xamálacchi xcorralhcán borregos, y para caj lacatunu antanícu xlá nalactanuy, pus huata tamá xlá caj kalhaná. ² Pero amá huánti lactanuy nac málacchi xlicána xlá pi huá xmaktakalhná borregos. ³ Amá chixcú huánti maktakalhnán nac xlacán málacchi, malaquiniy málacchi huánti xpuchiná borregos laqui natanuy, y amakolh borregos aya takalhlakapasatá xtachuhuín, xlá calimapacuhuiy xtacuhuinicán y c̄atamacxtuy antanícu c̄alakuán. ⁴ Acxni chú aya c̄atamacxtukonit borregos, tzucuy capulaniy, amakolh borregos tastralaniy porque aya takalhlakapasatá xtachuhuín xpuchinacán. ⁵ Pero para atunu cristianos nacatasaniy huánti ni talakapasa, xlacán ni tastalaniy huata caj tatzalaniy porque talakapasatá huánti xmaktakalhnacán.

⁶ Jesúz chuná calixakátlilh eé takalhchuhuín pero xlacán ni taakátaksli huántu xc̄ahuaniputún.

Jesús l̄itaxtuy xatlán xmaktakalhnacán borregos

⁷ Jesúz tzucupaj c̄ahuaniy eé takalhchuhuín:

—Xlicána c̄ahuaniyán, aquit tamá málacchi antanícu nalactanuy borregos. ⁸ Acxni aquit ni a xacmín luu lhuhua taquilanitanchi kalhananín, pero huata quiborregos ni tastalánilh y ni takaxmátnilh xtachuhuín. ⁹ Aquit clitaxtuy amá málacchi antanícu lactanucán nac corralh. Huánti nalactanuy nac eé málacchi nakalhiy laktáxtut, y

chuná nalitaxtuy cumu la tantum borrego huánti tlan natanuyachi y nataxtuy nac corralh y luu lacuán xlíhuat namaclay huántu xlá nalihuayán.

10 'Huánti xlá caj kalhaná, huata caj xmán min cakalhán, cámakniy huantu tatanumánalh nac corralh, pero aquit cminít laquí naccámaxquiyán xaxlicana latámat y laquí nitú nacatzankaniyán lácu akstítum y lipaxúhu nalilatapayátit. **11** Aquit amá huánti luu tlan xmaktakalhná borregos, amá huánti luu xlícaná calakalhamán xtakalhín, ni lakcatzán xlatámat masqui caj xpamacata huá calimaknícalle. **12** Pero amá tasacua huánti caj makscujma laquí natlajay tumín y macuentajlicán, acxní xlá ucxilha pi mímaj cahuay lapánit, xlá nacatzalamakán amá borregos; y amá lapánit tzucuy caputlakay y cahuay borregos, y huá chuná litlahuay porque amá chixcú ni huá luu xpuchinacán borregos y ntlán xmaktakalhnacán. **13** Eé chixcú huanti caj huá limakscujma porque tlajaputún tumín, xlá tzalamakán borregos, porque ni xlá huá chú ni lilakcatzán.

14-15 'Aquit amá huánti luu xlícaná tlan xmaktakalhná borregos. Chuná cumu la quilakapasa Quintlat, aquit nachuná clakapasa Quintlat, pus nachuná ccälakapasa tanatunu quiborregos, xlacán na quintalakapasa y quintalipahuán aquit. Aquit ccapaxquiy quiborregos y huá cámaj límästay quilatámat, cámaj niy caj xpamacatacán quiborregos. **16** Pero ccahuaniyán pi na ckalhiy makapitzín túnuj quiborregos huánti ninaj antá uú catatapeksiyán nac corralh. Pero xlacán na naccalimín uú y xmánuá natakaxmata quinta-

chuhuín laquí pulactumá nahuanátit y nā chatumá huánti nacamaktakalhán.

¹⁷’Huá luu quilipaxquiy Quintlat porque aquit cmacamastay quilitamát laquí nacniy caj mimpalacatacán, pero ni limakás nacmakamaklhtinamparay. ¹⁸ Nítí luu juerza quimaklhtima quilitamát huata caj luu quintapaxahuán cámaj macamastay. Porque aquit ckalhiy quilhtamacú nacmacamastay, y nachuná ckalhiy litlihueke laqui nacmakamaklhtinamparay porque chuná quili-mapeksinít Quintlat.

¹⁹ Acxní takaxmatkolh eé tachuhuín amakolh judíos sacstucán tatapajpitzipá. ²⁰ Lhūhua huánti xtahuán:

—¿Túcu xpälacata lịcanajlaniyátit porque xlá caj lakahuitiy cumu huá makatlajanít xtalacapas-tacni akskahuiní?

²¹ Pero makapitzín chiné xtahuán:

—Para chatum chixcú kalhiy xespíritu akskahuiní, ¿lácu pi luu tlān lacatitum kalhchuhuinán? Xahuachí, ¿pi tlān malacahuaniy chatum huánti lakaxoko amá xespíritu akskahuiní?

Xanapuxcun judíos talakmakán Jesús

²² Amá quilhtamacú luu xlonknuma y antá nac Jerusalén xmapaxcuajnímácalh lanca pusiculan.

²³ Jesús antá xlapulay nac lanca pusiculan lacatum antanícu chiné huanicán Portico de Salomón. ²⁴ Antá tamalacatzúhuilh makapitzín judíos y chiné tahuánilh:

—Xliankalhiná ni luu akatancs ctamakxtekáhu. Para luu xlicána huix Cristo huánti naquincálakmaxtuyán, luu maktumá lacatancs caquilahua-níhu.

25 Jesú chiné cákálhtilh:

—Ni cajcu maktum ccahuánín, pero huixinín ni quilacanajlaniyáhu. Xahuachí amá laclanca tascújut huantú aquit ccalimalacahuaniyán, pus huá quimatlahuíy Quintlat, y ná luu huá lítum lacatancs tamáluloka tícuya chixcú aquit. **26** Huixinín ni quilacanajlaniyáhu porque ni huá acxtum cátatapeksiyátit quiborregos huanti aquit cmaktakalhma. **27** Amakolh cristianos huanti aquit ccalimaxtuy cumu la quiborregos luu ccalakapasa y xlacán ná quintalakapasa, acxní takaxmata quintachuhuín tuncán quintastalaniy. **28** Y cumu quintalipáhuán aquit ccamaxquiy amá sasti latámat huantú luu xalíankalhíná natakalhiy y necxnicú catitalatzánkalh, nipara chatum tícu caquintimáklhtilh. **29** Quintlat nitícu lay makatalajay porque luu lanca xlacatzúcut, pus cumu huá Quintlat quimacamaxquinít eé quiborregos, nitícu lay quimaklhiy, nachuná cumu la Quintlat nitícu lay maklhiy huantú xlá kalhiy. **30** Porque Quintlat chu aquit luu lacxtum cmapeksinanáhu.

31 Amakolh judíos tasaquipá chíhuix laqui nata liactalanchipay Jesús. **32** Pero xlá chiné cahuánihilh:

—Cumu Quintlat kalhiy lanca limakatlihueke xlá quimatlahuinít lhuhua laclanca tascújut laqui nalicacniyátit; ¿xatúcuya tascújut ni lakatítit huantú ctláhualh pimpátit quilaliactalanchipayáhu?

33 Amakolh cristianos chiné takálhtilh:

—Ni caj xpálaceata lacuán mintascújut camán caliactalamakniyán, huá camán caliactalamakniyán porque huix talalacataquiniña Dios cumu

huana pi huix luu lacxtum tamapeksinana
másqui huix caj catihuá chixcú.

³⁴ Jesús cahuánilh:

—Lacatum nac libro antanícu tatzoknít xlíma-peksín Dios chiné huan: “Aquit ccáhuaniítán pi huixinín xtachuná cumu la Dios.” ³⁵ Aquinín stalanca catziyáhu pi huantü tatzoktahuilanít xta-chuhuín Dios nac líkalhtahuaka huák luu xli-cana, y acxni Dios chuná calimacán amakolh cristianos cumu la siculanán huantü xlá calak-macachinit xtachuhuín pus juerzaj quilicánaj-latcán. ³⁶ Aquit ccáhuaniítán xlacata pi Dios quilacsacnit y quimacaminit nac caquilhtamacú; bueno, ¿túcu chinchú lihuanátit pi ctalalacata-quinit cumu cuá pi aquit Xkahuasa Dios? ³⁷ Para aquit ni ctlahuama amá laclanca tascújut huantü huata Dios tlān tlahuay, entonces tlān ni caquila-canajlaníhu. ³⁸ Pero cumu chú aya ucxilhnítatit pi huá ctlahuama, másqui luu nilay caj quinta-chuhuín licánañlayátit pi quimacaminit Dios, pus siquiera huá calicánajlátit amá laclanca tascújut huantü ctlahuay. Huata huantü clacasquín pi luu lihuana cacatzítit pi Quintlat Dios lama nac quilatámät y aquit na antá clama nac xlatámät.

³⁹ Xlacán tasítzilh y xtalemputún nac pulachin, pero Jesús cätzalánih ⁴⁰ y alh nac aliquilhtuán kalhtuchoko huanicán Jordán antanícu Juan xcäkmunuma xapulh cristianos, y antá xlá tamákxtekli. ⁴¹ Luu lhuhua cristianos xtaán taucxilha huantü xlá xcatlahuay xtascújut y chiné xtahuán:

—Xlicána másqui Juan nítu catláhualh laclanca licácnít tascújut pero huantü xlá xlíchuhuinama

caj xp̄alacata eé chixcú xl̄icāna huāk chuná kantaxtuma.

⁴² Antá nac amá pulataman luu lhuhua cristianos talipáhua y tacanajlánih Jesús.

11

Xamigo Jesús xuanicán Lázaro lakniy xtajátat

¹ Maktum quilhtamacú nac aktum actzú cachiquín huanicán Betania antá xlama María, eé puscät huantí acalistán lítlahuapúxtulh Jesús xalacuán perfumes y na límalacscácalh xacchíxit.

² Antá xlá lacxtum xcatalama xnatalán, chatum xuanicán Marta y chatum xtalacán kahuasa xuanicán Lázaro. Cumu luu xamigo xuanit Jesús amá Lázaro, pero chú luu csnuñunít xp̄alacata xtajátat y luu xtatatlay.

³ Umakólh lactzumaján Marta y María tamacánilh tachuhuín Jesús laquí chiné nahuanicán:

—Quimpuchinacán Jesús, mi amigo Lázaro luu snuñ tataflay.

⁴ Acxni Jesús chuná huanikócalh eé tachuhuín xlá chiné huá:

—Huá xtajátat ni catiláknih; huata Dios ámaj limasiuyu huantu xlá kalhiy lanca xlimakatlhueke, y aquit Xkahuasa chú camán calimacahuaniyán aktum lanca quintascújut huantu naquilalilakachixcuhuiyáhu.

⁵ Jesús luu xcalakalhamán María, Marta y Lázaro,

⁶ pero acxni huanícalh pi Lázaro xtatatlay xlá tamakxtekchicú aktiy quilhtamacú nac amá cachiquín antanícu xlama. ⁷ Y hasta xlituxama chiné cahuánih xdiscípulos:

—Lanchú naanáhu nac Judea.

8 Xlacán tahuánilh;

—Mäkalhtahuakená, ¿túcu chú luu lakpina antá? Porque luu ninaj para makás quilhtamacú amäkolh xanapuxcun judíos huantí antá xalanín xtaamán taliactalamakniyán chíhuix.

9 Jesús chiné cahuánilh:

—¿Lácu pi ni catziyátit pi aktum quilhtamacú kalhiy akcutiy hora? Y huantí talakchokoy nac cacuhuiní ni akchekxnín porque xlá lilacahuánán amá taxkáket huantú tasiyuy nac cacuhuiní.
10 Pero amá huantí talakchokoy nac cätzisní juerza akchekxnín porque luu capucsua y tzankaniy taxkáket huantú nalilacahuánán.

11 Acalistán Jesús chiné cahuánilh:

—Xahuachí amá quiamigojcán Lázaro aya lhtatanít pero chú aquit nacán mälakahuaniy.

12-13 Amäkolh discípulos xtalacpuhuán pi max caj luu lacatítum clhtatama Lázaro pus huá xpälacata talihuánilh Jesús:

—Quimpuchinacán, para Lázaro lhtatama pus max ahuayu natatlantiy.

Cumu xlacán luu nipara taakátxksli huantú xlá xuaniputún xlacata pi Lázaro aya xninit,
14 pus huá xpälacata Jesús luu lacatancs cämälacapütuncuhuínilh, y chiné cahuánilh:

—Lázaro juerza ninjt. **15** Y aquit luu clipaxuhuay xlacata pi ni antá xacuilachá acxní xlá nilh. Luu xlícaña tlán pi chuná quitáxtulh laquí amá huantú huixinín naucxilhátit nacalimacuaniyán y ątzinú lán naquilacanajlaniyáhu. Pero lanchú tuncán caáhu lakatayayáhu.

16 Y chäatum xdiscípulo Jesús huánti xuanicán Tomás y xtalimäpacuhuiy Gemelo, chiné cahuánilh xamakapitzín discípulos:

—Nä cataáhu aquinín quimäkalhtahuakenacán laquí mäsqui antá lacxtum catanicháhu para chuná naquitaxtuy.

Huá Jesús ti malacastacuaninán nac calinín

17-19 Lata nac Jerusalén hasta nac Betania juerza lacatzú xuanít máx cumu aktiy kilómetro aítat. Pus huá xpälacata luu lhühua judíos xtaanít talakatayay Marta xahua María laquí natamäkoxumixiy porque xninit xtäLázarojcán. Acxní Jesús chähn nac Betania aya xlema xliaktati quilhtamacú lata xmäcnucanít Lázaro. **20** Acxní huanícalh Marta pi xchima Jesús nac chiqui xlá lalihuán alh paxtoka, pero María antá tamákxtekli nac chiqui. **21** Acxní lákchähn antanícu xyá Jesús Marta chiné huánilh:

—Quimpuchinacán, para huix uú huila cahuá, quintalá ni xtínillh. **22** Pero mäsqui luu chuná, aquit ccatziy pi Dios namäxquiyán lañachá túcu huix nasquiniya.

23 Jesús chiné huánilh:

—MintäLázaro nalatamäparay nac caquilhtamacú.

24 Marta chiné kálhtilh:

—Xlicana xlá pi nalatamäparay, pero acxní natalacastacuanán nin nac calinín acxní nalachán ahuatá amá quilhtamacú.

25 Y acxnitiyá Jesús chiné huánilh:

—Aquit amá huánti malacastacuaninán nac calinín, y nä aquit huánti xlicana mastay latámat, huánti naquiliipahuán mäsqui canilh pero aquit

nacmaxquiparay xlatámat. ²⁶ Y xlihuák əmäkolh huánti lamajcú xastacná y para lípahuán quintachuún aquit nacmaxquiy xasasti latámat laqui niaj nécxni catínlh. Chinchú huix, ¿pi quinca-najlaniya huántu aquit clítachuhuínanitán? — huánilh Jesús.

²⁷ Xlá chiné kálhtilh:

—Quimpuchiná, aquit luu xlicana ccanajlay pi huix Cristo Xkahuasa Dios huanti xlimínt xuanít nac caqUILhtamacú laqui naquincalákmäxtuyán.

Jesús tasay antanícu xmäcnucanit Lázaro

²⁸ Acxní chuná huanikolh, Marta lalíhuán alh tasaniy xtāMaría y chiné tzék huánilh:

—Acu luu chilh Quimpuchinacán Jesús, mat calakpi porque tachuhuínamputunán.

²⁹ Acxní chuná kaxmatkolh huántu huanícalh, María lalíhuán týalh y lákalh Jesús, ³⁰ porque Jesús niɑ xtanuyächá nac cachiquín, huata xlá antacú xlaya antanícu xtatanoklhñitanchá Marta.

³¹ Y əmäkolh judíos huánti xtaminít talakatayay laqui natamäkoxumixiy, acxní taúcxilhli pi María huákaj týalh y táxtulh, xlacán lalíhuán tastalánilh porque talacpúhua pi máx caj xámaj tasay antaní xmäcnucanit xtalá. ³² Acxní chalh María antaní xyá Jesús, xlá lakatatzokóstalh nac xtantún y chiné huánilh:

—Quimpuchinacán, para huix uú huila cahuá quintalá ni xtínlh.

³³ Acxní Jesús úcxilhli pi tzúcuhla tasay María xahua əmäkolh lactalipahu judíos huánti xtalakminít, xlá luu snuŋ lípúhua hasta nac xnacú.

³⁴ Acalistán chiné cäkalhásquilh:

—¿Nícu chinchú mācnunitátit mintalacán?

Xlacán chiné takálhtílh:

—Quimpuchinacán, catat laqui naccamasiyu-niyán antanícu cmācnunitáhu.

³⁵ Jesúz tacháncalh antanícu xmācnucanit, y antá tzúculh laktasay Lázaro. ³⁶ Makapitzín judíos huánti antá xtalayánalh chiné tzúculh tahuán:

—Luu xlicána xpaxquiy xamigo huá lìlaktasay.

³⁷ Pero makapitzín chiné xtahuamparay:

—Huá eé chixcú huánti timalacatlántílh chatum lakaxóko, ¿lácu pi nilay chú xtitláhuáhl aktum lanca xtascújut laqui ni xtínjh Lázaro?

Lázaro lacastacuanán nac calinín

³⁸ Antaní xmācnucanit Lázaro caj xlacahuax-canit talhpán y antá xlilakatalacanit lanca chí-huix. Cumu latiyá Jesúz snun xlipuhuama antá xlá talacatzúhuílh, ³⁹ y chiné cahuánih huánti xtalayánalh:

—Camatakenútit tamá chíhuix huántu lìlakatalacanit.

—Quimpuchinacán, max ahuayu aya quincale-rama porque aya tatiimayá laṭa tíñlh —huánih Marta.

⁴⁰ Pero Jesúz huánih:

—¿Lácu pi niaj pastaca pi cuanín, para xlicána quilipahuana, pus pímpat ucxilha xlimakatlhueke Dios?

⁴¹ Huata niaj tícu māaklhúhuílh, y mātakenu-calh amá chíhuix. Jesúz lácálh nac akapún y chiné kalhtahuakánih Dios:

—Papá Dios, cpaxcatcatziníyán pi huix kaxpatnīta quintachuhuín. ⁴² Aquit ccatziy pi ankalhiná quinkaxpatniya y tlahuaya

huántu climaksquinán, pero huá xpápacata clikalhtahuakanimán laqui umatókh cristianos huánti uú tayánalh natakaxmata y natacānajlay pi xlicāna huix quimacatanita.

⁴³ Acxní chuná huankolh eé tachuhuín, palha chiné quilhánih amá nin:

—;Lázaro, cataxtuchita antaní tanúpat!

⁴⁴ Amá nin taxtuchi, chunatiyá lata timacnúcalh lihuana litamaksnattamanit lacpitzu lhákát lata nac xmacanín hasta nac xtantún, chu nac xlacán na xtalakatlapanit. Jesús chiné cahuánih:

—Lalihuán caxcúttit laqui tlán natlahuán.

Lilacchuhuinancán lácu natlahuacán laqui namaknicán Jesús

(Mateo 26.1-5; Marcos 14.1-2; Lucas 22.1-2)

⁴⁵ Amakolh judíos huánti xtaanit talakapaxialhnán María lhuhua huánti tacānajlánih acxni xlacán taúcxilhli la malacastacuánih Lázaro nac calinín. ⁴⁶ Pero makapitzín huánti taúcxilhli huantü xlanit lalihuán talákalh fariseos y tahuánih lata túcua xtlahuanit Jesús. ⁴⁷ Xlihuák fariseos chu xanapuxcun cura talamástokli y tzúculh talichuhuinán túcu natatlahuay Jesús y tzúculh tahuán:

—¿Túcu natlahuayáhu? Porque tamá chixcú luu lhuhua laclanca tascújut tlahuama. ⁴⁸ Para aquinín nitúcu nahuanáhu y chunatiyá namakxtekáhu calatamakelh atzinú luu lhuhua cristianos natalipahuán, y amakolh mapeksinanín romanos natamín laqui naquincalakponkaniyán lanca quimpusiculancán y namasputúnancán nac quimpulatamancán porque xlacán natalacpuhuán pi caj catalalacatahuacamánáhu.

49 Amá c̄ata huá xm̄apeksinán Caifás porque huá xapuxcū cura xuanít. Huata xlá chiné c̄ahuánilh:

—Huixinín nitúcu catziyátit, **50** y nipara tzinú akatäksátit pi xalihuaca tlān canilh eé caj chātum chixcú y ni xliputum cristianos xala eé cachiquín catanikolh.

51 Pero Caifás ni huá sacstu xtalacapästacni masqui chuná chuhuínalh, porque cumu huá xapuxcu cura xuanít amá c̄ata, huata huá xtalacapästacni Dios chuhuínalh xlacata pi Jesús xamácalh maknicán laquí chuná nacalakmaxtuy judíos huanti antá xtalamánalh. **52** Y nachuna litum catziyáhu pi ni caj xpalacata eé xcachiquincán judíos xámaj niy, huata na huá xpalacatacán xlihuak xcamanán Dios huanti luu xaaktzankán talamánalh laquí lacxtum nacalakmaxtuy. **53** Hasta acxnitiyá amá quilhtamacú amäkolh xanapuxcun judíos luu lacxtum talicátzilh y tzúculh talacputzay lácu natatlahuay laquí natamakniy Jesús.

54 Huata xlá tatampúxtulh nac xapulataman Judea y alh lacatzú nac desierto nac aktum actzú cachiquín huanicán Efraín y antá xcatalamächá xdiscípulos, y niaj luu xcatasiyuniy antaní putum tayánalh judíos.

55 Niaj makásaya xtalacatzuhuima xpäxcuajcán judíos huanicán taakspuntzalín, y luu lhuhua cristianos xtaamánalh nac Jerusalén laquí natamakantaxtiy huantü xtalismaninit; y makapitzín luu lacapala xtachämpütún lihuán niä xlachchán paxcua laquí nacapalhmakanicán lata túcua xcapasanit xala caquilhtamacú. **56-57** Amäkolh

fariseos chu xanapuxcun cura xtalimapeksinanit, pi para tícu xcatziy nícu huí Jesús camálagsiyulh laqui xlacán tlán natachipay y natatamacnu y nac pulachin. Lhuhua huantí xtalacaputzamánalh Jesús acxní antá xtahuilánalh nac lanca pusiculan y chatunu chatunu xtalakalhasquín:

—¿Lácu huixinín lacpuhuanátit, namin cahuá
Jesús nac paxcua, o ni catímilh?

12

*Chatum puscat lítutlahuapuxtuy perfume Jesús
(Mateo 26.6-13; Marcos 14.3-9)*

¹ Akchaxán quilhtamacú xtzankay laṭa nalak-chán paxcua nac Jerusalén, Jesús alh nac Beta-nia antaní xcachiquín Lázaro huanti xmalacas-tacuaninjt nac calinín. ² Antá xlá tahuayánca nac xchic Lázaro, Marta xcāmajunima xtahuajcán. ³ Caj xamaktum María límilh pātum lanca lameta xatlán perfume xla nardo xánat, luu tapara xlá xuanit xtapalh amá perfume; xlá lilactlahuapúxtulh Jesús y acalistán tzúculh lilacxacay xacchíxit, y laṭa xlicalanca chiqui tzúculh mucsún amá perfume. ⁴ Amá xdiscípulo huatiyá tī acalistán macamástalh huanti xuanicán Judas Iscariote xka-huasa Simón, xlá chiné cahuánilh xamakapitzín:

5 —¿Lácu caj páxcat litlahuácalh eé perfume?
Huata mejor caj xtistácalh xtapalh xuanit max
cumu aktutu ciento denario tumín, y laqui huá
xticalimaktayácalh huanti laklimaxkenín.

⁶ Pero ni xlacata para luu xlicána Judas xcalaka-lhamán lacpobre huá chuná lichuhuínalh, pus huata huá chuná lichuhuínalh porque xlá luu marí

xlakcatzán y xlakatiy tumín, y xáhuachí cumu huá xmácuentajlícán bolsa huántu xpumáquicán tumín y antá xlá tzék xmácututílhay. ⁷ Jesúz chiné huánihl:

—Nichuná cahuani, porque xlá aya alisok caxtlahuama lata lácu xmamucsícalh quimacni acxní aquit xquimacnúcalh. ⁸ Nachunaliítum amakolh huánti luu lacpobre, ankalhiná catalapátit nahuán y huixinín tlan nacamaktayayátit acxní chuná nalacpuhuanátit, pero aquit niaj luu makas quilhtamacú ccatalamán.

Lilacchuhuinancán pi na namaknicán Lázaro

⁹ Luu lhuhua judíos huánti aya xtachaníttá nac xapaxcua Jerusalén, antá tacatzichá pi Jesúz xchinít nac Betania, antá putum táalh laqui nataucxilha, y na nataucxilha amá Lázaro huánti xlá xmalacastacuaninit nac calinín. ¹⁰ Amakolh xanapuxcún cura lacxtum talicátzilh laqui na natamakniy Lázaro, ¹¹ porque caj huá xpápacata mäsqui luu lhuhua judíos niaj xtacanajlaniy porque huata huá xtacanajlaniy Jesúz pi xlíçana Dios xmacaminít.

Jesús tanuyachá nac xacachiquín Jerusalén (Mateo 21.1-11; Marcos 11.1-11; Lucas 19.28-40)

¹² Lichalí amá quilhtamacú luu lhuhua amakolh cristianos huánti xtaminít nac xapaxcua taak-spuntzalín, acxní tacátzilh pi Jesúz xámaj chan nac Jerusalén, ¹³ tzúcult tacay xapalhma mókot y huá táalh talipaxtoka. Nac tiji xlacán chiné tzúculh tamatasiy:

—¡Luu clakachixcuhuuiyáhu Dios! ¡Luu lipaxúhu cmakamaklhtináhu úmá Quimpuchinacán huantí xlá macamima! ¡Ankalhiná xatasiculanatláhu cahuá eé chixcú huantí Quireycán nahuán úú nac Israel!

¹⁴ Jesú xpumima tantum actzú burru huantú csacuanit, chuná xlá limakantáxtih huantú xtatzoknít xpälacata nac likalhtahuaka antaní chiné huán:

¹⁵ Ní capēcuántit huixinín cristianos huantí hilátit nac Jerusalén;

huata mejor capaxuhuátit y caucxílhtit mireycán huantí nacamapeksiyán,

xlá pumima tantum burru.

¹⁶ Xtamäkalhtahuakén Jesú nipara xtaakataksmánalh huantú luu xquitaxtuma, pero acxni aya xlacastacuananit nac calinín acu luu taaká-taksli porque acxnicú xlacán talacapástaclí pi chuná xtatzoktahuilanit huantú xlá xámaj okspulay Jesú, y luu xlícaná chuná xquitaxtuninit.

¹⁷ Amäkolh cristianos huantí xtaquilanit nac Betania y ná antá xtatayánalh Jesú acxni xlá xmalacastacuaninít nac calinín Lázaro xtasaxtunít nac xtahuaxni antaní xmäcnuçanit, xlacán canihuá xtalichuhuinanit nac Jerusalén huantú xtaquiucoxilhnít. ¹⁸ Pus huá xpälacata luu lhuhua cristianos táalh talipaxtoka porque aya xcalitachuhuinancanit huantú xlá xtlahuanit lanca xta-scújut y xtalakachixcuhiuputún. ¹⁹ Pero amäkolh fariseos xlacán ní talakátih y chiné tzúculh tala-huaniy:

—Luu caj caucxílhtit la aquinín niaj tū catilitaxtúhu, porque lata xlilhuhua cristianos talakán y talipahuán tamá chixcú.

Makapitzín griegos tatachuhuinamputún Jesús

²⁰ Luu lhuhua judíos huantí xtaminítanchá nac aktum pulatamān huanicán Grecia nā antá xtaminít talakachixcuhuinán nac Jerusalén lihuán xlama xapaxcua taakspuntzalín. ²¹ Xlacán talak-talacatzúhuilh Felipe huantí xalac Betsaida y chiné tahuánilh:

—Clakapasputunáhu y ctachuhuinamputunáhu mimäkalhtahuakēnacán Jesús.

²² Felipe litachuhuinalh Andrés y xchatiycán táalh tahuaniy Jesús huantú xtalacasquín amäkolh lacchixcuhuín. ²³ Jesús chiné cahuánilh:

—Lanchú aya lakchanít quilhtamacú acxní aquit Xatalacsacni Chixcú cámaj mäsiyyuy quiliimakatlhueke y nactaspitparay nac akapún porque naquimaknicán. ²⁴ Pero xlícaná ccahuaniyán pi acxní nacniy xtachuná nalitaxtuy cumu la okspulay aktum actzú cuxi huantú chancán, acxní tamayachá nac catiyatni xlícaná pi naniy nac xnacú, pero xlá acalistán naakpún y luu lhuhua nahuán xtahuácat. Pero para ni xtamächá nac catiyatni y ni xnihil nac xnacú, necxnicú luu catimástalh lhuhua xtahuácat. ²⁵ Amá chixcú huantí luu xlícaná lakcatzán y ni makatzankaputún xlatámat, huata xlá ámaj makatzankay huantú lakcatzán; pero huantí ni lakcatzán xlatámat para namakatzankay uú nac caquilhtamacú, huata xlá ámaj makamaklhtinán amá xaxlicana latámat huantú necxni laksputa.

26 Para tícu luu xlicana quidiscípulo huamputún y aktum catziy naquiliipáhuán, pus caquistálánih; porque huánti naquimacuaniy antá ná huij nahuán antanícu aquit nactahuilay, y amá huánti naquimacuaniy nac xlatámät Quintlat luu napaxquiy.

Jesús lichuhuinán pi namaknicán

27 'Lanchú luu xlicana akatiyuj clama, hasta ni ccatziy túcu luu nacuán. ¿Tlān cahuá para xackalhtahuakánih chiné Dios: "Papá Dios, xtlahua lanca litlán, xquilkmaxtu laqui ni xacpátilh huantu lanchú ámaj quiokspulay"? Pero ni lay chuná nacuán porque luu caj huá quilimacaminít uú nac cäquilhtamacú.

28 Huata Jesús aktum tapaxuhuán chiné kalhta-huakánih Dios:

—Papá Dios, xlicana catlahua nac quilatámät huantu huix luu matlantiya laqui chuná xlihuák cristianos luu natacānajlay pi kalhiya lanca litlihueke.

Acxnitiyá amá takáxmatli aktum tachuhuín huantu minchá nac akapún y chiné huá:

—Aquit aya cmasiyunit nac milatámät huantu xlicana clakatiy natlahuacán, pero amaktum nac-masiyuparay amá lanca quilimakatlihueke acxni huix namaknicana y laqui chuná naquililakachix-cuhuicán huantu naokspulayán.

29 Lhuhua cristianos huánti takáxmatli eé tachuhuín tzúcuhuán pi mat caj jílilh, y makapitzín xtahuán pi mat chatum xángel Dios xtachuhuinanit. **30** Pero Jesús chiné cahuánih:

—Huixinín cälakmacatancántit amá tachuhuín laqui nakaxpatátit, porque ni huá litakáxmatli

laqui aquit naquilimacuaniy sinoque huata huixinín. ³¹ Porque lanchú aya lakcháñit quilhtamacú acxní xlihuák cristianos xala eé caquilhtamacú namaxokonjicán xpalacata xtalakalhincán, y amá akskahuiní huantí luu camapeksiy cristianos huantí xalaktzankán talamánalh nac caquilhtamacú chú luu aya lakcháñit hora acxní xlá maktum tū namaklhticán xlimapeksín. ³² Ná aya lakcháma quilhtamacú acxní aquit naquixtokohuacacán tálhmán nac cruz, pero caj huá xpalacata eé cruz luu lhuhua cristianos naquintalipahuán.

³³ Caj laña huantú xlá xlíchuhuinama antá xuamputún lácu xamácalh maknicán nac cruz. ³⁴ Pero amakolh cristianos chiné takálhtilh:

—Para huix xlícaná Cristo, ¿lácu huix líhuana pi pímpat niya? Porque aquinín ccatziyáhu pi nac xtachuhuín Dios huantú tatzoktahuilanit nac likalhtahuaka antá huan xlacata pi amá Cristo huantí namín quincalakmáxtuyán anka-lhiná ámaj latamay. Pero chinchú huana pi huix Xatalacsacni Chixcú pimpaca maknicana, osuchí ¿tícuja chixcú amá huantí huix líchuhuinámpat?

³⁵ Jesús chiné cakálhtilh:

—Aquit nacticalimalacahuaniyancú eé quintaxkáket pero niaj luu makas quilhtamacú, pus huá xpalacata ccálihuaniyán líhuán huí taxkáket luu calipahuántit y lanchú líhuana catlahuántit, laqui nitúcu nalacpuhuanátit acxní namín hora la nacapucusuán, xlihuák cristianos huantí tatlahuán acxní capucsua xlacán nilay tamaclay tiji. ³⁶ Líhuán lanchú kalhiyátit taxkáket, luu xlícaná

calipahuántit laquí huixinín ná tlán nacamakskoniyátít xamakapitzín mintacristianoscán.

Acxni chuná cahuanikolh Jesús caakxtekyáhualh y catatzéknih.

Xamakán quilhtamacú aya xlíchuhuinanit profeta Isaías huantí ni catitalipáhualh Jesús

³⁷ Masqui luu lhuhua laclanca licácnit tascújut huantú xcálimálacahuaniñit Jesús huantú xlá tlán xcátlahuay, amakolh xanapuxcun judíos ní luu xtacanajlaniy. ³⁸ Pus juerza xlíkantáxtut xuanit huantú tilichuhuinalh profeta Isaías xpalcatacán huantí chuná takalhiy xkasatcán, porque xlá chiné titzóknulh:

Quimpuchinacán, ¿tícu chú luu canajlay huantú aquinín clichuhuinanáhu?

Lhuhua laclanca tascújut huantú huix calímalaca-huaniñita, pero ní tacanajlaniyán.

³⁹ Lhuhua amakolh cristianos huantí nilay xtali-pahuán Jesús xtachuná cumu lā xlíchuhuinanit profeta Isaías nac líkalhtahuaka acxni xlá chiné tatzoknumpá:

⁴⁰ Dios calímáxtulh cumu lā a catalatamachá lakan-xoko,

porque luu snún talanit nac xnacujcán.

Masqui luu takalhiy xlakastapucán lámpara ní talilacahuánán,

porque antá nac xnacujcán nítícu taliakataksa, hasta ní talákmilh amá huantí tlán xcámalacatlántilh.

⁴¹ Chuná xlá titzóknulh profeta Isaías masqui luu makán quilhtamacú tilichuhuinalh, pero xlá aya xucxilhacachima laclanca tascújut huantú xámaj tlahuay Jesús.

42 Pero ni luu huák tamákantáxtih eé tachu-huín, porque makapitzín láctalipahú judíos tacanajlánih Jesús, pero ni luu maktum xtahuán para xtalipahúan porque xtapecuaniy fariseos chicá nacatamacxtucán nac xpúsiculancán. **43** Porque umakolh lacchixcuhuín ątzinú xtalakatiy luu lactalipahu lacchixcuhuín cacalimáxtúcalh nac xlacatincán cristianos pero ni luu xtalacputzay lácu Dios nacalimáxtuy luu lactalipahu nac xlacatín.

Huantí ni canajlay xtachuhuín Jesús sacstu ámaj laktzankay

44 Maktum quilhtamacú Jesús luu palha chiné cahuánih cristianos:

—Acxni chatum cristiano quilipahuán ni caj xmán huá aquit quilipahuama, huata quitaxtuy pi na lacxtum lipahuáma Quintlat huantí quimacaminit. **45** Nachunalítum ámá cristiano huantí aquit quiucxilhá pus na chunatiyá ucxilhma lácu Quintlat huantí quimacaminit. **46** Aquit taxkáket cminít uú nac caquilhtamacú laquí nacca-malacahuaniy cristianos y laquí huantí naquili-pahuán niaj nac xalakacapucsua catitamákxtekli nac caquilhtamacú. **47** Amá cristiano huantí nakaxmata quintachuhuín pero ni natlahuay huantu antá clímapeksiy, pus ni aquit cactimalak-tzánkelh porque aquit nitú caj cminít mālaktzan-kenán nac caquilhtamacú, huata mejor caj cminít lakmáxtunún. **48** Pero amá chixcú huantí nitú qui-liucxilhá y caj lakkamán huantu kaxmata quintachuhuín, pus xlá aya huí huantu nalimálacapucán porque huata huá quintapéksit huantu kaxmatnít ámaj mālaktzankey acxni nalakchán amá ahuata

quilhtamacú laṭa naputzananicán xcuenta. ⁴⁹ Xli-huak huantú ccahuaninítán huak huá Quintlat chuná quilimapeksinit naccāhuaniyán, poreso nítu cchuhuinama huantú caj quecstu quintalacapastaci. ⁵⁰ Aquit ccatziy pi xlihuak xlimapeksín Quintlat luu xlicana mastay tlān talacapastaci laquí tlān nakalhīyátit amá latámāt huantú necxni laksputa, pus huá xlacata amá tachuhuín huantú aquit cuan huá quimacatzininit Quintlat pi chuná nacuán.

13

Jesús catučhekey xtamakalhtahuakén

¹ Ahuata amá quilhtamacú xmakotaninama porque aya xlakchán xapaxcua taakspuntzalín, Jesús stalanca xcatziy pi aya xlakchānit hora laṭa lácū natapaquiy nac cāquilhtamacú laquí nala-kamparay Xtlat. Xlá luu xlicana xcápaxquinit huantí xcalacsacnít nac cāquilhtamacú, y nā luu ankalhiná capáxquilh y camaktáyalh hasta acxni nilh. ²⁻⁴ Pero huata xkahuasa Simón Iscariote xuanicán Judas, xlá aya xmālacpuhuāninit aksahuiní laquí namacamastay Jesús nac xmacán huantí xtasitziniy. Jesús stalanca xcatziy pi xlihuak xlitlihueke chu xlimapeksín huantú xlá xka-lhīy huak huá xmaxquinit Dios porque antá nac xpaxtún xminitanchá y chū antiyá nalakamparay antaní huilachá nac akapún. Pero luu ątzinú xcāmāsiyuniputún pi luu xcápaxquiy, ąhuatiyá amá cātzisní acxní xlacán xtahuayamánalh Jesús huákaj tayahalh, mactáctalh mactum clhákāt huantú xmactahuacay y tampulaktáhui mactum toalla.

5 Acalistán májulh chúchut nac pektum actzu bandeja y tzúculh cätuchekey xtamäkalhtahuakén y xcälituxacatilhay amá toalla huántu xtampulakui.

6 Acxní xámaj tūchekey Pedro xlá ni lacásquilh y chiné huánih:
—Quimpuchinacán, ¿lácu chú la eé quítaxtuy,

huix quimäkalhtahuakenacán y huata quilälacchekemanáhu?

7 Jesús chiné kálhtilh:

—Lanchú huix ni akataksa huántu ctlahuama, pero acalistán namín quíltamacú acxní huix luu naakataksa.

8 Pedro huanipá:

—Pus aquit lacatancs ni clacasquín naquintuchekeya porque ni quimininiy huata huix naquíliscuja.

Jesús huanipá:

—Para ni lacasquina nactuchekeyán, huix ni lay catilitaxtu quintamäkalhtahuakén huánti luu xlicana quilipahuán.

9 —¡Oh, pues para chuná naquítaxtuy, huata ni caj xmán caquintucheke, mejor na cacheke quimacnín chu quiakxåka! —huánih Pedro.

10 Huata xlá chiné kalhtipá:

—Huánti acu paxkonit, ni xajuerza tuncán napaxparay, huata caj xmán talacasquín pi natuchakán, porque la ta xlilanca nac xmacni luu macscarancu; huixinín huák macuán lapátit mäsqui ni luu mimpütumcán.

11 Jesús luu stalanca xcatziy tícu xámaj macamästay pus huá chuná cälihuánih: “Huák macuán lapátit mäsqui ni mimpütumcán.”

12 Acxní cātucekēkolh xdiscípulos Jesús mactahuacapá ámá lhákāt huántu xmactahuacay, tahuilapá nac mesa y chiné cāhuánilh:

—¿Pi akataksátit túcu luu xpälacata ccalítuche-kenítán? **13** Huixinín huanátit pi aquit mimakalhtahuakenacán y mimpuchinacán. Luu xlicána huántu huixinín huanátit porque aquit mimpuchinacán. **14** Pues cumu aquit mimakalhtahuakenacán chu mimpuchinacán nipara tzinú lanca quimaklhcatzicán quecstu y hasta ccatučhekenítán huixinín huantí caj quintamakalhtahuakén, pus chū nachuná chū huixinín luu cāmininiyán nalaliscujapítit chatum achatum cumu lámpara laq calatuchekepítit. **15** Pues chuná aquit ccalimasiyuninitán huantuctláhualh laqui nachuná huixinín natlahuayátit. **16** Xlicána lacatancs ccahuaniyán, pi nipara chatum caj tasacua nalacpuhuán pi atzinú xlá talipáhu ni xachuná xpatrón; y nachuna lítum amá lacscujni huantí malenimácalh aktum luu xlacasquinca tachuhuín, ni nalacpuhuán pi atzinú xlá talipáhu ni xachuná huantí maleninama. **17** Para huixinín akataksátit huantu aquit ctlahuanit y nalatzaksayátit ámá quilímapeksín luu xlicána lipaxúhu lapátit nahuán.

18 'Ni miliputumcán calakchanán eé huantu aquit ccalítachuhuinamán, porque aquit stalanca ccatziy xaticu luu clacsacnít porque clakapasa huantu huí nac minacujcán chatum chatum, pero juerza ámaj kantaxtuy nac quilatámat huantu tatzoktahuilanit nac likalhtahuaka antaní chiné huan: "Amá huantí lacxtum xquintahuayama ámaj quimacamastay." **19** Alisok ccalítachuhuinamán huantu ámaj quiokspulay laqui acxní huák

nakantaxtukoy pues huixinín nacatziyátit pi quintachuhuín huák talulóktat huántu ccahuaniñitán caj quimpalacata. ²⁰ Chú luu ccahuaniyán pi huánti ya tapaxuhuán namakamaklhtinán amá huánti aquit nacmacán laquí nalichuhuínán quintachuhuín, pus tamá cristiano xtachuná qui-taxtuy cumu lámpara aquit quimakamaklhtinama, y amá huánti aquit quimakamaklhtinán na luu chunatiyá quitaxtuy cumu lámpara Quintlat makamaklhtinama huánti quimacaminít.

*Jesús lichuhuínán pi Judas namacamastáy
(Mateo 26.20-25; Marcos 14.17-21; Lucas 22.21-23)*

²¹ Acxni Chuná huankolh, Jesús luu xlícanalipúhua nac xnacú caj xpalacata huántu xkantaxtuma, huata xlá luu lacatancs camálacaputuncuhuínilh xtamákalhtahuakén y chiné cahuánilh:

—Xlicana luu clipuhuán caj xpalacata huántu ccahuanimán pi lata miliputumcán nataxtuyachá chatum huánti naquimacamastay.

²² Huata amákolh xtamákalhtahuakén cacs talacahuankolh porque xlacán ni xtacatziy xatícu luu xuanima. ²³ Y amá xtamákalhtahuakén Jesús huántu luu xpaxquiy luu lacxtum xpaxtuhui xtahuayama, ²⁴ huata Simón Pedro tzék tzúcuhu limacahuán xmacán laquí nakalhasquín xatícu luu xuanima. ²⁵ Y amá xtamákalhtahuakén tzinú sij lákah antaní xuí y chiné kalhásquilh:

—Quimpuchinacán, ¿xatícu huix luu lichuhuínampat?

²⁶ Jesús chiné kálhtilh:

—Para catziputuna pus caúcxilhti, aquit cámaj lilupa tahuá actzu caxtilánchahu y huanti aquit nacmáxquiy pus huá amá huanti clichuhuínama.

Xlá chuná tláhualh lílupli tahuá actzu caxtilánchahu y huá máxquih Judas Iscariote xkahuasa Simón. ²⁷ Acxní Judas maklhtínalh amá caxtilánchahu xlá hualh, y acxnicú akskuhiní tánulh nac xnacú, y Jesús chiné huánilh:

—Huantu huix pímpat makantaxtiya lalihuán catlahua.

²⁸ Pero xlihuák xamakapitzín apóstoles huanti xtamakuayamánalh nac mesa nitícu akátxksli lácu chuná lihuánilh. ²⁹ Cumu tesorero xlimaxtucanít Judas, huá xcámaxquiy tumín, makapitzín talacpúhua pi máx huá xuaniputún xlacata caramáhualh para túcu huantu namaclacasquincán nac paxcua osuchi para túcu nacatajicán laklimáxkenin.

³⁰ Acxní Judas maklhtinankolh caxtilánchahu xlá lalihuán táxtulh, cumu aya cätzisatá xuanít nitícu cátzilh xanícu luu alh.

Xasasti limapeksín

³¹ Acxní taxtukolh Judas, Jesús chiné cahuánilh xamakapitzín xtamakalhtahuakén:

—Lanchú aya lakcháñit quilhtamacú acxní xlihuák cristianos natauxilha amá lanca quili-makatlihueke huantu aquit Xatalacsacni Chixcú ckalhiy, Dios ná amaj màsiyuy amá lanca xli-makatlihueke antá nac quilatámat. ³² Pus cumu aquit cmàsiyuma xlimakatlihueke Dios, xlá ná amaj màsiyuy huantu aquit ckalhiy quili-makatlihueke acxní nacpatinán, y luu niaj para makás la

xlá ámaj məsiyuy. ³³ Koxutanín huixinín quinca-
manán, chú luu niaj makas ccatalamán. Huixinín
naquiliaputzayáhu pero niaj naquintilaucxilhui;
nachuná chú ccəhuaniyán cumu lə ccəhuani
xanapuxcún judíos, huixinín nilay catipítit anta-
nícu aquit cama. ³⁴ Y cumu chú nacán nac akapún,
huixinín stalanca catziyátit lə aquit ccapaxqui-
nitán, pus huá eé ccəlimaxquiyán xasasti quilima-
peksín xlacata pí calapaxquítit chatum achatum
xlihuək minacujcán chuná cumu lə aquit ccapax-
quinitán. ³⁵ Para huixinín nalapaxquiyátit chuná
cumu lə ccəhuaniinitán, xliputum cristianos nata-
catziy pí xlacana huixinín quintamakalhtahuakén
huantí quintastalanimánalh y quintalipahuán.

*Jesús lichuhuinán xlacata Pedro nahuán pi ni
lakapasa*

(Mateo 26.31-35; Marcos 14.27-31; Lucas 22.31-34)

³⁶ —Quimpuchinacán, ¿nícu luu chipímpat? —
kalhásquilh Pedro.

—Antanícu aquit cama huix nilay caquintista-
lani lanchú —kálhtilh Jesús.

³⁷ —Quimpuchinacán, ¿túcu chú xpəlacata
lanchú nilay clistalaniyán? Xlicana aquit aktum
ccatziy məsqui xamacamástalh quilitamət caj
mimpəlacata —huampá Pedro.

³⁸ Y Jesús chiné huánilh:

—Pedro, ¿luu xlacana aktum catziya məsqui
xmacamasta milatamət caj quimpalacata?
Pus chú luu xlacana cuaniyán pí huatiyá
eé tzisní acxni niə tasay nahuán puyu huix

maktutu nahuana pi ni quilakapasa acxní nakalhasquincana.

14

Jesús litaxtuy cumu la tiji huantü lacchancán nac xpaxtún Dios

¹ 'Ní luu akatiyuj calatapátit y ni para calipú-hualh minacujcán, calipahuántit Dios y nachuná caquilalipahuáhu aquit. ² Aquit lacatancs cca-huaniyán pi nac xchic Quintlat luu lhuhua huila-kolh putáhuilh antanícu tlän tahuilacán; para nítu cahuá aquit lacatancs xacticahuanín. Pero luu lacatancs porque aquit nítu ccaakskahuimán, pus chú aquit cama laqui naccacaxtlahuaniyán aktum putáhuilh antaní natahuilayátit. ³ Y acxní aya naccacaxtlahuakoy aquit nacmimparay amaktum laqui chú naccalenán, pus antanícu aquit nactahuilay huixinín ná antá natahuilayátit. ⁴ Huixinín aya catziyátit antanícu aquit cámaj chán, xáhuachí aya lakapasátit xatiji huantü lacchancán.

⁵ Huata Tomás chiné huánlh:

—Quimpuchinacán, aquinín ni ccatziyáhu nícu huix pímpat chipina, ¿lácu chú naclícatziyáhu xatiji huantü lacchancán?

⁶ Jesús chiné kálhtílh:

—Aquit amá tiji, aquit talulóktat, y ná aquit cmastay latámat. Para tícu aquit quilipahuán pus huata xlá tlän nalakchán antaní huilachá Quintlat. ⁷ Acxní ná xquilalakapasáhu ná ni luu xla-kapasátit Quintlat, pero cumu huixinín quilalaka-pasáhu aquit clacpuhuán pi luu lacatancs lakapa-sátit chú porque ankalhiná ucxilhpátit.

8 —Quimpuchinacán, pus cañacaj Mintlat Dios caquilmálapasníhu —huánih Felipe.

Huantí lakapasa Jesús na lakapasa Dios lácu xlá

9 Jesús kálhtílh:

—Felipe, mákasá quilhtamacú lata ccatalamán. ¿Tu luu ni naj quilakapasa? Huantí aquit quiucxilha pus ná huatiyá ucxilhma lácu Quintlat, ¿túcu chinchú xlacata quilihuaniya caccamálapasnín Quintlat? **10** ¿Lácu pi ni luu canajlaya xlacata pi aquit lacxtum ctálama Quintlat, y náchuná xlá antá lama nac quilitámat? Lata túcu aquit ccalimapeksiyán ni caj quecstu quintapuhuán masqui chuná cuan, pus huata huá xlá lama nac quilitámat y quimaclacascuima laquí nactlahuay xtascújut. **11** Pus cana caj cacanajlátit pi aquit lacxtum ctálama Quintlat y xlá ná antá lama nac quilitámat, xahuachí para luu nilay caj quintachuhuín licanajlayátit, pus siquiera huá caliccanajlátit amá laclanca tascújut huantú aquit ccatlahuanít nac milacatincán. **12** Xlicana ccahuaniyán pi huantí naquilipahuán amá chixcú xlá na nacatlahuay laclanca tascújut huantú aquit ctlahuay, y hasta atzinú xlá tlak laclanca licácnit tascújut nacatlahuay porque aquit cama antaní huilachá Quintlat. **13** Lata túcu huixinín nasquiniyátit Quintlat nac quintacuhuiní aquit naccamakchuhuinanachán laquí chuná nalitasiyuy xlimakatlihueke Dios caj quimpalacata. **14** Aquit luu ccalimákatzankeyán xlacata casquinítit Dios huantú huixinín mac-lacasquimpátit y latachá túcu nasquiniyátit nac quintacuhuiní aquit naccamaxquiyán.

Jesús malacnuy pi namacamín Espíritu Santo

15 'Para huixinín xlícaná quilapaxquiyáhu camakantaxtítit nac milatamatcán huántu lanchú ccalímapeksinítán. **16** Acxní aquit naclakchán Quintlat nacuaniy laqui xlá nacamacaminiyán chatum huánti nacamaktayayán y nacamaxquiyán licamama y xlá ankalhíná nacatalatamayán. **17** Pus huá amá Espíritu Santo huánti nacamakataksníkoyán xtalacapastaci Dios. Amakolh cristianos huánti ni talakapasa Dios y huánti ni takalhiy xtapuhuán, xlacán nilay tamaklhítnán nac xlatamatcán porque ni talakapasa y nia taucxilha laclanca xtascújut. Huixinín aya lakapasátit porque lanchú xlá aya catalamán, pero namín quilhtamacú acxní luu natamakxteka nac minacujcán canecxni cahuá quilhtamacú.

18 'Aquit necxni luu cacticakxtekmakán nac caquilhtamacú, huata nacmímparay laqui ankalhín naccatalatamayán. **19** Niaj makas quilhtamacú amakolh cristianos huánti uú xala caquilhtamacú niaj caquintitaúcxilhli porque cámaj niy, pero huixinín naquilaucxilhparayáhu porque nackalhiparay latámat; y cumu aquit clámaj nahuán xastacná huixinín ná nakalhiparayátit latámat acxní naniyátit. **20** Acxnitiyá chú amá quilhtamacú nacatziyátit pi aquit lacxtum ctálama Quintlat, y huixinín nachuná lacxtum quilatalamanáhu y aquit ccatalamán huixinín. **21** Amá cristiano huánti xlícaná quimpaxquiy xlá laktzaksay nac xlatámat huántu aquit clímapeksinán, y huánti aquit quimpaxquiy, Quintlat ná luu napaxquiy y nachuná aquit, xáhuachí aquit nacmactziníy

xnacú pi luu xlícaná ctalama nac xlatámät.

22 Y chatumlitum xtamakalhtahuakén huantí na xuanicán Judas pero ni huá Iscariote, xlá chiné huánihl:

—Quimpuchinacán, ¿túcu xpälacata líhuana pi aquinín luu naquilamasiyuniyáhu pi quilatalamanáhu? ¿Lácu pi ni huata huá caticatasiyuni xlíhuäk cristianos?

23 Jesús kálhtilh:

—Aquit cámaj catasiyuniy xlíhuäk amäkolh cristianos huantí quintapaxquiy, y huantí xlícaná luu quintapaxquiy xlacán natalatzaksay natatlahuay huantu aquit ccalimapeksiy, Quintlat na luu nacapaxquiy, pus aquit chu Quintlat lacxtum nacmináhu cátalatamayáhu nac xlatamätcán. **24** Amäkolh cristianos huantí ni quintapaxquiy pus xlacán ni catitatláhualh huantu aquit ccalimapeksiy, porque umá tachuhuín huantu huixinín lanchú kaxpatpátit ni caj quecstu quilá, pus huata huá xtachuhuín Quintlat huantí quimacaminít.

25 'Xlimakuacú pi cticatalamán huá chuná ccalihuanimán eé tachuhuín. **26** Y amá quilhtamacú acxní aquit aya canít nahuán, Quintlat namacamín Espíritu Santo laqui xlá nacamakta-yayán y nacamaxquiyán licamama; pero ni caj xmänhuá, porque xlá na luu líhuana nacamax-pastacayán xlíhuäk quintapéksit huantu ccamax-quinitán uú nac caquilhtamacú, xahuachí lhuhua huantu nacamakataksniyán huantu huixinín ni akataksátit lanchú.

27 'Aquit aya cama pero luu aktum tapaxuhuán ccatamakxtékán quintachuhuín porque xlícaná

huá mästay tacácsuat; uumá lanca tapaxuhuán xáhuá tacácsuat huántu aquit ccamaxquiyán ni xtachuná cumu la tu tamästay cristianos huánti uú xala caquilhtamacú, pus huá xpälacata hui-xinín ni capecuántit y ni calipuhuántit. ²⁸ Hui-xinín aya kaxpatnítátit huántu ccahuaniñ pi aquit camajá cámakxtekán pero na catziyátit pi nac-mimparay laqui acxtum naccatalatamayán; para luu xlícaná xquiliapaxquíhu aya xtilipaxuhuátit pi cama antaní huilachá Quintlat porque chuná xtapaxuhuán y xlá atzinú lanca xlacatzúcute ni xachuná aquit. ²⁹ Alisok aquit ccahuanimán huántu naquiokspulay laqui acxní chuná nakantaxtuy latiyá naquiliapahuanáhu.

³⁰ 'Huá chuná ccalihuanimán porque niaj lay makas cacticatachuhuinán cumu aya talacatzuhuima quilhtamacú acxní akskahuini huánti uú luu mapeksinán nac caquilhtamacú xcáztit ámaj quilikamanán, mäsqi chuná chú, xlá nitu kalhiy lítlihueke laqui tlán naquimakatlajay huántu aquit quillacata. ³¹ Pero juerza chuná nakantaxtuy huántu quilimacamincanit laqui xlíhuák cristianos huánti uú xala caquilhtamacú natacatziy pi xlícaná aquit cpaxquiy Quintlat y huák ckalhakaxmatma huántu xlá quintilimapéksilh.

Acalistán Jesús cálimapéksilh xtamäkalhta-huakén:

—Lalihuán catayátit y cahuá.

15

Jesús lítaxtuy cumu la pukalhtum tachanán xla uvá

1 Acalistán Jesús tzucupaj cámakalhchuhuiñiy y chiné cahúánilh:

—Aquit clítaxtuy cumu la púkalhtum xaquihui uvas, y chinchú Quintlat lítaxtuy cumu la amá huanti chanit y maktakalha amá tachanán. **2** Y xlíhuák huánti takaxmatnít quintachuhuín ccalimáxtuy cumu la quimakxpínín. Quintlat cactiy quimakxpín huántu ni tahuacay xtahuácat, pero amá huántu tahuacay xtahuácat luu paxuhuay cacuchiy y makaniy xlíhuák huántu mǎlanka-putún laqüi átzinú luu lhühua natahuacay xtahuácat. **3** Huixinín xtachuná lítaxtuyátit cumu la quimakxpín huántu tahuacay xtahuácat, y huá calicuchicanitátit quintachuhuín huántu aya kax-patnítátit. **4** Cumu la huixinín catziyátit pi kantum xmakxpín akatum tachanán nilay tahuacay xtahuácat para ni antá quilhtayá nac xachalanca xaquihui, pus nachuná chú huixinín nilay catikalhítit mintahuacatcán para ni ankalhiná quilipáhuanáhu, pus huá xpálaceata ccalihuaniyán ankalhiná lacxtum caquilatalatamáhu cumu la aquit ankalhiná ccatalamán.

5 Aquit amá púkalhtum xaquihui uva y huixinín quimakxpínín huánti luu lacxtum quintalama aquit. Huánti luu xlicana quilipáhuan y lacxtum quintalama aquit na antá lacxtum ctalama y luu lhühua natahuacay xtahuácat, porque para ni aquit naquilipáhuanáhu huixinín nilay túcu tlahuayátit mécstucán. **6** Huánti naquilakmakán y ni naquilipáhuan xlacata lacxtum naquintalatamay, chuná xlá ámaj quitaxtuniy cumu la tlahuacán kantum xmakxpín tachanán acxní niaj tahuacay

xtahuácat y scaca, xlá makxpícacán y mapucán nac lhcúyat laqui nalhcuy.

⁷ Para huixinín luu akstitum naquilaripahuanáhu y ni napatzankayátit amá quintapéksít huantu aya ccalimakalchuhuininitán, pus acxni chú huixinín para túcu nasquiniyátit Dios xlá huak nacamáxquiyán. ⁸ Amá chixcú huantí luu xlicana litaxtuputún cumu la quintamakalhtahuakén y ankalhíná naquistalaniy, xlá luu lhuhua nakalhiy xtahuácat y Quintlat luu lipaxuhuay caj quilacata. ⁹ Aquit luu xlicana ccápaxquiyán nachuná cumu la Quintlat quim-paxquiy, pus huixinín na ankalhíná calápaxquipítit chuná cumu la aquit ccamasiyuninitán quintapáxquit. ¹⁰ Para huixinín namakantaxtiyátit quintapéksít nac milatamátcán pus chuná huixinín nalimasiyuyátit pi xlicana quilápaxquiyáhu, nachuná acxni aquit ckalhakaxmata xtapéksít Quintlat chuná aquit clímasiyuy pi xlicana cpaxquiy.

¹¹ Huá chuná aquit ccalihuanimán laqui nacamacamajniyán minacujcán y lacxtum naquila-tapaxuhuayáhu y luu lanca tapaxuhuán naka-lhiyátit. ¹² Huá umá quintapéksít huantu aquit clacasquín namakantaxtiyátit nac milatamátcán, xlacata pi calápaxquipítit chatum achatum chuná cumu la huixinín catziyátit pi aquit ccápaxquiniitán. ¹³ Para chatum chixcú kalhiy xamigo y masiyuniputún pi luu xlicana paxquiy xlá hasta namacamastay xlatamat laqui tlán nalak-máxtuy, ¹⁴ pus chuná aquit ccalimáxtuyán cumu la quiamicos huantí luu ccápaxquiy para hui-

xinín namákantaxtjyllandit quilimapeksín. ¹⁵ Chú aquit niaj nēcxni cacticalimáxtún cumu la quintasacuán porque chātum tasacua ni catziy túcu anú ámaj tlahuay xpatrón porque ni huaniy huata xlá caj mapeksicán huantú natlahuay. Huata mejor huixinín ccalimáxtuyán cumu la quiamicos porque aquit huak ccāhuaninitán huantú Quintlat quintilimapéksilh. ¹⁶ Huixinín ni man quilalacsacnitáhu aquit, huata aquit ccalacsacnitán laquí luu lhuhua nakalhiyátit mintahuacatcán huantú ankálhiná nalilatapayátit nac milatamatcán, y laqui chuná acxní huixinín para túcu nasquiniyátit nac quintacuhuiní huantú maclasquimpátit, Quintlat xlá huak nacamaxquiyán. ¹⁷ Pus huá eé quilimapeksín huantú aquit ccamaxquiyán xlacata pi ankálhiná calapaxquítit calala-kalhamántit.

*Cristianos xala caquilhtamacú tasitzimakán
Jesús xahua xdiscípulos*

¹⁸ 'Para lhuhua cristianos huanti uú xala caquilhtamacú xlicana luu nacásitzimakanán pus huixinín na calacapastáctit pi aquit pulh quintalakmakanit y quintasitzinlh. ¹⁹ Huá chuná nacalitlahuacanátit porque huixinín ni antá uú tapeksiyátit nac caquilhtamacú porque aquit aya ccalacsacxtunitán nac xlakstipancán; pero para huixinín nachuná xlicatzítit y nachuná xcamacastalátit xtlahuátit huantú xlacán tatlahuay huantí uú xala caquilhtamacú, xlihuak cristianos xcapaxquín cumu na catatapeksiyátit. ²⁰ Caj luu līhuaná calacapastáctit amá tachuhuín huantú aquit ccāhuaninitán xlacata pi: "Nipara

chatum caj tasacula nalacpuhuán pi atzinú xlá talipahu ni xachuná xpatrón." Eé huamputún pi para aquit Mimpuchinacán luu quisitzinicán y hasta quimputzastalacañit, pus nachuná chú huixinín huantí quilalipahuanáhu juerza nacásitzinicánatit y nacaputzastalacañatit. Pero nachuna litum cumu luu lhuhua cristianos takalhakaxmatnít quintachuhuín pus nachuná luu lhuhua huantí nacakaxmatniyán mintachu-huincán huantú huixinín nahuanátit. ²¹ Huá xpápacata chuná lixcájnit nacalitlahuacanátit porque catzicán pi quilalipahuanáhu, xahuachí amákolh cristianos xlacán ni talakapasa huantí quimacaminít.

²² Para aquit ni xactímilh cámakalhchuhuiñiy cristianos uú nac caqUILhtamacú xlacata pi lixcájnit huantú xlacán takalhiy xtapuhuancán xlacán máx ahuayu ni lenkoy cahuá cuenta porque ni tacatziy. Pero cumu aquit ccáhuaniñit huantú nítlán tatlahuay, niaj lay ti nahuán pi ni xcatziy acxní namaxokonícán. ²³ Amákolh cristianos huantí aquit quintasitzimakán, nachuná tasitzimakán Quintlat huantí quimacaminít. ²⁴ Para aquit ni xacticalimalacahuánihl amá laclanca licácnit tascújut huantú nipara chatum chixcú tlán catlahuay, máx ahuayu nítu lenkoy cahuá xcuentajcán porque ni quintalipahuan; pero masqui aquit aya ccalimalacahuánihl lhuhua laclanca licácnit tascújut xlacán luu lhuhua takalhiy xtalañkalhincán porque chunacú quintasitzimakán y na tasitzimakán Quintlat. ²⁵ Xlacán nipara tzinú tacatziy para huá juerza tamákantaxtimánalh amá tachuhuín huantú

titalichuhuínalh profetas caj quimpalacata y huántu tatzoktahuilanít nac líkalhtahuaka huántu xlacán takalhiy. Pus lacatum chiné huan: “Xlacán quintasitzimákalh mäsqui ni xlílat para chuná ni xquintitaucxilhpútulh.”

26 ’Pero niaj makás quilhtamacú tzankay acxní nacmacaminachá nac xpaxtún Quintlat amá Espíritu Santo huanti nacamaktayayán y nacamáxquiyán licamama. Huá xlá nacamaxquiyán xatancs talacapastacni, xahuachí xlá huá nalichuhuinán huantu aquit quimpalacata. **27** Huixinín na naquilalichuhuinanáhu nac xlacatincán xlihuak cristianos porque huixinín ankalhíná quilatalatapulinitáhu hasta lata aquit ctimatzzúquilh quintascújut.

16

1 ’Huá xpälacata chuná aquit ccalihuanimán laquí huixinín ni nalipuhuanátit acxní chuná nacaakspulayán. **2** Pus huixinín nacatamacxtucanátit nac xpusiculancán judíos, y hasta nachán quilhtamacú acxní nacamaknicanátit caj quimpalacata, xahuachí amá huanti nacamakniyán xlá hasta nalacpuhuán pi chuná tlahuanima aktum litlán Dios. **3** Huá chuná xlacán nacalitlahuayán porque ni talakapasa Quintlatícan Dios y nipara aquit quintalakapasa para cäna aquit Xkahuasa. **4** Pus huá chuná ccalihuanimán laquí acxní nalachán quilhtamacú acxní chuná nakantaxtuy huixinín na nalacapastacátit pi aquit alisok aya ccamacatzininitán lanchú.

Xtascújut Espíritu Santo huantu tlahuay nac cq^uilatam^atcán

'Xapulh aquit nitu cc^{ah}uanín porque lacxtum xacc^{at}alamán y aquit m^an xacc^{am}aktakalhmán.
 5 Pero lanchú juerza cc^{ah}uanimán porque aya lakchanit quilhtamacú acxni aquit camapá antaní huilachá Quintlat huanti quimacaminit laqui n^a antá lacxtum nactahuilayachá. Pero ni para chatum xquinkalhásquilh la huixinín nícu luu cama,
 6 porque nac minacujcán luu xlícan*a* lili-puhuampátit caj xp^{al}acata huantu aquit lanchú cc^{ah}uanín.
 7 Luu xlícan*a* lacatancs cc^{ah}uaniyán pi para aquit ni nacán nac akapún, n^ec^xnicú caticalakmín amá Espíritu Santo huanti nac^{am}ak-tayayán y nac^{am}auxc^{an}iyán nac milatam^acán, pus huá cc^{ali}huaniyán pi luu xlacasquinca aquit nacán laqui nacc^{am}acaminiyán huanti nac^{am}ak-tayayán.
 8 Acxni xlá namín nac caq^uilhtamacú y nam^azuquiy xtascújut nac milatam^acán, xlá luu lacatancs nac^{am}akataksniy cristianos huanti nichuná talacpuhuán pi xlícan*a* huak tamaklakalhinanit, y n^a nac^{am}acatziniy lác*u* lacasquín Dios akstítum natalatamay xcamanán, y nachuna litum xlá nac^{am}acatziniy lata lác*u* Dios ámaj cama^xokoniy xp^{al}acata xcuentajcán xlihuak cristianos.
 9 Antá ámaj talitasiuyu tíc*u* luu ámaj talaktzankay xp^{al}acata xtalakalhín porque ni quinta lipahuán aquit,
 10 y nachuna litum xlá ámaj cama^xiyuniy cristianos lác*u* Dios tlán camaktayay xlihuak huanti akstítum talatamaputún nac xlacatín porque aquit antiyá clakama y huixinín niaj caquintilaucxilhui.
 11 Xlá n^a nac^{am}acatziniy

cristianos huánti akatiyuj talilay xpälacata xtalakalhincán pi niaj xlíxokonutcán porque amá akskuhuiní huánti mapeksinán uú nac caqUILhtamacú aya laclhcahuilicanít huák lata tu namaxokonícán.

¹² 'Luu lhuhuacú huí huantu aquit ccalitachu-huínamputunán, pero huixinín ni huák catiakatakskótít lanchú. ¹³ Huata lanchú ni naj cactica-huanín, mejor xatlán cakalhítít hasta acxní namín Espíritu Santo huánti kalhiy huák xatancs tala-capastacni huantu huixinín catziputunátit. Xlá ni catichuhuínalh huantu caj sacstu xlacata, pus huata xlá huá nahuán huantu kaxmatnít nac xpaxtún Quintlaticán Dios, xáhuachí xlá nacamá-catziniyán makapitzín huantu nalay acalistán nac caqUILhtamacú. ¹⁴ Huá umá Espíritu Santo nacamacatziniyán lácu aquit naquilacacnínaniyáhu porque luu caj xmánuá huantu quintalacapasta-cni nacamáakataksníkoyán. ¹⁵ Lata tu kalhiy xlítlihueke chu xtalacapastacni Quintlat huák qui-maxquinit, y luu lacxtum ckalhiyáhu quintalaca-pastacnicán, pus huá xpälacata ccalihuaníyán pi amá Espíritu Santo caj luu xmáñ quintalacapasta-cni aquit cámaj maxquiy laquí huixinín nacamaakataksníkoyán.

¹⁶ 'Niaj luu makas quilhtamacú aquit aya canittá nahuán y huixinín niaj caquintilaucxílhui, pero ni limakas litúm quilhtamacú y amaktum naqui-lauçxilhparayáhu.

*Amá xtalipuhuancán luu aktum tapaxuhuán
naquitaxtuy*

17 Amäkolh xdiscípulos ni taakátaxsli xtachu-huín, y sacstucán tzúcuhuítalákalhasquín:

—¿Lácu lá eé tu luu quincáhuaniputunán? Huan pi caj xamaktum niaj catiucxílhui, y ni limakás chú mat naucxilhparayáhu porque xlá mat naán antaní huilachá Quintlāticán Dios. **18** ¿Túcu luu huaniputún, huan pi caj puntzú niaj catiucxílhui? Pus aquinín nipara tzinú cakataksáhu huantú xlá quincalitachuhuínamán.

19 Jesúz tuncán cátzilh pi huíntú xtakalhas-quimputún porque xlacán ni xtaakataksmánalh huantú xlá xcalítachuhuínama, pus huá chiné calihuánilih:

—Aquit aya ccáhuani pi niaj makás quilhtamacú niaj caquintiläucxílhui, pero chú ni limakás litúm naquiläucxilhparayáhu. ¿Lácu pi huá umá huixinín catziputunátit lácu luu naquitaxtuy? **20** Luu xlicána ccáhuaniyán pi huixinín luu natasayátit y nalipuhuanátit, pero xamakapitzín huantí ni quintalipáhuán xlacán natalipaxuhuay huantú aquit ámaj quiokspulay. Pero mäsqui huixinín luu snun lipuhuampátit nahuán, acxní chú naquiläucxilhparayáhu, amá mintalipuhuancán luu aktum tapaxuhuán naquitaxtuy. **21** Chatum puscat luu xlicána lipuhuán acxní amaj mälakatuncuhuínán porque xlá stalanca catziy pi aya lakcháñit quilhtamacú laña natzucuy mapatiñiy amá xtacatzanájuat; pero chú acalistán acxní nalacachinkoy amá actzú cskata amá puscat napatzankákoy amá xtacatzanájuat huantú lan mapatínilih, caj laña xtapaxuhuán porque xlá aya huí actzú xkahuasa nac caquilhtamacú. **22** Pus náchuná

chú huixinín lən nalipuhuanátit lanchú, pero aquit naccatasiyuniparayán əmaktum, chu əmá minacujcán nakalhiy aktum tapaxuhuán, y əmá mintapaxuhuancán níticu lay caticamalactlahuín.

²³ 'Acxní nalakchán əmá quilhtamacú, huixinín niaj tū caquintiläkalhasquíhu cumu lanchú qui-läkalhasquimanáhu uú l̄ihuán ccatalamán, pero xlícanā ccahuaniyán pi Quintlat huak nacamax-quiyán lata túcu huixinín nasquiniyátit nac quintacuhuini. ²⁴ Hasta chū huixinín nítu a squiniyátit Quintlat nac quintacuhuini, pus aquit ccahuaniyán pi casquinítit huantu maclacasquimpátit, xlícanā pi namaklhtinanátit laqui chuná huixinín ətzinú lən nalipaxuhuayátit pi quila lipahuanáhu.

*Jesús makatlajakonit huantu malatzankenán
nac caquilhtamacú*

²⁵ 'Aquit ni ccatziy para huixinín huak akatakspátit huantu ccahuanimán, porque ni huak ccəmalacaputuncuhuinimán, huata caj catuhuá ccatamalacastucnimán y chuná ni luu pálā akataksátit; pero namín quilhtamacú acxní niaj luu xlacasquinca chuná cacticalitachuhuinán porque aquit luu lacatancs naccalitachuhuinán huantu xlá luu xlakstu Quintlat. ²⁶ Amá quilhtamacú acxní huixinín para túcu nasquiniyátit Quintlat nac quintacuhuini xlá nacamaxquiyán, y ni xlacasquinca para aquit luu naclimakatzankey caj huantu milacatacán porque xlá huak cəlakapasa huantí aquit quintalipahuán. ²⁷ Quintlaticán luu capaxquiyán porque huixinín nə quila paxquiyáhu aquit, xahuachí cumu huixinín canajlanítátit pi

aquit cminítanchá nac xpaxtún. ²⁸ Aquit antá ctacaxnitanchá nac akapún laquí nacmín latamay uú nac caquilhtamacú, pero chú cámaj makxteka eé caquilhtamacú laquí naclakamparay antaní huilachá Quintlat.

²⁹ Xdiscípulos chiné tahuánihl:

—Chú xlá luu lacatancs quilatachuhuinama-náhu, y njpara caj túcu tamälacastúcpat mintachu-huín huantu luu nilay naliakatakscán. ³⁰ Lanchú aya ccatzimáñáhu pi lata túcu huix huäk catziya y ni xajuerza para tícu nalikalhtzaksayán para túcu nakalhasquimputunán chicá para túcu ni catziya. Pus hasta huá chú luu lacatancs clitalulokáhu clicanajlayáhu pi xlicana huix antá tanítampi nac xpaxtún Dios.

³¹ Jesús cakálhtílh:

—Pus luu xlicana chinchú hasta acu canajlayátit? ³² Aquit lacatancs ccáhuaniyán pi lakcháma quilhtamacú y lanchujá aya lakchanít hora acxní huixinín huäk naquilatzalamakanáhu, chatum chatum nachipay xtiji y natzalayátit xlicana hasta quecstu naquilmakxtekáhu; pero ni luu quecstu cactitamákxtekli porque Quintlat ankalhiná lama nac quilatámat. ³³ Huá xpápacata chuná ccalita-kalhchuhuinamán laquí acxní luu akatiyuj nala-yátit caj xlacata huantu naquiockspulay, huixinín tlán namaklhtinanátit lanca tacácsuat y licamama caj xlacata cumu lacxtum quilatatalacastucní-táhu. Uú nac caquilhtamacú ni tzanká ti nacá-mapatiníyán nacaputzaniyán taaklhúhuit, pero huixinín cakalhítit licamama porque aquit aya clactlahuanít xlitlihueke huanti mapeksinán nac caquilhtamacú.

17

Jesús huaniy Dios cacamaktákalhli huanti talipahuán

¹ Acxní chuná catachuhuinankolh xdiscípulos, Jesús lácālh nac akapún y chiné kalhtahuakánilh Dios:

—Papá Dios, aquit minkahuasa, aya lakchānít lanchú quilhtamacú acxni aquit nacpatinán, pus huata mejor lanchú cacamasiyuni xlihuák cristianos pi aquit nāckalhiy lanca quilitlihueke, laquí chuná huák natalakachixcuhuiyán caj quimpalacata. ² Porque xlícaná huix quimaxquinita límapeksín y litlihueke laquí naccamaxqui y amá xasasti latámat huantú necxni laksputa xlihuák huantí huix calacsacníta laquí naquintalipahuán. ³ Pero para huintí lacasquín nakalhiy amá latámat huantú necxni laksputa luu xlícaná xlacasquinca pi pulh nalakapasán y nacanajlay pi caj xmān mēcstu huix Dios huantí lápat rití achatum, y nachuna litum naquilakapasa y nacanajlay pi aquit amá Jesucristo huantí huix macatanita.

⁴ Aquit aya cmasiyunit nac xlacatincán cristianos amá lanca litlihueke huantú huix kalhiya porque aquit aya cmakantaxtikonít amá quintascújut huantú huix quintilakmacata naactlahuay.

⁵ Pus lanchú caquimaxquipara antá nac mimpaxtún amá lanca litlihueke huantú aquit xacalhiy acxní antá xactalamachán hasta lata niā xmālacatzuquiyáhu tuncán caquilhtamacú.

⁶ Aquit ccamactatzinjinit umakolh mincamanán huák lata lácu huix kalhiya mintalacapastacni;

xlacán aya xtalaktzankatayanit uú nac caqUILhtamacú pero huix cälacsacxtu y cälakmaxtu, huix chú quimacamaxqui laquí nacmaktakalhniyán, y cumu huix luu xpuchinacán xlacán takalhakaxmatnit mintapéksit. ⁷ Xlacán aya tacatziy pi xlihuák quilitlihueke chu quintalacapastaci antá minitanchá nac akapún antaní huix huilapi. ⁸ Aquit lihuaná ccámasiyuninít amá mintapéksit huantu huix quimaxquinita, xlacán luu aktum tapaxuhuán tamaklhtinanit, xahuachí xlacán luu tacanajlanit pi aquit cminitanchá antaní huix huilapi y huix quimacatanita.

⁹ Aquit luu xlicana climäkatzankeyán xlacata pi cacamaktaya huantí quintalipáhuán; aquit ni huá climäkatzankemán amakolh cristianos xala uú caqUILtamacú huantí ni talakpaliputún laclíxcájnit xtalacapastacnicán, huata huá ccálimäkatzankeyán xpälacatacán huantí huix quintimaxqui laquí naccalakmaxtuy porque huix xpuchinacán. ¹⁰ Xlacán luu quintalipáhuán porque huix quimaxquinita laquí naccamapeksiy, porque lata túcu huix mapeksiya aquit náchuná tlán cmapeksiy, y chuná stalanca tasiyuy pi aquinín acx-tum mapeksinanáhu.

¹¹ 'Aquit niaj makas cactilatámalh uú nac caqUILtamacú porque clakamächán antaní huix huilapi, pero huatunín antacú uú natatamatakxteka nac caqUILtamacú. Papá Dios huix ankalhiná tlán kalhiya mintapuhuán, aquit xlihuák quinacú climäkatzankeyán xlacata huix cacamaktákalhti y cacamauxcani umäkolh cristianos huantí huix quimaxquinita laquí luu lakxtum catalachá nac xtapaxquitcán cumu

lámpara chatumá catahuanchá xtachuná cumu la huix chu aquit luu lakxtum lamənáhu porque luu lapaxquiyáhu. ¹² Acxní aquit lacxtum xaccatalama uú nac caquiltamacú umakolh mincamanán huantí huix quimacuentajlinita, aquit lihuana ccamaktákalhli y nípara chatum laktzánkalh, caj xmənhaú laktzánkalh amá huantí aya xlilaktzánkət xuanít laqui chuná likantáxtulh huantú makán titalichuhuínalh profetas y chuná tatzoknít nac likalhtahuaka.

¹³ 'Lanchú aquit aya camachá antaní huix huilapi, pero huá xpälacata chuná clíhuanimán lihuán clamajcú uú nac caquiltamacú laqui xlacán natakaxmata y lacxtum naquintatapa-xuhuay amá lanca tapaxuhuán huantú aquit ckalhiy. ¹⁴ Aquit ccalitachuhuinanít mintachu-huín, xlacán luu ya tapaxuhuán takaxmatnít, huá xpälacata calisitzinicán uú nac caquiltamacú porque xlacán niaj antá uú tatapeksiy xtachuná cumu la aquit nə ni uú xalac caquiltamacú. ¹⁵ Aquit ni cuanimán para cacatamacxtu uu nac caquiltamacú, huata caj xmən clacasquín cacamaktákalhti y cacamaktaya laqui ni nacamakatlajay akskuhuiy y ni nacamatlahuuiy talakalhín. ¹⁶ Cumu la aquit níchuná ckalhiy quintalacapastacni cumu la takalhiy huantí uú xala caquiltamacú, pus xlacán na niaj chuná takalhiy xtalacapastacnicán. ¹⁷ Cacamasiyuñi lácu akstítum natalén xtalacapastacnicán nac milacatín, porque caj xmənhaú mintachuhuín tlən nacalimasiyuñiya xanícumə tlən tiji porque mintachuhuín xli-cana talulóktat. ¹⁸ Chuná cumu la huix quima-

catanita uú nac caquiltamacú nac xlakstipán cristianos huantí ni talakapasán, nachuná chú aquit ccamacán nac xlakstipancán amakolh cristianos huantí ni talakapasán.¹⁹ Y caj xpalacatacán masqui aquit cmacamaxquiñitán quilitamat laqui nachuná xlacán maktum pi natamacamaxquiyán xlatamatcán laqui luu milá nahuán, porque xlacán aya talakapasa huantú xlicana xatlán mintalaca-pastaci.

²⁰ 'Nachunalitum climakatzankeyán xlihuak amakolh cristianos huantí ni naj quintalipahuán, pero huanti naquintalipahuancú acxní natakaxmata xtachuhuincán huanti naquintaliakchuhuinán. ²¹ Papá Dios, aquit climakatzankeyán xpalacata xlihuak cristianos huantí aquit naquintalipahuán laqui luu lakxtum catalachá nac xtapaxquitcán, cumu lámpara chatumá catahuanchá nachuná cumu la huix chu aquit luu lakxtum lamanáhu porque luu lapaxquiyáhu. Xlicana luu cacamalakxtumichá amá tapaxquit, laqui amakolh cristianos huantí xalaktzankán talamána nac caquiltamacú nataucxilha huantú aquit ctlahuanit nac xlatamatcán, y laqui chuná natacatziy pi xlicana huix quimacatanita. ²² Aquit aya luu lacatancs ccáhuainit lata lácu huí xatlán talacapastaci huantú huix chú aquit kalhiyáhu, laqui chuná xlacán luu lakxtum natalatamay y natalapaxquiy cumu la aquinín lakxtum lamanáhu. ²³ Xlicána aquinín ankalhiná luu lacxtum catziyáhu, aquit nachuná ccatalamaj nahuán para xlacán luu lakxtum nacatlahuay tapaxquit, y amakolh cristianos huantí xalaktzankán talamána nac

caq̄uilhtamacú, acxni xlacán nataucxilha huantú aquit ctlahuanít nac xlatamátcán acxnicú xlacán natacatziy pí xlicana huix quimacatanita, y ná natacatziy pí xlicana huix luu capaxquiya nachuná cumu la aquit quimpaxquiya.

24 'Huá umakolh mincamanán huanti huix quimacamáxquinita laqui xlacán naquintalipáhuán, pus aquit clacasquín pí antaní aquit cámaj tahuilay nac quimpumapeksín, ná antá xlacán lacxtum xquintatatahuilachá laqui nataucxilha amá lanca quiltilihueke huantú aquit nackalhíparay; huá xpalacata huix quilimaxqui cumu luu xlicana quimpaxquiya, ná ankalhiná quimpaxquinita hasta lata niā xmá lacatzuquiyáhu caq̄uilhtamacú. **25** Papá, xlicana huix luu tlán catziya, pero amakolh cristianos huanti xalaktzankán talamána uú nac caq̄uilhtamacú xlacán ni talakapasán, pero aquit xlá clakapasán y umakolh quidiscípulos xlacán aya tacatziy pí huix quimacatanita. **26** Aquit aya ccamasiyuninit huantú luu xalacuán mintalacapastacni, y aquit chunacú nacticamasiyuniy huantú huix lakanía, laqui amá lanca tapaxquit huantú aquinín kalhiyáhu nachuná xlacán natakalhiy, y laqui aquit tlán nactahuilay nac xnacujcán.

18

Tachín lencán Jesús

(Mateo 26.47-56; Marcos 14.43-50; Lucas 22.47-53)

1 Acxni chuná huankolh eé tachuhuín, Jesús catatáxtulh xdiscípulos y táalh aliquidiltutu puxka huanicán Cedrón. Antá lacatzú xuí

aktum púcuxtu y antá lən xchancanit quihi, huata antá xlá cätañanuchá. ² Judas huantí xámaj macamastay Jesús xlá nə xlakapasnán nac əmá púcuxtu cumu Jesús maklhuhua antá xcätatamacxtuminit xdiscípulos. ³ Caj lipuntzú Judas pütum cätachilh tropa xahua policías huantí xtamalakachanit xanapuxcun cura chu fariseos, əmäkolh tropa huák xtalén xmächitajcán chū xlamparajcán huantu xtalimaskoán. ⁴ Y cumu Jesús aya xcatziy huantu xlá xámaj akspulay, acxni xlacán niə xtalakchán alh cälakapaxtoka y chiné cäkalhásquilh:

—¿Tícu putzayátit?

⁵ Xlacán takalhtínalh:

—¡Cputzamanáhu Jesús xalac Nazaret!
Jesús cähuánilh:

—Aquit tamá chixcú huantí huixinín putzapátit.

⁶ Acxni Jesús cähuánilh: “Aquit tamá chixcú huantí huixinín putzapátit”, xlacán tzinú tam-puniaj táalh y tatamachá nac cätiyatni. Y əmá Judas huantí xliakskahuinima Jesús xlá nə antá xmaklaya y huák xucxilhma huantu xquitax-tuma. ⁷ Huata Jesús cäkalhasquimpá:

—¿Pus tícu luu putzayátit?

Xlacán chiné takálhtilh:

—Cputzamanáhu Jesús xalac Nazaret.

⁸ Jesús cähuánilh:

—Pus aya ccähuánin pi aquit tamá chixcú huantí huixinín putzayátit. Pus para xlicäna aquit quilaputzayáhu pus cacamaxquítit talacas-quín əmäkolh lacchixcuhuín huantí aquit quinta-talapulay xlacata pi catáalh.

⁹ Chuná líkantáxtulh amá tachuhuín huantú tíhua Jesús acxní xkalhtahuakanima Quintlaticán Dios y chiné huánilh: “Papá Dios, huantú huix qui-macuentajlinita, lihuanā cmaktákalhli y ni para chātum laktzánkālh.” ¹⁰ Huata Simón Pedro xmaktayaputún Jesús xlá xtat tláhualh xmachita y maktum tankapicáctílh xtakén chātum chixcú xuanicán Malco, umá chixcú na huá xtasacua xuanit xapuxcu cura. ¹¹ Jesús huánilh Pedro:

—Camanupara mimachita nac xputanún; cumu para Quintlat Dios chuná lacasquín pi aquit nacmakihtinán putum amá tapatín huantú xlá laclhcahuilinít caj quimpalacata, ¿lácu pi nilay chinchú cactipátilh?

Jesús lichancán nac xlacatín xapuxcu cura

(Mateo 26.57-58; Marcos 14.53-54; Lucas 22.54)

¹² Amakolh soldados chu comandante xahua xpoliciascán judíos, putum tachípalh Jesús, tamacáchilh y tachín tálélh. ¹³ Anta titum talíchalh nac xchic Anás; huá umá Anás xputiyatlát xuanit Caifás, y luu acxní chú xlakchanit amá cata lata xlá nascuja cumu la xapuxcu cura. ¹⁴ Y ná huatiya litum tamá Caifás huantí chiné ticalimákalh-chuhuínih judíos: “Xalihuaca tlán pi caj chātum chixcú naniy y ni xlíputum quimpulatamancán catilaktzánkālh.”

Pedro ni litayay para lakapasa Jesús

(Mateo 26.69-70; Marcos 14.66-68; Lucas 22.55-57)

¹⁵ Simón Pedro chu chātum litum xtamakalhta-huakén Jesús lacatzú xtastalanitilhay, pero amá chātum litum xtamakalhtahuakén juerza tzinú

xlilakapasa amatá xapuxcu cura, pus xlá maxquícalh talacasquín na natanuyachá acxni manuca Jesús. ¹⁶ Pero Pedro xlá ni maxquícalh talacasquín natanuy y antá xlaya nac xaquilhtín málacchi. Caj lipuntzú amatá xtamakalhtahuakén Jesús táxtulh laquí natachuhuinán huantí xapuxcu squitihuiná huantí xmaktakalhnama nac málacchi y tatánulh Pedro. ¹⁷ Acxni amatá squitihuiná úcxilhli Pedro chiné kalhásquilh:

—Caj lámpara na xtamakalhtahuakén huix amatá chixcú huanti lichíncalh lanchú.

Huata Pedro káltilh:

—Ni aquit!

¹⁸ Cumu amatá quilhtamacú marí xlonknuma catzisní, amatókh polícias xahua pütum tasa-cuán huanti antá xtascujmánalh xtamalhcuyunit y antá pütum xtaskománalh, huata Pedro na antá tachókolh y tzúculth cataскón nac lhcuyat.

Xanapuxcun cura tamakalhapaliy Jesús

(Mateo 26.59-66; Marcos 14.55-64; Lucas 22.66-71)

¹⁹ Nac xpulacni chiqui antaní xtamacnucanit Jesús, amatá xapuxcu cura tzúculth makalhapaliy y kalhásquilh tícua xuanit xtamakalhtahuakén y túcu xlá xcalimakalhchuhuiniy cristianos. ²⁰ Jesús chiné káltilh:

—Huak lata túcu ccälimakalhchuhuininit cristianos ni tzék ccahaninit, pus cchuhuinanit nac xpusiculancán judíos antaní tzamacán, chú nac lanca pusiculan uú nac Jerusalén antanícu tamacxtumiy lhuhua cristianos. ²¹ Pus ¿túcu chú xpälacata aquit quilikalhasquina? Huata mejor huá cacakalhásquinti huantí quintakaxmatninit

quintachuhuín y huá catahuanín huántu aquit clichuhuinanít.

22 Chárum policía huánti cscujma nac lanca pusiculan, acxní xlá káxmatli huántu kalhtinalh Jesús, maktum loxs lacpitláhualh y chiné huánilh:

—Laqui alimaktum niaj nęcxni chuná nakalhitiya chárum xapuxcu cura.

23 Jesús chiné kálhtílh:

—Para túcu nítlán cuá caquihuani, pero para tancs huántu aquit cchuhuínalh, ¿túcu xpápacata quilihuiliniya?

24 Jesús xtamacachinít acxní makalhapálilh Anás, y chunacú xtamacachinít mǎlakachánilh Caifás huánti na xapuxcu cura xuanít.

Pedro huan xlimaktutu pi ni lakapasa Jesús

(*Mateo 26.71-75; Marcos 14.69-72; Lucas 22.58-62*)

25 Pedro antacú xlaya antaní xmalhcuyucanit, y antá pütum xtaskománalh y caj xamaktum chiné takalhásquilh:

—¿Lácu pi ni huix xtamakalhtahuakén ąmá chixcú huánti tachín lichinca?

Pedro ni litáyah y chiné cahuánilh:

—Ni aquit.

26 Antá xlaya chárum xtasacua xapuxcu cura xlá xlitakapasni xuanít ąmá chixcú huánti xtankapicactinit xtakén Pedro, xlá chiné huánilh:

—Pero ¿lácu ni huix nahuán? ¿Lácu pi ni cucxilhni acxní antá pütum xtalayapítit lata län cachancanit quihi?

27 Chuná liaklhuahuatnampá Pedro y huá pi ni xlakapasa. Acxnitiyá tásalh tantum puyu.

*Pilato makalhapaliy Jesús
(Mateo 27.1-2, 11-14; Marcos 15.1-5; Lucas 23.1-5)*

²⁸ Aya xtzucunittá xkakay acxní tamacxtúcalh Jesús nac xchic Caifás y léncalh nac xpumapeksín gobernador romano xuanicán Pilato. Amäkolh judíos ni tatánulh nac xpumapeksín laquí mat ni nataxcajuālay, porque chuná xtalsimaninit, y laqui chuná tlán natahuay xtahuajcán huantú natalilakachixcuahuinán cakotanún nac xapaxcua taakspuntzalín. ²⁹ Pus huata huá Pilato män taxtuchi y chiné cahuánilh:

—¿Túcu limälacapuyátit eé chixcú?

³⁰ Xlacán takalhtínalh:

—Para xlá ni tláhuani cahuá lanca taläkalhín ni xacticalimín laquí huix män nahuana lácu napatiñán.

³¹ Pilato cahuanipá:

—¿Lácu pi ni kalhiyátit huixinín limapeksín huantú quilhpaiyátit? Pus calipimparátit y män camapatiñítit huixinín.

Amäkolh judíos takalhtínalh:

—Xlicana ckalhiyáhu quilimapeksincán y aquinín clacasquináhu pi naniy eé chixcú, pero aquinín judíos ni ckalhiyáhu derecho para tícu nacmakniyáhu para ni huix chuná nalimapeksinana.

³² Pus chuná likantáxtulh huantu xapulh xlichuhuinanit Jesús lácu xámaj pätinán y xamácalh maknicán. ³³ Pilato tanupá nac xpumapeksín, tasánilh Jesús y chiné kalhásquilh:

—¿Pi xlicana huix xreycán judíos?

³⁴ Jesús kálhtilh:

—¿Lácu pi caj mintapuhuán mäsqui chuná quinkalhasquímpat, osuchí caj huí tunu huánti litachihuínanitán?

35 Pilato kálhtilh:

—¡Lácu pi ná judío aquit! Huánti mintachiqui chu xanaxcun cura huánti taliminitán uú. ¿Túcu chí tlahuánitá?

36 Jesús kálhtilh:

—Quimpumapeksín ni antá uú xala caquilhtamacú, para antá cahuá, huánti quintalipuhuán xquintitamaklhtinalh y ni xtamástalh quilibtamacú naquinchipacán; mäsqui luu xlícaña aquit rey pero quimpumapeksín ni antá uú xala caquilhtamacú.

37 Entonces Pilato huánih:

—¿Pi xlícaña huix rey?

Jesús kálhtilh:

—Para aquit rey cahuá cumu la catziputuna, tlan quitaxtuy. Pero huata huá clímilh skatán uú nac caquilhtamacú laqui nacmacatzinínán huántu talulóktat, y pütum huánti takalhakaxmata huántu tlan talacapastacni xlacán tatlahuay huántu cuán.

38 Pilato huánih:

—Pero, ¿pi anán cahuá huánti xcátzilh huántu talulóktat?

*Lilhcacán Jesús pi namaknicán
(Mateo 27.15-31; Marcos 15.6-20; Lucas 23.13-25)*

Y la chuhuínankolh Pilato tuncán táxtulh y am-paj cátachuhuínán judíos y chiné cahuánih:

—Aquit ni cmaclaniy xcuenta huantu nacliya-huay eé chixcú. ³⁹ Pero huixinín judíos lismaninitátit quilasquiniyáhu cata cata nacmakxteka chatum tachín nac xapaxcua taakspuntzalín, pus para huixinín lacasquinátit uc makxteka xreycán judíos.

⁴⁰ Pero amakolh lacchixcuahuín pütum taquilh-minchá y chiné tahuánihl:

—¡Ni camákxtekti huál! ¡Huata mejor camákxtekti Barrabás!

Amá Barrabás kalhaná xuanít xahua makníná.

19

Jesús lən likalhkamānancán

¹ Pilato calimapéksilh tropa xlacata nataliak-lhchásnoka Jesús kantum latigo. ² Pero huata amakolh tropa atzinú lən talikamánalh, tákonkli lhucún cumu la corona, taacuúlh, y tamálhákelh mactum xatlán lhákát xapustapuhua xtachuná cumu la xla rey. ³ Pütum talaktalacatzúhuilh y chiné tzúculh talikalhkamānán:

—¡Canęcxnicahuá calatámálh xreycán judíos!

Chuná la xtalikalhkamānámánalh nachuná xtakalhtukaxiy.

⁴ Pilato calaktaxtupá judíos y chiné cahuánihl:

—Aquit ctamacxtumaparachi eé chixcú laqui nacatziyátit pi ni cmaclanima xtalałkalhín huantu nacliyahuay.

⁵ Jesús taxtuchi, xlá xacuí xalhtucún corona y nachuná clhakanit amá xapustapuhua clhákát, y Pilato chiné cahuánihl:

—Pus huí chú eé chixcú aquit ccamacamáx-quiyán.

6 Pero amakolh judíos chu xanapuxcun cura acxní taúcxilhli, palha tzúculh tamatasiy y chiné xtaquihuamánalh:

—¡Capekextokohuaca nac cruz! ¡Capekextoko-huaca nac cruz!

Pilato cákálhtilh:

—Huata calipítit y mān capekextokohuacátit huixinín porque aquit nítu cmaclaniy xtaläkalhín huantü nacliyahuay.

7 Amakolh judíos takalhtinampá:

—Pus xlicána chuná xlílat porque nac líma-peksín huantü aquinín quilhpaiyáhu antá quinca-huaniyán pi umá chixcú juerza naniy porque xlá talalacataquinit Dios, porque xlá huan pi mat huá Xkahuasa Dios.

8 Acxní Pilato káxmatli amá tachuhuín xlá ątzinú lihuaca tzúculh pécuán. **9** Huata tamacnu-parachá Jesús nac xpulacni xpumapeksín y antá chiné kalhásquilh:

—Luu xlicána caquiuhani tícu huix y nícu tanitampi. ¿Nícu xalá huix?

Jesús nitúcu kálhtilh. **10** Pilato chiné huanipá:

—Aquit nipara tzinú quinkalhtíputuna. ¿Lácu pi ni catziya pi aquit ckalhiy límapeksín tlän nacli-mapeksinán xlacata camakxtékanti osuchí capekextokohuacácanti nac cruz para aquit chuná naclacasquín?

11 Jesús chiné kálhtilh:

—Huix ni kalhiya cahuá tamá límapeksín para ni huá Dios xtimaxquín. Pero amakolh cristianos huantü quintaliminit nac mimpumapeksín laqui naquimäkalhapaliya, ątzinú xlacán luu lhuhua takalhiy xtaläkalhincán ni xachuná huix.

12 Lá kaxmatkohl Pilato xtachuhuín Jesús, xlá timakxtekpútulh pero amákohl judíos chiné taquihánilh:

—¡Para huix namaxkteka tamá chixcú ni xlicana luu tatayaya huánti caj xmánuá chatum huí gobierno xalac Roma, porque latachá tícu nahuán pi na rey litaxtuputún, pus xlá caj talalacataquima gobierno!

13 Acxní káxmatli pi huí huantü xtalianuniy judíos matamacxtuninampá Jesús nac quilhtín, y Pilato tähui nac xputáhuilh antaní xcalacax-tlahuay huantü xcamałacapucán, eé pumapeksín nac xatachuhuín hebreo xuanicán Gabata, y umá tachuhuín huamputún Catalatzapsni. **14** Max cumu ni makás nastastunún amá quilhtamacú xtamakotanín xapaxcua taakspuntzalín, acxní Pilato chiné cahuánilh amákohl lacchixcuahuín:

—¡Caucxílhit chú mireycán!

15 Pero judíos chiné takalhtínalh:

—¡Camakni! ¡Capekextokohuaca nac cruz!

Pilato cahuaniápá:

—Pero glácu nacliffekextokohuacay mireycán?

Huata xanapuxcun cura takalhtínalh:

—¡Aquinín xmánuá ckalhiyáhu chatum rey, caj xmán lanca gobierno huánti caj sacstu huí nac Roma!

16 Pilato niaj cátzilh lácu nacakalhtiy y camacamáxquilh Jesús xlacata natapekextokohuacay, y xlacán tálélh.

*Jesús pekextokohuacacán nac cruz
(Mateo 27.32-44; Marcos 15.21-32; Lucas 23.26-43)*

17 Amakolh lacchixcuahuín tatamácxtulh tuncán Jesús y xtamacuquínit kantum tzinca cruz, y antá lénçalh nac aktum kestín xuanicán Nac Xaclúcüt Nin. (Eé kestín nac xatachuhuín hebreo xuanicán Gólgota.) **18** Y antá pekextokohuacácalh Jesús nac cruz, xahua chàtiy tachín na capekextokohuacácalh chàtum paxtu tu paxtu tu. **19** Pilato mapek-síñalh catzókca pitzú páklhat y caxtokohuacácalh nac xacpún xcruz Jesús y antá chiné xtatzoknit: “Huá eé Jesús xalac Nazaret, xreycán judíos.” **20** Cumu amá kestín antanícu pekextokohuacácalh Jesús lacatzú xuanit nac xacachiquín Jerusalén lhuhua judíos xtalitaxtumáñalh antá, y huãk tlän talikalhtahuákalh amá tamacatzinín porque tzókcalh nac xatachuhuín hebreo, latín y griego, laqui xlihuãk huánti natalikalhtahuakay nataakataksa. **21** Amakolh xanapuxcun cura ni tamatlántilh la matzoknínalh Pilato, huata lajihuán talákalh y chiné tahuánilh:

—Nichuná xtítzokti para xreycán judíos, huata mejor xtítzokti pi xreycán judíos xlitaxtuputún.

22 Pilato cákálhtílh:

—Huántu aquit ctzoknit, xatatzokni tamáktexcli y niñi catílactláhuall y chunatiyá natamakxteka.

23 Acalistán amakolh tropa acxni tapekextoko-huacakolh Jesús tasácnih clhákät pumakatañi tatalahuánilh y lamapajpitzínih chàtunu chàtunu. Pero xmactahuaca niñu xtatzapanit xamactumi-nica xuanit. **24** Xlacán chiné tzúculh talahuaniy:

—Niaj calacxtitui, huata mejor caj calimacáhu suerte aver xatícu luu nalakchán.

Chuná likantáxtulh huantú xtatzoknít nac likalhtahuáka antaní chiné huan: “Pulh tamapajpítzilh quilhákat, y talimácalh suerte quimactahuaca laqui para xatícu luu nalakchán.” Pus xlicána pi chuná tláhuall tropa.

²⁵ Lacatzú nac xtantún cruz xtagyánalh xtzí Jesús chu xnapa, xahua María xpuscat Cleofas, y María Magdalena. ²⁶ Acxní Jesús úcxihli pi antá xtagyánalh lacatzú nac xtantún cruz xtzí y amá xdiscípulo huánti luu xpaxquiy, chiné huánilih xtzí:

—¡Ná! Huanchú tamá la minkahuasa nalipulhcaya.

²⁷ Acalistán chiné huánilih xdiscípulo:

—¡Ta, huanchú tamá la mintzí namaktakalha! Y amá xdiscípulo cuentájalh xtzí Jesús.

Jesús acnítahuacay nac cruz

(Mateo 27.45-56; Marcos 15.33-41; Lucas 23.44-49)

²⁸ Jesús aya xcatziy pi huák xmakantaxtikónit huantú xtatzoktahuilanít nac likalhtahuaka caj huantú xpalacata, pero laqui nitúcu nataakxtektahuilay chiné huá:

—Ckalhpútima.

²⁹ Antá lacatzú xyahuacanít patum xalu stap xuí vinagre, chatum chixcú l'ilupli panámac, mäaká-nulh nac kantum lasasa la kátit huanicán hisopo y lichéxnihil hasta nac xquilhni Jesús. ³⁰ Acxní xlá hualh actzú vinagre chiné huá:

—Chú aya huák kantaxtunít

Acxnitiyá quilhpütaj tláhuall xakxaka y njilh.

Chatum tropa tapalhtucuy Jesús

31 Amá quilhtamacú viernes xtamakotanín xuanit xapaxcua taakspuntzalín, y xáhuachí cumu xlakchamparanit sábado acxni huák judíos xta-jaxa, xlacán ni xtalacasquín antá natatahuacay nin nac cruz porque luu lanca quilhtamacú xtalimáxtuy, pus huá xlacata talisquínih Pilato calimapeksinalh laqui naancán calactucxuacacán nac cruz huánti xcápekextokohuacacanit laqui pála nataniy y chuná tlán nacamácnucán xtiyalihuacán. **32** Amakolh tropa táalh y taláctucxli huánti pulh xuacachi, chú huánti xuacapá pax-tutu huanti lacxtum xcápekextokohuacacanit Jesús. **33** Pero acxni talaktalacatzúhuilh Jesús taúcxilhli pi aya xninit niaj tu tatlahuánih. **34** Pero chatum tropa litapalhtúculh xlanza nac xtapán Jesús y antaní lhtucúnih taxtuchi xkalhni xáhua chúchut. **35** Pus huánti chuná lichuhuinán eé huántu tatzoknit xlá luu lacatancs catziy porque xlá mān ucxilhnit huántu quitaxtuninít Jesús, y luu lacatancs māluloka porque xlá catziy pi xlícaná huántu tzoka laqui huixinín nā naca-najlayátit. **36** Pus huá chuná talitláhualh laqui chuná likantáxtulh huántu xtatzoknit profetas nac likalhtahuaka, lacatum chiné huan: “Nipara kantum xlúcut catilactucxnícalh.” **37** Y lacatum litum chiné tatzoknit: “Naucxilhcán huánti tapalhtucucanit.”

Jesús macnucán

(Mateo 27.57-61; Marcos 15.42-47; Lucas 23.50-56)

38 Acalistán acxni chuná kantaxtukolh, chatum chixcú xalac Arimatea xuanicán José, xlá nā xlipahuán Jesús pero caj lakatzék porque luu

xcapecuaniy judíos; pero acxní maknícalh lali-huán lákalh Pilato, squínih talacasquín laqui nalén xtiyatlıhua Jesús. Pilato tlən tláhualh huántu xuanima, y entonces José alh mactiy xtiyatlıhua Jesús. ³⁹ Acalistán ná antá chalh Nicodemo, huatiyá amá talipahu chixcú huánti tiquilakapaxiálhnalh Jesús maktum tzisní, xlá xlimín lhuhua xalacuán perfumes líhuanā xatalakcaxtláhu mirra y áloes max, cumu puxamacáhu kilo lata xlén laqui natalitlahuay xtiyatlıhua Jesús. ⁴⁰ Xlichatiycán talitlahuapúxtulh perfume y líhuanā talimáksuitli lacpitzu lhákat huántu xlacán xtaliminit porque luu chuná xtalismaninit xtamácnuy xnincán judíos. ⁴¹ Antaní pekextoko-huacácalh Jesús, lacatzú xuí aktum púcuxtu antá luu lhuhua xchancanít quihui y ná antá xlaca-huaxcanít nac sipi aktum lhucu antaní namácnucán nin, pero nití a xmácnucán antá nin. ⁴² Pus cumu lacatzú xuí amá tahuaxni antá tamácnulh xtiyatlıhua Jesús, juerza lilacapálat xuanit porque aya kotanuyá xuanit y aya xlakchanít quilhtamacú lata natajaxa judíos.

20

*Jesús lacastacuanán nac calinín
(Mateo 28.1-10; Marcos 16.1-8; Lucas 24.1-12)*

¹ Lítuxamatá xmaknicanít, luu domingo lacatzisa lata capokxuacú xuanit, María Magdalena quíllalh antaní xmácnucanít Jesús. Xlá úcxilhli pi niaj antá xuí amá chíhuix huántu xlilakatalacanít

xtahuaxni. ² Huata xlá tokosún alh antaní xtahui-lananchá Pedro chú ɬamá xdiscípulo Jesús huánti luu xpaxquijy, y chiné cahuánilh:

—Quimaxtucanit antaní xmacnukanit xtiyat-lihua Quimpuchinacán, y chú ni xcatzi xanícu len-canit.

³ Amá xchatiycán xdiscípulos Jesús takosún tatáxtulh y táalh antaní xmacnukanit Jesús. ⁴ Xchatiycán lacxtum xtakosnumánalh pero amá chatum ɬatzinú palha tzúculh kosnún akapúlalh Pedro y pulh huá chalh. ⁵ Acxní antá chalh xlá taquilhpútalh laquí tlān natalacanuy, úcxilhli pi antá xtamánalh lacpitzu lhákāt nac catiyatni pero ni tánylh. ⁶ Caj lipuntzú aya chalh Simón Pedro, xlá tuncán tánylh nac lhucu y na caúcxilhli lacpitzu lhákāt huantu antá xtamánalh. ⁷ Xahuachí ná úcxilhli ɬamá lhákāt huantu xliaktlapacanit Jesús xlá ni antá lacxtum xtáma ɬamá lacpitzu lhákāt, huata túnuj xuilicanit y lihuana xkapscanit. ⁸ Amá discípulo huánti pulh xchanit xlá na tánylh nac lhucu y acxní úcxilhli huantu xquitaxtunit acxnicú canájlalh pi niaj antá xmá xtiyatlihua Jesús porque xlacastacuananit. ⁹ Porque hasta acxní ɬamá quilhtamacú niɑ xtaakatakskoy huantu xtatzoktahuilanit nac likalhtahuaka antaní huan pi Cristo huánti namín calakmáxtuy juerza xámaj lacastacuanán nac calinín. ¹⁰ Acalistán amakolh chatiy discípulos tatáspli nac chiquí antaní xtahuilánalh xamakapitzín.

*Jesús tasiyuniy María Magdalena
(Marcos 16.9-11)*

11 María Magdalena taspitpá nac ąmá tahuaxni antaní xmäcnucanit y antá tায়alh nac xtanquiltín tzúcuhl tasay. Y lata chunatiyá xtasama taquilhpútalh laqui natalacanuy nac xputlacni tahuaxni. **12** Antá caúcxilhli chatiy ángeles, luu maksnapapán lata xtalhakānanit, antá xtahui-lánalh ní xtaramicanit Jesús, chatum xuí antaní xacléncanit Jesús y chatum antaní xtantúlencanit.

13 Amakolh ángeles takalhásquilh:

—Puscat, ¿túcu xpälacata lítasápat?

—Huá clitasama cumu lenca Quimpuchinacán y ní ccatziyáhu nícu lichancaní—cakálhtilh xlá.

14 Acxní chuná huankolht, cumu quilhpütaj xyá xlá talakáspitli y úcxilhli pi antá xyá Jesús pero ní lakápasli para huá. **15** Xlá chiné kalhásquilh:

—Puscat, ¿túcu xpälacata lítasápat? ¿Tícu putzápat?

María lacpúhua pi mäx huá ąmá chixcú huanti xmaktakalha ąmá caquihuín antaní xcachancanit quihui, pus huá chiné lihuánilih:

—Catlahua litlán chixcú, para huix lipinita xtiyatlihua, pus caquihuani xanícu lichipinita laqui nacán tiyay.

16 Entonces Jesús chiné huánilih eé tachuhuín:

—¡María!

Xlá pála laktalakáspitli, y nac xatachuhuín hebreo chiné huánilih:

—¡Rabuni! —eé tachuhuín huamputún Makalhtahuakéná.

17 Jesús huánilih:

—Caquimákxtekti y ní caquimächoko, porque nią cchan nac akapún antaní huilachá Quintlat.

Y xahuachí pála capimpi cacaquihuani xamaka-pitzín quinatalán pi aquit cámaj lákán antaní huilachá Quintlat, ná huatiyá amá huantú huixinín ná Mintlaticán; huantí aquit quiDios, ná huá miDioscán huixinín.

¹⁸ María Magdalena tokosún alh caputzay amakolh discípulos y calítachuhuinalh lácu xlá xucxilhnit Quimpuchinacán y ná cahuánilh pi huá xuaninit pütum amá tachuhuín.

*Jesús catasaniy xdiscípulos
(Mateo 28.16-20; Marcos 16.14-18; Lucas 24.36-49)*

¹⁹ Huatiyá amá quilhtamacú xcätzisuaama domingo xdiscípulos xtatamacxtumínit y luu lihuana xtachakextucunit málacchi antaní xtatanumánalh porque luu xtapecuaniy xanapuxcun judíos. Pero masqui niti camalaquínih Jesús cälaktanuchá, ítat calakatayachá antaní xtahuilánalh y chiné cahuánilh:

—Cakalhítit huixinín tapaxuhuán huantú Dios mastay.

²⁰ Acxni chuná cahuanikolh camaşıyúnih xmacán chu xtapán. Xlacán luu xlicana tapaxúhualh acxni taúcxilhli Quimpuchinacán.

²¹ Xlá cahuanipá:

—Xlicana cakalhítit huixinín tapaxuhuán huantú Dios mastay. Cumu la quimacaminít Quintlat laqui naclichuhuinán xtachuhuín, pus náchuná chú aquit ccamacanán laqui naquilalichuhuinaniyáhu quintachuhuín.

²² Entonces Jesús casúnulh nac xokspuncán y chiné cahuánilh:

—Camaklhtinántit huixinín xlitlihueke Espíru Santo. ²³ Huantí huixinín namatzankenaniyátit xtalakalhincán pus ná matzankenanicanít nahuán nac akapún; pero huantí ní namatzankenaniyátit ná nipara nac akapún catimatzzankenanícalh xtalakalhín.

Tomás ucxilha pi xlicana lacastacuananit Jesús

²⁴ Acxní Jesús c̄atasiyúnilh xapóstoles chatum huantí xuanicán Tomás y xtalimapacuhuiy Gemelo, xlá ní antá lacxtum xc̄atáhui xamakapitzín. ²⁵ Acxní xlá chilh, talitachuhuínalh lata lácu xtaucxilhnít xastacná Quimpuchinacán, y chiné tahuánilh:

—Xlicana cucxilhnítáhu xastacná Quimpuchinacán.

Pero Tomás chiné c̄akálhtílh:

—Aquit nipara tzinú ccānajlay, y ní cacticanáj-lalh hasta caní man quilakastapu nacliucxilha antá nac xmacán lata xlimakaxtokocanit clavos, y nactamacnuy actzú quimacán antaní tapalhtucanit.

²⁶ Litzimajlitum xdiscípulos Jesús xtatamacxtumiparanit nac aktum chiqui, pero chú ná xmaktastoknit Tomás. Y m̄asqui lihuanq xchakextucucanit málacchi Jesús tanuchá, ítāt c̄atayánilh y acxní c̄axakatlílh chiné cahuánilh:

—Cakalhítit tapaxuhuán huantú Dios mastay.

²⁷ Cumu Jesús huak xcatziy huantú xlá xlacpu-huán Tomás, chiné huánilh:

—Cumu huix ní luu c̄anajla para aquit clama xastacná, pus chú calita mimacán y catamacnu

antá la a quili makaxtokocanit clavos y na cata-macnúpara mimacán nac quintapán antaní quin-tapalhtucucanit; niaj pucutá caliaklhuhuátnanti huata mejor cacanajla.

²⁸ —¡Xlicana, huix Quimpuchiná y quiDios! — kalhtinalh Tomás.

²⁹ Jesús huánilh:

—Tomás, lanchú huix cajanajla porque quiucxilh-nita, pero atzinú luu lipaxúhu natalatamay huanti natacanajlay y naquintalipahuán masqui ni caquintaúcxilhli para clama xastacná.

Huantu xpalacata litzokcanit eé libro

³⁰ Lhuhua laclanca tascújut huantu tlahuani Jesú斯 nac xlacatincán xdiscípulos, pero ni huak tatzoknit nac eé libro. ³¹ Pero umá huantu lacsac-xtucanit laqui natzokcán chuná tzokcanit laqui huixinín huantí nalikalhtahuakayátit luu naca-najlayátit pi Jesú斯 huá Xkahuasa Dios, xahuachí huá Cristo huantí xmälacnucanit laqui naquinca-lakmaxtuyán, y putum huantí natalipahuán nata-kalhiy amá xasasti latámat huantu necxni lak-sputa.

21

Jesús catasiyuniy xdiscípulos acxni xtasquitinamánalh

¹ Ni xlimakas quilhtamacú Jesú斯 catasiyunipá xtamakalhtahuakén nac xquilhtún xapupunú Tiberias. Acxni catasiyúnih chiné quitáxtulh:

² Luu macxtum xtahuilánalh Simón Pedro chu Tomás huantí xtalimapacuhuiy Gemelo, xahua Natanael xalac Caná xmunicipio Galilea,

chu xcamán Zebedeo, xahua achatiy litúm xtamakalhtahuakén Jesús. ³ Simón Pedro cahuánilh xamakapitzín:

—Aquit cámaj chakanán.

—Pus para pímpat aquinín naccataanán — takálhtílh xamakapitzín.

Lálihuán tatájuhl nac barco y táalh. Pero lata tantascaca tachakánalh nitúcu tachípalh. ⁴ Acxni aya cxkakatilhayá amá catzisní, Jesús catasiyúnilh nac xquiltún chúchut, pero cumu ni naj luu lihuaná xtacatziy amakolh tamakalhtahuakén ni talakápasli para huá Jesús. ⁵ Xlá chiné cakalhásquilh:

—Lacchixcuhuín, ¿pi tlak chipátit squiti?

—Nitúcu cchipáhu —takalhtínalh xlacán.

⁶ —Pus camacapítit mintzalhcán nac xpekstácat barco y chuná lan nachipayátit.

Xlacán chuná atláhualh lata cahuanícalh, y luu lhúhua squiti tachípalh, hasta niaj lay xtamacutuy xtzalhcán nac chúchut. ⁷ Y amá xdiscípulo Jesús huantí luu xpaxquiy xlá cátzilh huantí xcatachu-huinanit y chiné huánilih Pedro:

—¡Tamá huantí quincatachuhuinanán huá Quimpuchinacán!

Acxni káxmatli Pedro pi huá Quimpuchinacán, xlá lálihuán lhakánalh porque xtalakxtununit, lhkén alh nac chúchut tzúculh xquihiuatnán laqui nalakchán antaní xyachá Jesús.

⁸ Max cumu aktum ciento metro lata xlilakamákat hasta nac xquiltún antaní xtahuiłananchá, y xamakapitzín discípulos lakasiyu xtasakalimimánalh xtzalhcán porque lan xtajuma squiti y chunatiyá xtatajumánalh

nac barco hasta talíchálh nac xquilhtún.
⁹ Acxní xlacán táchálh nac xquilhtún taúcxilhli pi xmálhcuyunit y cxpupuma tantum squiti y ná antá xuí mactum caxtilánchahu. ¹⁰ Jesús chiné cahuánilh:

—Cacalítatit cäna caj tanclit squiti huántu acu chipátit huixinín.

¹¹ Simón Pedro lalihuán tajupá nac barco y sakacútulh amá tzálh hasta nac xquilhtún chúchut, huák laclanca squiti hasta aktum ciento atípuxamacututu, pero másqui luu lhuhua squiti xuanít, amá tzálh ni talacáxtitli.

¹² —¡Calacapalátit, uú catátit huayanátit! — cahuánilh Jesús.

Y nipara chatum xdiscípulo xkalhásquilh para tícu xuanít amá chixcú, porque xlacán xtacatziy pi xlicana huá Quimpuchinacán. ¹³ Jesús tala-catzúhuilh nac lhcúyat, tíyah amá caxtilánchahu y camáxquilh laqquí natahuay, y náchuna litum camáxquilh amá squiti.

¹⁴ Chuná umá xlimaktutu cätasiyúnih Jesús xtamakalhtahuakén hasta lata tilacastacuánalh nac caljinín.

Jesús maktutu kalhasquín Pedro para xlicana paxquiy

¹⁵ Acxní chú tahuayankolh, Jesús kalhásquilh Simón Pedro:

—Simón xkahuasa Juan, ¿xlicana quimpaxquiya ni xachuná la eé xamakapitzín quintapaxquiy?

Pedro kálhtilh:

—Quimpuchinacán, huix catziya pi cpaxquiyán.

Jesús huánilh:

—Pus cacamaktákalhti huánti aquit ccalimaxtuy cumu la lactzú quiborregos.

¹⁶ Xlimaktiy kalhasquimpá:

—Simón xkahuasa Juan, ¿luu xlicana chinchú quimpaxquiya?

Xlá kálhtilh:

—Quimpuchiná, huix catziya pi xlicana aquit cpaxquiyán y ni caj clihuanimán.

Xlá huanipá:

—Pus cacamaktákalhti quiborregos.

¹⁷ Xlimaktutu huanipá:

—Simón xkahuasa Juan, ¿xlicana chinchú quimpaxquiya?

Pedro luu snún lipúhua porque aya xlimaktutu laṭa xkalhasquima para luu xlicana xpaxquiy, xlá chiné huánilh:

—Quimpuchiná, huix huák catziya y luu stalanca catziya pi aquit cpaxquiyán.

Jesús huanipá:

—Para xlicana la quihuaniya, pus luu lihuana cacamaktákalhti quiborregos. ¹⁸ Xlicana lacatancs cuaniyán, pi acxní huix kahuasacú xuanita luu mān lihuana xtacaxtayaya xpina antanícu huix xlacpuhuana y niti xlíhuaniyán, pero acxní nakoluna chú mān nachexa mimacán y tunu huánti namalhakeyán y nalenán antanícu huix ni pimputuna.

¹⁹ Acxní chuná huánilh eé tachuhuín, xlá luu lacatancs xuaniputún laṭa lácu Pedro xámaj niy caj xpålacata Jesús y chuná nalilakachixcuhuiy Dios, y nachuná xámaj limasiyuy pi xlicana xlipahuán. Y acxní chuná huanikolh chiné huanipá:

—Huix ankalhiná caquistalani y caquili páhuanti.

²⁰ Acxní xatlahuamánalh Pedro talakáspitli y úcxilhli pi ná xcästalanitilhay amá xtamäkalhta-huakén Jesús huantí luu xpaxquiy, huatiyá amá xdiscípulo huantí lacxtum xtähui nac xpaxtún acxní ahuatá ticatáhuáyalh xapóstoles, xlá chiné tikalhásquilh: “Quimpuchinacán, ¿xatícu cahuá amán liaskahuinanán?” ²¹ Y Pedro kalhásquilh Jesús:

—Quimpuchinacán, chinchú xlá eé ¿lácu ámaj niy? ¿Túcu xlá naokspulay?

²² Jesús huánilh:

—Para aquit xaclacásquilh calatámálh xastacná hasta acxní aquit nacmimparay, tamá huix ní mincuenta; huatiyá huix pi caquistalani y caquili páhuanti.

²³ Amá quilhtamacú, lhuhua huantí xtalipahuanittá Jesús tzúcuh tamäakpuntumiy amá tachu-huín xlacata pi amá xdiscípulo necxni catínilh. Pero Jesús ní huá para ní catínilh, huata xlá chiné huá: “Para aquit xaclacásquilh calatámálh xastacná hasta acxní aquit nacmimparay, tamá huix ní mincuenta.”

²⁴ Pus aquit amá xdiscípulo Jesús huantí xpu-huancán pi ní catínilh, y ná aquit ctzoknít eé libro huantú huixinín likalhtahuakátit, y chuná laca-tancs clichuhuinán huantú aquit man cucxilhniit nac xlatámät Jesús. Xahuachí aquit stalanca cca-tziy pi xlicána huantú cuan y nítu caksaninama.

²⁵ Luu lhuhua laclanca licácnít tascújut huantú titlahuanit Jesús pero ní huák cätzokcanít, pero para huák xtázokli lata kampatunu, clacpuhuán

pi hasta max ni anán antanícu xuilíca nac caquih-tamacú amá laṭa xlilhuhua libros huántu xcatzócalh.

**Xasasti talacaxlan
New Testament in Totonac, Coyutla (MX:toc:Totonac,
Coyutla)**

copyright © 2006 Wycliffe Bible Translators, Inc.

Language: Totonac, Coyutla

Translation by: Wycliffe Bible Translators, Inc.

Totonaco, Coyutla [toc], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Totonac, Coyutla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

88b96e23-f7a2-5cc8-864a-fdcd6f0686f4